

NATIONAL ASSEMBLY OF SEYCHELLES

Tuesday 01st March, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou nou Manm Onorab e bonzour tou nou staff dan Lasanble. E bonzour nou manm piblik ki pe swiv nou. Byenveni pou nou sesyon travay ozordi pou kontinyasyon deba lo mesaz Leta Lanasyon. Mon pas laparol Onorab Flory Larue.

HON FLORY LARUE

Bonzour tou dimoun. Mersi Mr Speaker. Mon ti a kontan pran en pti moman Mr Speaker avan mon komanse, pou remersye parti *LDS* pou donn mwan sa loportinite pou deservi mon pei e pep Seselwa ankor enn fwa.

Mon remersye mon bann koleg pou sa resepsyon salere ki zot in donn mwan e mon fer en langazman pour travay ansanm avek zot pour fer sa ki mye pour Sesel.

SONA ti ganny fer le 22:02:2022. E ou Mr Speaker

ou ti demande ki signifikans sa dat. E sa pti resers ki mon'n fer i fer mon konpran ki dan kote *astrology* zot dir ki sa zour, plannet *Pluto* ti retourne dan son pozisyon egzakt kot i ti ete pandan ki Deklarasyon Lendepandans Lanmerik, ti pe ganny sinyen le 4 Zilyet 1776.

Bokou i konsider sa zour koman zour nesans Lanmerik *du Nord*. *Pluto* i en plannet ki dan astrolozi i asosye avek destriksyon ou en renesans. La, sa plannet in retourne dan son pozisyon kot i ti ete 246an pase.

Alor pou nou isi Sesel, kwa ki pe eksperyans en destriksyon total e kwa ki pe ganny en renesans? I annan en Manm lo lot kote latab *US* in dir ki nou pe rod zot destriksyon, be Mr Speaker i paret bann plannet ki'n fini predik sa. Me pa bat mwan.

Sa dat le 22:02:2022 i osi spesyal pou mwan akoz mon ti fer mon retour ofisyel dan Lasanble Nasyonal sa zour, e i avek en gran lafyerte ki mon pran sa pozisyon pou deservi pep Seselwa.

Mon ti a kontan klarifye ki mon en Manm *LDS*, mon en Manm Komite Egzekitiv Parti *LDS* e mon fyier pour form par en Parti Demokratik kot konversasyon e komunikasyon i ganny ankouraze avek en sel bi,

pour rod solisyon pour nou pei e nou pep. Mon reste angaze avek Tim *LDS* lo teren Anse Royale e mon prezan pour asiste zabitan pour anmenn zot pwen devan, e sa i aplik pour okenn Seselwa ki bezwen mon sipor.

Mon ti en Manm sizyem Lasanble e sa ti en Lasanble ki ti travay pou anmenn sanzman, e sa sanzman nou ti eksperyans li le 24 Oktob 2020, ki osi zour mon lanniverser. Mon repran travay avek setyenm Lasanble avek en lot latas, pour akonpanny nou pei dan en transformasyon ouswa en renesans bann valer perdi.

Onorab *Leader* Gouvernman in eksplik nou ki transformasyon i en zefor entern dan sak endividé pour sanz son konportman, son kominate e son lorganizasyon travay. I en komitman kontinyel ki parfwa difisil, me ki avek konsistans i anmenn en rezulta ki pli meyer.

Sanzman Oktob 2020 ti ariv pandan en kriz mondyal ki'n afekte bokou dimoun, e ti tap lekonomi nou pei. I annan diferan lopinyon lo kwa sa maladi e ki son lenpak. I annan menm bann ki kestyonn son sours e ki mannyer in devlope. Me par kont rezulta bann desizyon mondyal in afekte

lemonn antye, e nou isi Sesel nou pa'n ganny eparnye.

Nou sitwayen in malad fizikman e i annan ki'n kit nou pandan sa peryod, e mon senpatiz avek sa bann fanmir. Nou'n eksperyans bann sityasyon ki zanmen nou ti pou ekspekte; *curfew*, restriksyon bann rankont ant zanmi ek fanmir, gard zistans ek lezot.

Zanfan in eksperyans en koupir dan zot ledikasyon e en separasyon avek zot zanmi, ki kapab afekte zot fason enterakte avek lezot. Sa mank lenteraksyon fizik in osi ant bann koleg travay e limitasyon kontak in aplik pour bann ki zot fanmir i viv aletranze, akoz ti napa fason pour vwayaze pour en peryod preski 2an.

In annan lefe lo reveni finansyel bann fanmir e bann biznes. Sa ki'n fer faid e ferm zot biznes ; sa ki'n perdi lanplwa, sa ki'n perdi propriete. In kas bann planifikasyon e target ki dimoun ti'n met devan zot. Nou fason viv ti sanz konpletman, me sirtou britalman. Dimoun ti ranpli avek lafreyer e lensertitud.

Sa destabilizasyon in anmenn en seri konsekans pour nou popilasyon e la ki sityasyon kriz in sipoze pase e nou pe retourne dan normalite, annou koz lo bann lefe segonder

ki pou avek nou pour en kantite letan, ki nou pa pe koz lo la. Leta mantal dan en konteks medikal nou popilasyon e ki mannyer nou pou akonpanny zot.

Mwan osi mon'n ganny afekte par sa kriz mondal, e mon konpran bann ki'n pas atraver sa e bann ki pe pas atraver sa pour le moman. Vandredi bomaten Onorab *Leader Gouvernman* ti osi fer en refleksyon lo Mr Simeon ki'n kit nou, e yer nou'n antann ankor en trazedi. Mon senpatiz avek sa bann fanmir.

Onorab Georges ti dir nou ki i ti regrete ki i pa'n fer plis e bokou antre nou i souvan fer sa refleksyon letan nou fer fas avek bann pert koumsa. Alor eski nou pou zis reflekte lo la? Enn bann transformasyon ki mon ti a kontan vwar i ki mannyer nou reflekte lo leta lespri nou pep koman en pei.

Eski nou'n pare pour aksepte okenn malez ki en manm nou fanmir, nou zanmi, nou partener ouswa zanfan i annan? Eski nou'n pare pour donn li sipor e pou soutenir li dan en tretman? Eski nou'n pare pou aret gognarde e asasin zot karakter letan zot pe travers sa peryod difisil?

Akoz sa bann aksyon, i fer dimoun perdi zot travay, kas zot

relasyon e fer sa bann dimoun soufer plis ankor.

Me la Mr Speaker *Leader Lopozisyon* ti gid nou an dizan: "Mon pa kontan *character assassination*. Mon pa dakor ek *character assassination* personn."

I dir nou ki li i pa'n fer li, e i pa kontan dimoun ki fer li. Atraver ou Mr Speaker, mon ti a kontan dir mon dakor ek ou Onorab Pillay, akoz mon ti pou onte pou travay avek en dimoun ki servi maladi en dimoun pour denigre li. Maladi Mr Speaker, nou pa demande sa.

Letan nou koz lo lasante nou pep par ofer bann servis pour dyaliz, dyabet ouswa tansyon i pa en problem, i pa en tabou. Nou pa per koz lo la e nou rod solisyon pour ed nou lekor ek lezot o pli vit posib, pour evite ki sa bann problem i agrave ler nou annan en defi medikal ki fizik.

Nou al lopital, nou al vizit nou bann malad e pour rod led, nou al vizit nou bann malad e nou asiste zot ek zot tretman e nou akonpanny zot pour ganny en gerizon.

Me par kont nou ezite pour koz lo bann sentonm bann maladi ki afekte nou moral, e nou retisan pour rod bann servis pour asiste nou pandan sa peryod.

Mon kontan ki nou'n fini pas *Mental Health Act 2020*, me son enplimantasyon dan tou sekter i pli enportan ki zanmen, pour abzorb bann konsekans COVID.

Mon fer en demann ki dan sa transformasyon nou pei, nou pa kit sa servis *Mental Health* ek sa topik deryer, me anmenn li dan bann klinik, lo nou bann zil e envestir dan formasyon bann zenn dan sa domenn, e anmenn plis konesans ver bann ki dan zot travay i kapab fer fas avek bann pasyan.

Minister Ledikasyon pe deza fer en travay pour anmenn en lankadreman pour nou bann zanfan dan lekol, atraver lantrennman bann *Counselors* ki dan lekol e mon felisit zot pou kapab idantifye ki sa sipor *counselling* i neseser e pe fer li disponib e an plis ganny fer anba en kad striktire.

Atraver sa kriz, nou'n pran bann aksyon pour ogmant nou kapasite akey pasyan avek bann novo lenfrastriktir medikal dan servis Lasante, pour kapab garanti servis pour plis dimoun posib. Lopital La Digue i enn sa bann facilite ki pour vin disponib byento.

En promes ki ansyen Gouvernman in fer politik avek, me i pa'n zanmen materyalize

akoz en mank komitman anver son pep.

Dernyen fwa ki nou ti tann sa dan en gran lanpler ti swivan vizit Minis Larue an 2018 kot Lopital Logan, kot i ti promet ki travay pour komans dan 2an lo en lopital. Savedir 2020.

Me letan i ti fer sa deklarasyon okenn plan pa ti'n ankor ganny soumet. E letan Gouvernman ti sanze an 2020, okenn plan pa ti ankor menm ganny fer. Me i pa sirprenan akoz en baryer ki nou pe fer fas avek ozordi Mr Speaker, se sa kantite proze ki'n ganny promet avek bann pov zabitan atraver pei.

I annan proze ki date 20an; tel ki sa enn La Digue. I pa en rikord formidab ditou ki zot in kit deryer pour nou pep. Gouvernman *LDS*, par kont, atraver Prezidan Ramkalawan in pran sa problemm anmenn rapidman e in fer disponib en later pour met sa facilite an plas. E la apre 500 zour plan in pare, e travay pour demare byento.

Me kwa ki pli gou, i ki sa later ti ganny idantifye depi ler son lavant ti ganny fer an 1999, pour konstrir en Lopital lo la. Sa 2 morso later; *LD 111* ek *LD113*, ki fer en total 11,188 met kare, ki ti pour en propriyeter prive ti ganny aste

par Gouvernman Sesel atraver en akizisyon amikal avek propriyeter.

E demars ti komans an Out 1999 parey mon'n dir, kot deza i ti'n ganny idantifye pour Lopital. E an Septanm lannen 2000 i ti ganny transfer par Minis pour Later sa letan, Mr Dolor Ernesta lo servis Minister Lasante.

Tousala ti depi lepok Albert Rene. Avek tou sa bann mouvman later, zot in bezwen oubliy sa enn e nou sanse ki sa enn pan ganny *koken*. Tou sa letan, bann ki organiz petisyon kont sa lokazyon ki'n ganny swazir pa ti konnen ki sa ti leka?

Zot in anbet bann zabitan La Digue ki'n siny petisyon kont sa devlopman, ler Gouvernman ti'n fini fer sa komitman e depans nou larzan pour aste, sa later pour fer egzakteman sa. Sa later ti ganny demarke pou sa e zis sa ! Sanmenm sa Mr Speaker ki apel, lanmen drwat pa konnen ki lanmen gos pe fer.

Me sa i dan lepase, byento Digwa i a kapab benefisyé plennman par sa komitman ki Prezidan in fer, me la prezan zot konn en pe plis bann fe reel.

Mr Speaker mon profite koman mon pe koz en pti gin lo later pou siport Onorab Alcindor dan sizesyon ki in fer

pou fer lenvestigasyon lo ki mannyer bann later *land bank* in ganny servi pou anrisir serten e ki mannyer nou bezwen konnen ki pe arive ek sa bann later *land bank*.

Akoz konstitisyon pa dir donn later pou fer nou ris, i dir donn later pou donn nou pep *shelter*. Dan nou semen transformasyon annou antas nou avek bann fe reel, i pou transform nou fason panse.

Dan mon tranze travay avek sizenm Lasanble mon ti baz mon bann travay lo bann fe konkret soutenir par levidans e mon annan latansyon kontinyen antas mwan ek bann fe reel.

Dan nou semen transformasyon annou atas nou avek bann fe reel, i pou transform nou fason panse.

Dan mon traze travay avek sizenm Lasanble mon ti baz mon bann travay lo bann fe konkret soutenir par levidans e mon annan lentansyon kontinyen atas mwan ek bann fe reel. Sa letan pa ti fasil pour ganny akse avek lenformasyon Mr Speaker.

Me ozordi sa in transformen e nou Prezidan i ankouraz nou pou ler nou annan en rol dan domenn piblik, ki nou bezwen sir lo sa ki nou dir akoz nou lenfliyans

lezot pou pran aksyon baze lo la.

Prezantasyon *SONA* i en legzanp ki Prezidan i annan konfyans dan nou abilite transformasyon koman en Nasyon, pour anmenn en byennet pour nou tou. I konnekte son vizyon avek kot nou pe ale. Pa par donn zis sif, me motiv nou e donn nou konfidans anver nou lekor, pour devlop nou abilite endividyle lezot pour anmenn sa transformasyon.

In idantifye en keksoz ki kapab vin en defi si i pa ganny adrese e in propoz en solisyon, en sanzman lespri e en sanzman konportman, en transformasyon total pour fer nou meyer.

Mr Speaker son pozisyon koman Prezidan i anmenn li dan *5 Star*, me *Father* li, i ankor konekte ek son pep.

Bann ki la ek nou, ki pa dan *5 Star*, ki dir zot konnekte, i pli pa konnekte avek sa ki pe pase otour li. Ler en Lezislater, e pa lot ki *Leader Lopozisyon*, atraver ou Mr Speaker, i vin koz lo en prosesis enportan, parey Lamannman Konstitisyonnal ki pe vini pou fer term Prezidan sorti 5an pou vin 7an, ou bezwen demann ou lekor kantite konekte i konekte?

Prezidan i dir plis demokrasi, li i dir donn 7an? Prezidan letan i ti *Leader Lopozisyon* ti pouse pour tir pas baton dan Konstitisyon ki zot ti mete, akoz zot ti annan en laswaf pouwvar, li i dir donn 7an? Eski li i vreman konpran ki pe pase otour li e ki direksyon nou pe ale? Eski in kalkil byen lekel ki'n abiz Konstitisyon nou pei?

Atraver ou Mr Speaker, eski Onorab *Leader Lopozisyon* i kapab dir nou, kote son levidans kredib i ete pour vin enform nou ki sa propozisyon in ganny fer dan en landrwa serye?

(APPLAUSE)

HON FLORY LARUE

Akoz sa kalite propagann, mwan mon'n vwar lo *Facebook*, lo en *fake profile*, ki li menm li i napa en idantite.

Eski se laba ki i fer son resers? Pa dan *Gazette Ofisyel*? Ouswa Mr Speaker i telman apresye nou Prezidan, ki in ganny nide pour propoz en *Private Members Bill* pour propoz sa. Mwan mon krwar i sa i leka.

Prezidan Ramkalawan, pa'n enform nou ki i annan en *Private Members Bill*, me in donn nou en avan gou bann

travay serye ki pou vin devan nou Lasanble dan kad bann Lalwa ki pou ganny prezante. Bann vre Lalwa.

Enn parmi pou ed nou, pour fer en transformasyon pour detourn sa mank moralite dan nou lasosyete, ki en leta reel nou Nasyon. Pour fer fas avek enn bann krim pli entrisiv ki en dimoun i kapab fer fas avek. Labi seksyel e arselman i prezan dan tou laspe nou lavi isi Sesel.

Zis resaman en dimoun fek ganny kondannen pour abiz en zanfan ki annan zis 9an. Me nou tou nou konnen ki sa pa en ka izole. In telman ganny aksepte ki i pa ni ganny rekonnet koman sa fleo ki i ete. Se pour sa ki i annan en irzans pour anmenn sa *Sexual Offences Bill* devan Lasanble.

Lannen pase Komite madanm Lasanble Nasional ti ganny prezante rapor ek sizesyon pour sa *Bill* par Madanm Mathilda Twomey. E la ki mon'n fek zwenn sa komite, mwan osi mon anmenn mon sipor pour akonpanny sa travay pour anmenn en *Bill* modern pour asiste bann viktим me sirtou bann zanfan ki travers sa bann labi, e donn bann nouveau opsyon lankadreman pour bann viktим.

Sa transformasyon dan ki mannyer nou akonpanny bann viktим a donn plis pouvwar bann ki pe ganny abize pour ekspoz zot abizer devan en Lakour. Mon demann Gouvernman pour met en irzans spesyal lo sa *Bill*.

La Mr Speaker mon ti a kontan onorab mon koleg Onorab Lemiel, dan son lapel pour dir tou dimoun pou gard en lizye lo konportman lezot anver bann ki pli zenn, pran en prekosyon spesyal ler zot pe deside, eski zot gard zot zanfan, kree sa relasyon kot ou zanfan i kapab rakont ou si i pe eksperyans sa.

Nou tou dimoun dan kominote i bezwen osi port latansyon lo la e rapport sa bann ka. En abizer i kapab ou frer, ou papa, ou gran papa, ou tonton, ou partner; me pran kouraz e rapport li pour protez sa inosan, ki ozordi i kapab en fiy ou swa menm en garson. E annou rapel ki bann ka labi i kapab komans ariv avek bann pti baba.

An 2004 isi Sesel en pti baba 3 mwan ti perdi son lavi apre ki en aksyon seksyel grav ti ganny fer avek li.

Mr Speaker letan nou komans nou travay lezislatif, piblik i kapab angaz zot avek nou travay par ganny akse avek *Gazette* lo www.gazette.sc. E

asiste nou avek zot lopinyon e sizesyon, e kontakte nou atraver nou ‘email’ ki lo sit web Lasanble Nasyonal e sa i pou tou Manm.

Plis partisipasyon piblik dan sa travay, i a ed nou pour pli byen reprezent zot e amplifie nou demokrasi.

Mr Speaker dan nou transformasyon nou bezwen atas nou avek gou vre demokrasi, kot koman en Nasyon nou fer li sakenn nou devwar pour kontinyen travay pour elimin koripsyon.

Par met bann bar ki o pour nou bann Dirizan dan tou sekter e non, pa zis dan politik. Dan sizyem Lasanble sa ti ganny fer avek bokou lenerzi par *Leader Lopozisyon* sa letan, Prezidan Wavel Ramkalawan, ki ti montre piblik vre rol *Chairman FPAC*.

I paret sa bar ki'n ganny mete dan sa rol i tro o Mr Speaker. Sa bann topik pa ankor fini, e mon ti a kontan demann *Chairman FPAC* atraver ou Mr Speaker, ki pe arive avek son program travay? E eski i pe sey kasyet bann ka koripsyon ki'n egziste?

Leskiz *COVID* pa kapab aplike, akoz *FPAC* ti fer en travay entans lo rapor Oditer Zeneral 2019 ant le 3 ek le 6 Me 2021, ki ti lannen pase. Kot

menm si restriksyon ti anfors plizyer Lazans ti vin fer bann deliberasyon devan Komite pandan sa 3 zour.

Mon fer sa lobzervasyon, akoz i annan 2 rapor Oditer Zeneral ki baze lo bann lensidan ki endik bann aksyon koripsyon ki pa ankor ganny depouye, e pe anmas lapousyer lo *shelf* dan Biro *Leader Lopozisyon* ki osi *Chairman FPAC*.

Nou oule elimin sa bann aksyon dan nou pei alor annou adres sa bann topik pour liber nou pei, akoz se sa standar ki nou, nou oule. Pour benefis Seselwa zot kapab ganny kopi sa bann rapor e plizyer lezot lo sit ‘*Auditor General Seychelles*’ ouswa: www.oag.sc

Enn sa rapor ti ganny prezante an Zen 2020, lo *COSPROH*; ki en moman ti propriyeter 14 lotel ki ti ganny vann ant 1992 e 2007 anba bann tranzaksyon ki pa kler, me malerezman Lasanble ti ganny dizourd mwens ki 2 mwan apre, le 6 Out 2020. E *FPAC* anba *Chairman* sa letan, Prezidan Wavel Ramkalawan pa ti ganny sans pas lo la.

En keksoz ki'n sok mwan i lo paz 47 sa rapor, kot i fer referans avek 51poursan par ki *COSPROH* ti annan dan *SKYCHEF* an 1986. E mon kirye

pou konnen, e mon asire Lasanble antye e pep Seselwa osi i kirye pou konnen, si Gouvernman i ankor annan par dan *Skychef?* Ki son valer ozordi? Si napa, ki'n arive avek? Eski in disparet? Nou pe koz lo larises nou pei la.

Lenpresyon i ki COSPROH ti ganny formen pour zer bann lotel, me i osi annan later ki COSPROH ti gannyen avek Gouvernman pou fer devlopman e souvan sa ti zis pour zis R1. Sa osi Seselwa i bezwen konnen ki'n arive ek son bann gran, gran, gran bout later anba COSPROH.

Mr Speaker si bi mazer Chairman FPAC i asire ki Gouvernman i transparan mannyer in depans larzan, parey nou ti ganny dir yer swar lo Nouvel, fodre pa i swazir depans ki Gouvernman. Sa i son rol koman Chairman pe enport si sa ti son Gouvernman.

Alor degaze, vin ed nou, pa les plis letan pase pour fini ek sa bann zafer, e nou a konnen en fwa pour tou ki ti arive.

Mr Speaker Sa lot rapor ti ganny prezante an Zanvye 2021 lannen pase avek 7enm Lasanble, in la in pas plis ki 1an pase, i apele '*Land deals and transactions between the Government and the United Seychelles Political Party*' ouswa

an Kreol, 'Demars e Tranzaksyon Later ant Gouvernman e Parti Politik *United Seychelles*.'

Sa rapor, i diskrit mouvman 46 morso later, ki fer en total 69,000 met kare, a en valer zis selman R5.7milyon ant 1996 ziska 2017. Sa i fer ki sa Parti Politik US in aste 1 met kare later pou zis R82.

Lo sit Lasanble Nasyonal mon'n vwar ki dan en miting FPAC an Avril 2021, lannen pase, Chairman FPAC Onorab Pillay, ti dir ki se dan dezyenm term Lasanble ki sa rapor ti pou ganny depouye. Mr Speaker semenn pase Lasanble in dan son dezyenm lannen, be oli depouyman sa rapor?

Kan ki Seselwa pou tann bann kestyon ganny demande? Mon'n al lo sit Lasanble ki fer en revi bann keksoz ki ganny diskite ler Komite i zwenn, mon pa'n vwar kot i dir ki akoz zot minorite lo Komite FPAC ki zot pe ganny difikilte pour komans lanket e ki i annan posibilite ki Gouvernman pe enterfer avek travay FPAC. Oli levidans ki tousala pe arive?

I annan 2 rapor ki i pa ankor delivre lo la;- enn i annan 1an edmi e lot i annan 1an. Ki mannyer Gouvernman pe enterfer? Eksplik nou? Mr Speaker dan sa transformasyon

pour anmenn vre demokrasi, nou pou bezwen ganny en Lopozisyon ki kapab zwe son rol koman en vre Lopozisyon. Zot bezwen vin balans sa pouwwar.

Leta Lanasyon ozordi Mr Speaker i ki nou annan en Lopozisyon ki fay! Sityasyon i preske komik Mr Speaker. Dan letan ki zot ti mazoriter e zot ti dan Egzekitiv. *SPPF*, Lepep e *US*, zot ti servi zot pouwwar mazoriter, menm pandan bann sistenm sipoze demokratik anba miltiparti, zot ti fer tou pou etouf Lopozisyon. Zot ti servi tou kalite fason.

Menas plas travay dimoun, ekout telefonn, blok *file* pour Later ek Ledikasyon, bat bann Sef Politik le 3 Oktob 2006 e kas zot latet, senpleman met lafreyer pour dimoun pa partisipe dan Lopozisyon sa letan. Ozordi Mr Speaker sa menm ansyen Lopozisyon ki telman for atraver son Egzekitiv e en mazorite dan Lasanble, pe demann zot, sa nouveau Lopozisyon pou *step-up* e pran zot rol serye!

Be ed nou silvouple, pa kale, pa fer pares. Zis dan rapor *COSPROH* i donn en rekomandasyon kler, i dir fodre pa *FPAC* i tarde pour demann bann kestyon pertinan. Pli letan i pase pli nou bann ansyen propriete Leta i ganny

manipile e disparet dan bann lanmen propriyeter prive, dan bann lakonpannyen *offshore* dan *BVI, Panama*, partou kote e Seselwa li i kontinyen espere pour ganny rann sa ki pou li.

Sa bann propriete i nou propriete e nou larzan, e fodre pa ki *Leader* Lopozisyon koman Chairman *FPAC*, i trenn son lipye pour anmenn rezulta pour sa pep.

Atraver ou Mr Speaker, *Leader* Lopozisyon, Onorab Sebastien Pillay ti termin son larepons lo SONA an dizan –‘ i pe vin delivre dan son pozisyon i pou fer sa pou zot, i pou fer sa pou nou e annou konfye li sa latas.’ Be nou’n konfye li, me i napa en plan, zot napa en plan, e sa pa zis dan Lasanble.

Nou espere dan lide transformasyon ki Chairman *FPAC* i vin fer sa travay pou nou o pli vit posib. Akoz Mr Speaker se Konstitisyon Sesel ki'n konfye li sa latas, fodre pa i lour dan transformasyon pour retourn sa ki pour Seselwa dan kof Leta ! Si sa *Leader* Lopozisyon pa kapab delivre be i senp.

Parey Onorab Simon Gill ti dir nou “Sed la plas, Les en lot seye. ” Akoz pour nou demokrasi devlope e reste for, fodre annan en Lopozisyon ki

kosto, konpetan, me sa i si zot kapab fer li.

Dan sa sipor Mr Speaker pour distrik, nou pe kontinyelman fer en travay pour anmenn bann servis Gouvernman dan kominote atraver Biro Ladministrasyon Distrik.

Sa bann biro in ganny politicize dan lepase, menm si Ansyen Gouvernman US ti'n pran later, pour fer zot bann biro brans, pour zot Parti Politik, zot ti servi Biro Ladministrasyon Distrik pour konfiz piblik lo rol sa biro e zot ti fer politik ladan. I pa en biro ki ganny servi pour donn larzan ouswa fer faver pandan letan eleksyon.

Sa i sa lot biro kot tou son rido i rouz! Fer byen sa distensyon, i pa biro ser dimoun Biro Ladministrasyon Distrik. I en biro avek bann fonksyon ki sipoze deservi piblik. E la mon siport travay edikasyonnel sa Minister, pour eksplik zot rol. La ki bann restriksyon in ganny retire profite pour fer bann *Open Day* dan sak distrik pour eksplik zot bann servis avek bann zabitan.

Seselwa i bezwen konpran, ki Ladministrasyon Distrik i bann Biro Gouvernman, ki tonm direkteman anba Minister

Gouvernman Lokal e son Minis i Madanm Rose-Marie Hoareau, ki form par sa lekip solid, ki otour nou Prezidan pour ed li delivre. Mon ankouraz zot pour al rod servis dan sa bann biro.

Mr Speaker mon osi kontan ki dan nou vizyon transformasyon pour nou pei, nou pe ganny vwar klerman atraver rod solisyon pou bann problemm trafik ki'n dir tro lontan.

Nou remersye Minis e Minister pou sa zefor. Mon osi propoze dan sa lelan, ki nou lans en plan pou amelyor sistèm transpor piblik pou fer li vin en servis ki konfortab, modern, konstan e a ler. Pa *data* dan *TATA*, me en servis ki delivre.

Identife bann later pou elarzi bann *bus top* e bann *layby* pou kontinyen develop trafik pou nou popilasyon. Pour konklir Mr Speaker annou get vizyon Prezidan pou transformasyon nou pep kote i kapab anmenn nou pou en meyer Sesel, ki nou tou nou pou anvi pou tou Seselwa.

Mon konnen ki nou pou kapab fer sa transformasyon. Mon konnen ki nou Prezidan i konekte. In demann limite par koste, pa pou son parti politik me pou byennet pei, pou Sesel. Pa parey bann ki dir koste,

solman en letan zot ti dir dimoun” si ou pa kontan, avyon i ankor anvole !”

Bann zanfan Sesel ki pa ti kontan, ti ale, en bann ti ganny pouse e kit pei avek zis zot lenz lo zot ledo! Zot ti al egzile. Nou Prezidan li i konekte avek en vizyon pour fer Sesel retourne ankor pour tou son zanfan. Bann ki ti ale, zot ankor zanfan Sesel. I pe vizit zot, i pe rod zot partisipasyon, i pe angaz zot, i pe re atir zot, ver zot pei, ver nou pei.

Se koumsa ki nou pou ganny vre limite, ler nou tou ansanm nou rekonstrir nou pei. Pep Seselwa pa les en pti group dimoun anbet zot pou krwar ki sa Seselwa ki Sesel, i pli Seselwa, ki bann ki ti ganny pouse dan zot prop pei. Seselwa menm sa. Zot koz Kreol ! Zot zanfan Sesel !

Alor annou vin ansanm pou nou fer sa transformasyon pou nou pei pou tou nou pep, pou nou fitir. Mersi Mr Speaker.

(APPLAUSE)

MR SPEAKER

Mersi Onorab. Lo kote LDS i annan en pti sanzman dan lord, Onorab Clifford Andre avek Onorab Bistoquet in trok zot pozisyon. Onorab Clifford Andre pou fer lapel la, e Onorab

Bistoquet pou pran son plas ki i annan. Onorab Andre.

HON CLIFFORD ANDRE

Mersi Mr Speaker. Bonzour tou Manm Onorab e bonzour tou dimoun ki a lekout. Leta nou Nasyon i analiz lo lasante en Nasyon lo en baz anyel. I en kontrandi ki ganny fer lo ki'n pase pandan lannen 2021 e kote nou pe ale pou lannen 2022.

Prezidan Ramkalawan in fer egzakteman sa dan son diskour Mardi pase. Mr Speaker i normal pou Lopozisyon ozordi dir nou ki zot, zot pa war bokou dan sa diskour, akoz zot ki'n toulstan la e sa ki'n ganny fer dan sa kourt dele letan ki LDS in o pouvwar in remarkab.

Alors mwan mon dir avek pep Seselwa pou inyor bann komanter negativ ki pe ganny fer, e annou vvar realite ki nou Prezidan in met devan nou.

Mon pou aprezan pas en pe lo bann sityasyon ki mwan mon vvar pe afekte nou pei an zeneral e osi mon distrik, pour ki mon'n ganny elekte pou reprezent zot dan sa Lasanble.

Lord ek lape; Travay Lapolis i reste en travay primordyal. I enportan note ki lord ek lape i touzour en keksoz ki nou, ki nou tou, nou swete i

mars tre byen dan nou pei. Mon oule felisit nouvo Komisyoner Lapolis avek son lekip. Zot pe fer zot mye pou asire ki nou vvar en amelyorasyon dan lafason ki keksoz i marse dan nou pei.

Bann defi i kontinyen monte e lenportans se ki nou rod fason pou nou rod sa bann defi, ki realite i touzour prezant devan nou. Leta Anse Aux Pins kot i konsern lord ek lape, i en konsern bokou dimoun dan sa distrik.

Mon'n annan en seri miting avek zabitan mon distrik, e zot konsern primordyal ti Lapolis pou bezwen pli aktiv ou pou met li pli an konteks, pli proaktiv dan delivrans zot fonksyon anver sitwayen Anse Aux Pins.

Mwan a sa pwen oule lans en lapel avek Lotorite Lapolis, pou fer plis e reponn a lapel nou zabitan dan tou kwen sa zoli distrik ler zot demann led.

Dan bann *Housing Estate* problemm vwazinaz i reste en defi, lanmizik for dan bann ler kot serten i bezwen repoze pou zot al travay, i reste ankor en defi.

La avek restriksyon ki'n ganny retire mon demann tou dimoun pou pa *disturb* lezot e pou pran konsiderasyon ki zot pe viv dan en kominate kot i

annan diferan dimoun ki travay dan diferan ler e ki sa i merit en korperasyon tou dimoun, pou asire ki lape e konprenezon i reste sa lenspirasyon ki pou bezwen kontinyelman gid nou.

A sa staz nou lafors Lapolis fodre i *up* son *game* e vin pli profesyonnel, ler nou pep i demann zot servis. Mon oule fer resorti ki resours imen e materyel i reste en defi mazer. Parfwa retar i akoz napa dimoun ki pe travay e parfwa osi i annan plizyer sityasyon an menm tan.

Si en kordgard i annan zis en transpor pou deplway son bann gard lo *scene* ler en dimoun i *call*, e zot ganny plis ki en *call* an menm tan sa i rann lavi sa bann gard difisil e fer sa bann zabitan fristre. Akoz zot bezwen esper en bon pe letan avan zot ganny sa servis ki zot ti pe ekspekte e bezwen dan limedya.

Mr Speaker mon reste konfidan ki nou Prezidan avek komisyoner Lapolis, i reste angaze pou asire ki lannen 2022 pou annan amelyorasyon dan travay Lapolis ;- pli partikilyerman Anse Aux Pins pou nou asir lord ek lape e rennyen. E ki nou tou enkli bann ki parfwa loter bann sityasyon, ava realize ki keksoz bezwen sanze.

Mon reste angaze pou toultan donn mon lekspertiz pou ed fer Sesel ek lannen 2021 vin enn ki pou pli bon ki lannen 2021. Mon lekip Anse Aux Pins pou fer sir ki nou pou kontinyen travay avek nou bann gard, pou fer nou distrik vin enn ki annan lord ek lape pou tou son zabitant.

Lafors Defans ;

Nou bann zomn ek fanm dan liniform, ki mon oule dir en felisitasyon spesyal koman Chair Komite Ladefans, zot travay i enn ki fer nou pei fyer lo lasenn enternasyonal. Lopozisyon pe dir ki oparavan ti annan koze lo nesesite en tel lafors.

Me les mon fer resorti ki letan Prezidan Ramkalawan ti *Leader* Lopozisyon, i pa ti dir ki i pa bezwen en Lafors Defans me i ti dir ki nou bezwen en lafors Gard Lakot ki annan plis zomn, olye enn ki oriyante ver lafors lo later kot bann travay i mwens. Ler zot koze silvouple koz en pe laverite ek sa pep.

(APPLAUSE)

HON CLIFFORD ANDRE

Mon fyer ler mon get Gard Lakot, mon fyer Komandan Kolonnele Atala. En koleg ki nou'n lekol ansanm depi NYS, politeknik e apre nou'n dan

larme ansanm. Felisitasyon Kolonnele e mon konnen ki ou pou kontinyen fer nou pei fyer, e ou pou toultan desarz ou responsabilite avek lonnekte e enparsyalite.

Mon egalman fyer e konnen ki Sef Lafors Defans Brigadier Rosette, en dimoun ki nou'n travay ansanm pou bokou lannen i annan sa kapasite pou li delivre en travay ki pou kontinyen met Sesel lo map enternasyonal.

Annefe Mr Speaker, mon pa pou kapab fer sa tourdorizon san felisit Sef Deta Mazor Kolonnele Jim. En lot dimoun ki mon'n travay avek pou bokou lannen. Lafors Defans i dan bon lanmen.

Mon ti a kontan demann bann zenn pou zot zwenn sa lafors letan bann loportinite i ganny prezante avek zot.

Sesel pou kontinyelman bezwen servis son pep. I egalman enportan pou fer resorti ki menm loportinite i bezwen ganny donnen avek tou Manm sa lafors e non, pa fer menm preferans ler i arriv lo loportinite pou avans devan.

I annan serten konplent lo lafason ki seleksyon i ganny fer, pou donn sans serten pou progrese. Mon konnen ki sa bann defi pe ganny adrese e pou

ganny rektifye dan la mezir ki zot ganny anmenn devan.

Mwan avek mon Komite, nou pare pou ekout bann defi e don en koudmen adres serten sa bann defi avek bi amelyor sityasyon. Nou pou rekomans nou bann vizit byento, la ki nouvo lannen travay in komanse pou Lasanble.

Mr Speaker lot pwen se lakaz ek later;

Lakaz ek later i reste en defi mazer pou nou Gouvernman. Ler nou get dan lemonn an antye mazorite pei ki an vwa devlopman i annan defi lakaz ek later. Sesel pa en leksepsyon. Gouvernman *LDS* in o pouvwar pou mwens ki 2an, alor pou rezourd problem lakaz ki date plis ki 20an, i pa posib dan limedya.

Sa pou pran letan e nou pou bezwen rod bann nouvo fason fer ki ladministrasyon avan pa ti fer, pour ki nou pou kapab esey rezourd sa problem.

Sesel Mr Speaker i en pti pei, avek resours linite, avek en lalis aplikan ki en pe plis ki 3mil, i pa fasil pou rezourd tou sa dan sa pri dele letan ki *LDS* in o pouvwar.

Lopozisyon pou dir ki nou ti dir nou pou rezourd sa bann problem. Wi nou ti dir e dan nou Manifesto sa i en travay ki

nou ti dir nou pou vin fer. Alors les nou fer li an servan bann mekanizm ki nou Gouvernman ava met an plas.

Nou pa ti dir ki nou pe vin fer mazik dan 15mwan, me nou programm i etal pou dirasyon manda Prezidan e dela 2025.

Pou bann dimoun ki pe fristre, akoz zot sityasyon lakaz, nou demann zot pou pasyante akoz Gouvernman *LDS* pou get dan zot *welfare*.

Sepandan i toulstan enportan pou demann bann fanmir pou zot kontinyen solider avek kanmarad pou zot annan korperasyon avek kanmarad, pou donn en pti plas reste antretan ki bann demars i kontinyen ganny fer pou asire ki Gouvernman i rod mwayer, pou asire ki bann aplikan i ganny satisfaksyon dan en dele letan rezonnab.

Anse Aux Pins Mr Speaker anba nouvo ladministrasyon, nou annan en plan ki pe ganny fer pou Proze Lakaz Caryol. Mon ti a kontan demann Minis pou Lakaz, pou fer sir ki konsiltasyon pou sa proze i ganny fer avek zabitan sa distrik.

Sa i akoz parfwa koman en Gouvernman nou zis enpoz en proze lo zabitan e apre ki nou vwar bann defi ler dimoun pe okip sa bann facilite.

I enportan pour ki si en lespas later ki kapab met flat lo la nou eksplwat sa facilite an antye. La nou oule dir ki nou fer plana enn fwa pour tou, e apre nou fer plan lo rod finansman pou fer sa proze menm si i par faz. Mon oule egalman rekonnnet ki nou pe ganny nou 6 *flat* kot *ex-onezime Estate*.

I enportan pou note ki zabitant Anse Aux Pins pou bezwen realize ki alokasyon pou ganny fer lo en baz merit. E mon konnen ki zot tou zot merite. Me Minister pou met serten kriter pou sa partikilye rezon.

Silvouple pa bezwen pran sa an mal, nou pou annan ankor devlopman lakaz Anse Aux Pins e zot tour pou arive.

Mon konnen ki bokou pe espere pou bokou letan me ozordi sa responsabilite pou delivre i tonm lo zepol *LDS*. E nou pe demann zot pou pasyante e nou, nou pou delivre.

Mr Speaker i enportan note ki avek direksyon ek gidans ki Minis Ferrari in donn nou, nou'n war ki bazar ki ti'n ganny promet plizyer repriz dan lepase pe ganny materyalize.

Wi i pou annan en pri retar dan konplisyon sa proze. Akoz serten sityasyon enprevi,

serten bann travay pe bezwen ganny fer an deor sa *scope of work* ki kontrakter ki'n ganny *allocate* avek sa kontra pe bezwen fer.

Alors nou pe demann zot pou pasyante me selman nou pou gannyen nou bazar.

Parey zot vwar letan zot pase konstriksyon i a en staz avanse, me selman nou pou bezwen parey mon'n dir esper en pri pe plis. Kontrakter in dir mwan ki i ti a'n swete ki nou ti *on target*, me selman i pou delivre lo sa travay.

A sa pwen mon pou demann bann peser Anse Aux Pins pou zwenn ansanm, pou formaliz formasyon nou Lasosyasyon Peser ki pou osi zer sa bazar apre ki in konplete.

Mr Speaker letan nou pe get Anse Aux Pins, nou vwar ki i annan bokou devlopman ki pe ganny fer dan sa distrik. Nou annan en investiser ki'n antre e pe fer an batiman kot pou annan bokou, bokou, bokou devlopman e bokou travay pou ganny fer.

Nou fyer pou vwar devlopman bor lanmer par en investiser prive ki pe fer Anse Aux Pins vin en dezyenm lavil. Dan sa batiman mon'n ganny fer konnen ki pou annan bann diferan facilite, ki pou ede

desantraliz serten servis ki bokou fwa nou vwar zis anvil.

Dan sa batiman pou annan servis farmasi, sa i ava ed bann dimoun ki pa'n ganny sans fer serten demars anvil, pou fer sa demars ler zot pas dan sa zoli distrik ki apel Anse Aux Pins. I pou egalman annan en *cafeteria* dan sa batiman, pou deservi dimoun ki pou anvi pran en pti repo e manz en pti *bite* parey nou dir.

Pou osi annan apartman kot sityasyon lakaz ava kapab ganny soulaze. Bann ki kontan fer zot seve, en salon seve pou obor zot e zot pou kapab marse pou al ganny sa servis. Pou osi annan en *barber shop* kot bann imsyé pou kapab al met zot osi azour.

I pou en landrwa kot pou annan diferan kalite laboutik e plizyer lezot facilite ki ozordi nou napa. Mon ti a kontan osi demann lezot lenvestiser Mr Speaker, pou vin fer parey dan nou distrik akoz sa bann kalite keksoz i pou anmenn bokou travay pou nou bann zabitan.

Mon oule demann zot pou silvouple, mon oule demann bann zabitan, pou silvouple servi sa bann devlopman byen akoz a lafen dizour se nou distrik ki pou benefisyé.

Nou pe diskit mwan avek Ladministrasyon Distrik nou pe

diskit avek Gouvernman Lokal pou ki nou kapab fer en *playground* devan Ladministrasyon Distrik.

Nou'n ganny en lot envestiser ki'n promet nou bann zouzou e alors nou bezwen en lespas an vi ki kot *playground* ti ete Gouvernman in bezwen rann son met. Mon pe demande e swete ki dan premye mwatye sa lannen nou a kapab fini rezourd sa problemm e nou ava donn nou bann zanfan en *playground*.

Nou'n osi vwar louvertir en nouveau *daycare*. Sa i en *plus* dan nou distrik en facilite parey i enn ki lontan nou ti pe rode e i dan en lokasyon ideal. Sa *daycare* i o servis tou nou zabitan kot la zot zis kapab depoz zot zanfan e sote e pran bis. Pou bann ki annan facilite loto, zot fasilman kapab depoz zot zanfan e apre al travay.

Mr Speaker semen i reste enn bann defi dan nou distrik, in touzour en konsern primordyal. Bann semen segonder i reste dan bann kondisyon deplorab. I touzour demann en *resurface* lo sa bann semen ki parfwa ranpli avek trou.

Mon'n anmenn Lotorite konsernen pou vwar pou zot menm e nou pe sey travay lo en plan pou nou kapab rezourd sa

bann sityasyon dan la mezir ki resours finansyel i permet.

Mon pa pou kapab koz lo semen Anse Aux Pins san mansyonn semen Dan Kreson. Sa ti en sityasyon ki nou ti'n koz lo la a plizyer repriz. La ki nou lekonomi pe refer e ki nou pe osi swiv sityasyon mondyal de pros, mon pou remet sa proze lo latab.

Dan mon bann koze avek serten envestiser mon pou met sa devan zot ,pou vwar si okenn posibilite i egziste pou zot fer sa proze vin en realite pou nou zabitant.

Mr Speaker letan mon osi pe koz lo semen, LWMA i reste enn bann fakter konsernan dan nou distrik. Nou zabitant i oule vwar bann *bin site* me zot pa oule donn zot lespas pou nou kapab met *bin site* lo la.

Mon oule enplor bann zabitant Mr Speaker pou zot kontribye, ki nou ava kapab deservi lezot dimoun ki zot, zot napa en lespas me zot pe reste dan *flat* pou zot kapab osi met zot salte dan en landrwa.

I enportan ki nou rode ki mannyer sityasyon i kapab amelyore e ki zot, zot a fer sa sityasyon, vin enn ki meyer pour nou tou.

Mr Speaker tourizm i reste enn nou bann lakle nou lekonomi. Avek sityasyon

mondyal lager ki'n deklare Ikreen avek *La Russie* nou'n vwar ki in annan bann sityasyon kot bann touris ris pe fer fas avek.

Alors nou bezwen swiv sa de pros. E nou bezwen osi kapab konpran ki si bann sitasyon ki Prezidan in anonse logmantasyon saler i pa materyalize, akoz en lot sityasyon ki pa direkteman relye avek Sesel, nou pou bezwen konpran e fer fas ek sa bann sityasyon.

Letan Gouvernman ti ouver *Airport* ti en desizyon nob, en desizyon brav me en desizyon ki pou bezwen ganny pran. E sa in anmenn bann konsekans tre, tre enportan pou nou pei.

Mr Speaker pri lavi i reste enn bann konsern ki nou pep i kontinyelman koz lo la.

STC pe fer son mye, STC ti dan bann sityasyon i ti ganny servi dan lepase Mr Speaker pou ganny fer larzan pou parti politik.

Alors sa bann sityasyon in ganny tire e alors o firamezir letan sityasyon mondyal i amelyore, nou pou vwar en bes dan pri lavi akoz STC in al repran son *core objective*, ki ti sete pou li fer sir ki pri lavi i reste abordab pou tou

Seselwa;- pa zis pou en bann me pour tou Seselwa.

Mr Speaker i osi enportan pou note ki bann programm URS ki ti'n ganny fer, ki ti'n ganny met an plas letan sa bann programm in ganny revwar, bokou dimoun in al dan lanplwa e bokou dimoun in al dan zot pti biznes.

E sa i montre ki poudir Gouvernman son travay e son swe se pour fer sir ki i *empower* son pep, pour ki sa pep i ava kapab fer sir ki li i kapab determinen kote i ale, e ki grander i arive. *The sky is always the limit.*

Mr Speaker an terminan, mon ti a kontan senpatiz avek tou dimoun ki'n perdi en pros dan sa pandemik ki nou'n pas atraver, ki nou ankor pe pas atraver. Mon konnen i pa bann sityasyon fasil, akoz mon osi mon'n deza perdi pros.

Alors mon dir zot kouraz e mon toultan demann zot pou kontinyen priy Bondye, pour ki nou pei i ava kapab fer fas avek bann defi ekstern ki pou ganny enpoze lo nou. Avek sa de pti mon Mr Speaker mon ti a kontan remersi ou. Mersi.

(APPLAUSE)

MR SPEAKER

Mersi Onorab. Prezan mon a pas laparol Onorab Wallace Cosgrow pou son entervansyon.

HON WALLACE COSGROW

Bonzour Mr Speaker. Mersi Mr Speaker. Bonzour tou Manm Onorab e tou Seselwa ki pe ekout nou.

Mr Speaker i mon devwar konman en Manm sa Lasanble Nasyonal, parey mon ti fer lannen pase, pou donn pa zis mon repons lo sa ladres Leta nou Nasyon ki ti ganny delivre par Prezidan Larepublik semenn pase, me pou osi eksprim mon pwennvi e santiman personnel e santiman lezot patriot Seselwa lo Leta nou Nasyon, lo vre Leta nou Nasyon.

Mon'n ekout atantivman bann Manm lot kote latab ki'n koze pandan sa de zour, e i kler Mr Speaker ki la mazorite zot pe senpleman defann sa ladministrasyon, e dan serten ka pe negliz devwar ki zot annan anver bann zabitan zot distrik ki'n elekte zot.

Mon oule fer zot rapel ki sa legzersis ki nou pe fer pandan sa 3 zour, se pa pou defann en prensip ouswa en parti politik, me se en deba lo Leta nou Nasyon. En Nasyon kot dimoun avek divers lopinyon i viv e koegziste.

Ler ki nou pe fer sa deba nou bezwen senser avek nou lekor ek sa pep. E zanmen oubliy nou sermantasyon pour defann pep Seselwa. Nou bezwen dir laverite lo kwa ki pe vreman arive dan nou pti pei. Nou pep i ekspekte e zot merit pa mwens ki sa. Napa plas pou politik partisan dan sa legzersis tre enportan. Nou a fer politik apre. I annan en kantite letan pour politik. Sa travay i serye sa.

An dizan sa, ozordi Mr Speaker, mwan, mon le fer mon kontribisyon, par koz lo bann vre size nasyonal e enportan ki pe afekte nou pep e nou pei sesel an 2022. I pa en sekre ki nou viv dan enn bann pli zoli pei o monn, beni avek laverdir, disab blan e lanmer ble.

En biodiversite ris ki emervey larestan lemonn e ki lenspirasyon bokou e lanvi bokou pou en zour vizit sa paradi lo later. Sa i mon Sesel, i ou Sesel, i nou Sesel.

Mr Speaker menm si nou konnen ki sa ki mon fek dir i laverite, nou osi konnen ki Sesel e Nasyon Seselwa an 2022 pe fer fas avek bann sirkonstans vreman difisil.

Menm apre 2an, nou war nou ankor dan milye en *pandemic*, e kot Seselwa ziska yer ti ankor pe viv anba bokou

restriksyon, ki ti pe kree en kantite tansyon ek fristrasyon parmi nou pep. E la mon bezwen fer resorti ki bann desizyon ki'n ganny anonse yer, i ava ede pour soulaz en pe nou pep.

Menm sa bokou i bezwen al rekomanse. Bokou fanmir i war li difisil si non, pa enposib pou fer de bout zwenn. Dan en letan kot kou lavi in pet plafon e sistenm Lasistans Sosyal ki'n ganny met an plas pou soutenir bann ki pli vilnerab, in pri dan birokiasi e pa pe neseserman reponn bezwen popilasyon.

Sekter biznes ozordi, sirtou bann pti e mwayen antrepriz, pe osi fer fas avek bokou difikilte malgre in annan serten soulazman. Sekirite, lord ek lape i reste en konsern pour sitwayen. E konfizyon ek lafreyer parmi bokou travayer servis piblik i en lot konsern reel parmi popilasyon.

Me Mr Speaker, ladres delivre par Prezidan, i pa enn ki'n enspir lespwar pour pep Seselwa e mwan sa pa sirprann mwan, mon bezwen admet.

Me par kont, mon ti ekspekte ki apre 16mwan dan lofis lo latet en Gouvernman ki'n ganny elekte lo en tiket 'sanzman', Prezidan ti pou'n kapab konpran en pe pli byen fonksyonnman son

Gouvernman e donn bann apersi pli o profon lo Leta nou Nasyon e donn lespwar sa pep. Sa ti mon swe me larealite in diferan.

Dan bokou lenstans, dan sa 1erdtan 33 minit ki in koze, bokou ki'n ganny dir ti tre siperfisyel e dan labsans en diskour striktire, nou'n war ki in fer bokou letour e parfwa retourn lo serten size.

Anyway sa i son fason, me lefe i reste ki bokou bann size in swa pa ganny touse, ouswa in ganny touse dan en fason sitan siperfisyel kot pep i reste konfize lo ki mannyer nou trouv solisyon e ki mannyer ou bouz de lavan.

Mr Speaker enn bann konsern reel Sesel ozordi se kou lavi. Partou kot ou pase sa i topik konversasyon. I pe afekte tou kous nou popilasyon. Apre ki zot in ekout Prezidan, bokou dimoun in pli konfize e zot in perdi lespwar ki sa Gouvernman i annan solisyon pou dil avek kou lavi.

Apre 30an ki Prezidan avek son parti SNP e tou dernyerman *LDS* in pres ek Seselwa, ki zot annan solisyon pou fer desann kou lavi.

An Fevriye 2022 kou lavi i paret pli o dan Sesel ki zanmen in deza ete. Pri manze in monte,

pri elektrisite ek karbiran in osi monte e pa oubliy pri bis *SPTC*.

Annefe sel keksoz ki pa'n ogmante se ou saler. Zot in menm al pli lwen, koup ou *long service allowance*, koup gratwite anyel ek *end of contract performance allowance* pou bann travayer sekter piblik ki lo kontra *PSC* e pour bann ki pe travay ek pasyan *COVID*, menm zot *allowance* dan serten ka i nepli ganny peye.

Se dan bann moman koumsa, kont gran adversite e difikilte ki vre *Leaders* i sorti, e vin o sekour son pep. Le 22 Fevriye 2022 5er ekek diswar, Prezidan i dir ki i pa kapab fer gran keksoz pour soulaz kou lavi, ki pe pez lo lafanmir Seselwa. Ki kou lavi i an rezulta bann faktor eksteryer e osi akoz logmantasyon dan kou container.

Sel fason pou soulaz nou se fodre annan en logmantasyon saler. En logmantasyon ki dabor zot pann mete dan Bidze 2022, pour okenn travayer sekter piblik. E napa okenn lendikasyon ki pou annan okenn sanzman Polisi pou revwar saler sekter prive an 2022, kot mazorite Seselwa pe travay.

An dot mo, Gouvernman *LDS* pe dir ou demerd ou an

2022, sey mannyer ou kapab e si tou i tonm bon an 2023 i a sey organiz ou.

I annan pe menm ganny dir ki sa i possibleman pou arive nek an 2024. Sa ki pli sagrinan Mr Speaker, se ki Prezidan i debout dan sa Lasanble e dir nou ki mannyer lekonomi pe fer pli byen; ki rezerv pei in ogmante; ki reveni sekter tourism i plis ki an 2019 menm si in annan mwens touris ki'n vin Sesel.

Me kan alors eski ou pou sakouy sa pye pou Seselwa anmas fri? Pa bezwen blyie ki Seselwa ti fer sanzman avek promes pou met larzan dan zot pos e pour zot zwir en meyer lavi.

Sa Gouvernman i prefere grosi rezerv lo ou lasyer, dan plas partaz en pti morso sa larises pou soulaz ou. Zot vwar pep Seselwa, se sa diferans ant nou dan *United Seychelles* e sa Gouvernman kapitalis liberal ‘bef dan disab saken vey son lizye.’ Nou koz lo partaz larises pei, akoz i dan nou filozofi. Nou krwar ladan e zot, zot koz lo sere e anmas larzan.

Mr Speaker an fas a bokou difikilte ki lafanmir Seselwa pe rankontre, mon pe fer en pledwari avek Gouvernman, pou ki zot retourn STC lo son manda orizinel. Nou konnen ki

dan diferan moman zot in annan diferan pozisyon lo swa *SMB*, swa *STC* ozordi. Me ozordi nou pe demann zot pour retourn stabilizasyon dan pri bann komodite de baz, parske san sa *RRP* ki zot pe koz lo la, pou napa gran lefe.

Ou kapab annan en pri ki ou rekomande lo ou komodite, me si pri sa komodite li menm pa stab e i kontinyen ogmante, i reste an deor laporte sa bann ki saler i pli ba e annan mwens reveni kot lakour. Ozordi bokou bann komodite lo lalis komodite de baz zot pri in ogmant konsiderableman, e osi i souvandfwa napa.

Diri *long grain* pri in ogmante, ponmdeter mon pa bezwen koz lo la zot tou zot konnen. La letan nou pe koze la i annan en mank lafarin. Seselwa pe mazinen *what next?*

Mr Speaker Lazans Proteksyon Sosyal atraver son Programm *Social Safety Net* ouswa *welfare* parey bokou i konn li, i sa program ki ti ganny met an plas pou anmenn en soutyen pou sa group pli vilnerab dan nou sosyete. In annan bokou ki'n ganny dir e fer avek sa program, par sa nouvo ladministrasyon.

Ozordi i annan tre pe dimoun ki pe ganny akse avek lasistans *welfare*. Mon konnen

e sa i en fe ki menm serten mon bann koleg lot kote latab, zot fristre avek sa sityasyon, kot bann dimoun merite pa pe ganny akse avek lasistans senpleman akoz lakantite birokiasi kot sa Lazans. Bokou dimoun ki pe ekout mwan la ozordi, zot ava kapab sertifye sa akoz zot in pas dan sa bann leksperyans.

Bann dokiman lo dokiman ki'n senpleman fer zot *give up* dan milye semen, ouswa senpleman viv mannyer zot kapab. I annan ki dir ki Gouvernman in tir labi, i posib ki sa i le ka, me mon krwar ki dan prose tir labi, zot in osi met bokou lobstak ki pini bann ki vreman bezwen.

Ankor la mon demann Gouvernman pou donn sa en pe latansyon, nou frer ek ser ki pe soufer.

Mr Speaker an rezulta logmantasyon dan kou lavi, lefe ki tou lede STC ek Lazans Proteksyon Sosyal, pa pe desarz zot responsabilite efektivman e dan labsans bann *Policy Intervention* par Gouvernman, lensidan lapovrete Sesel pe ogmante.

Dan en diskour sitan enportan Prezidan pa koz ditou lo lapovrete. On dire ki in ganny eliminé depi Oktob 2020. Se

pourtan i en realite Sesel ozordi.

Mon mazin tre byen ki ler zot ti dan Lopozisyon, zot pa ti mank en lokazyon pou koz lo sa *fame* 40poursan lapovrete Sesel. Ozordi mon *challenge* sa Gouvernman pou dir nou ki to lapovrete Sesel ozordi.

Sa ki mwan mon kapab dir zot par kont, i se ki sa ladministrasyon ki ti la avan 2020, in fer bokou atraver bann lentervansyon tre targete ; notaman en logmantasyon dan benefis retret anba Sekirite Sosyal e en reform dan *income tax* kot tou travayer ki son saler ti par anba R8,555 pa pey taks lo zot saler. E okenn saler par lao, en sistèm taks progresiv i ganny aplike.

Se koumsa ki en Gouvernman serye i rod fason pou soulaz e elev nivo lavi son pep. An rezulta sa bann lentervansyon, par 2018, nou ti reisi redwir to lapovrete an relasyon, avek kriter etablir pour en *national poverty line* sorti 38poursan pou arriv 25poursan.

Inegalite dan larises ti'n osi redwir pou vin konparab avek bann pei similer avek nou.

Sa i bann fe e nou, nou ti aktyelman met larzan dan pos Seselwa. En keksoz ki apre tou

sa promes e 16 mwan a latet e Gouvernman, LDS pa ankor kapab fer. Mon enplor zot ankor e mon krwar ki sa i osi rol medya pour konsernen ek lapovrete e pou rod leklersisman.

Mr Speaker, kou lavi, lapovrete avek STC e ASP, i trwa pwen enportan ozordi Sesel e ki pa kapab ganny inyore ozordi ler nou pe fer deba lo Leta Lanasyon, akoz zot enpakte la popilasyon an antye.

Mr Speaker, nou Konstitisyon i garanti nou drwa lozman e nou tou nou konn kantite lenportans ki nou pep, sirtou bann ki pe konmans zot lavi ansanm i atase avek en lozman. Malgre tou zefor pour batir lozman e donn loportinite bokou Seselwa pou vin propriyeter zot prop later e batir zot lakaz, nou realize ki i ankor annan en kantite pou fer.

Malerezman Gouvernman dizour pa ankor dir nou ki son nouveau Polisi lo Later ek Lakaz. Prezidan dan son diskour in senpleman dir nou ki Minis pour fer en deklarasyon devan Lasanble Nasyonal byento. E pa'n war nesesite pour koz pli detaye lo size later ek lakaz e donn lespwar son pep.

Apre 16 mwan dan en manda 60 mwan ouswa pou met li parey Onorab Georges ti

dir atraver ou Mr Speaker, 500zour dan en manda 1825 zour - Letan pe ale. E apre preski 1an ki Minis ti dir mwan isi dan sa Lasanble, ki Polisi lo Later ek Lakaz pe pare dan detrwa mwan, nou pa ankor war naryen konkret.

Nou'n antann serten dir nou ki nou bezwen revwar lafason ki nou fer *social housing*, petet nou bezwen bouz dan direksyon *lower cost housing*. Nou war en pti vilaz lo Ile Aurore ann alan Anse Etoile.

Nou pa vreman konnen ki azanda sa nouveau Gouvernman. An mezir ki zot ankor pe fer letour pe mazinen ki zot pou fer, kabri pe manz salad *comme* dir Seselwa. E la mon pe koz lo bann kabri ki Sesel en pa sa ki pa ankor vini.

An 2021 selman en serten sonm ti ganny bidzete pour finisyon bann proze 24/24/24 konmanse par Gouvernman *United Seychelles*.

An 2022 i annan en finansman pour selman 37 lakaz avek detrwa proze *land bank*, ankor idantifye e konmanse par Gouvernman *United Seychelles*. Pandan sa 2 dernyen lannen, in annan nouveau aplikan ki'n antre lo lalis lakaz ek later.

Eski ou sa aplikan ou kapab prezan mazinen ki pour

pandan 2an in napa gran mouvman dan sa sekter, napa preski naryen ki'n ganny konstri, ki pozisyon sa i met ou? Sa i leta lozman Sesel anba sa Gouvernman. I Leta nou Nasyon.

En dimoun i bezwen koz lo la e non, pa zis fer en deklarasyon siperfisyel e les li koumsanmenm. Sa i fe e i realite!

Si i annan Mr Speaker, en size ki ozordi i lo lalev preski tou Seselwa se sa size pansyon, logmantasyon dan kontribisyon e osi logmantasyon dan laz pour en dimoun tous son pansyon. E la mon pe koz spesifikman lo Fon Pansyon Mr Speaker.

Be si sa i size konversasyon lo *Facebook*, dan travay, dan semen i vedir i konsern nou pep e ki i vo en plas dan diskour lo Leta nou Nasyon. Akoz eski nou reste *mute*? Fon Pansyon wi i kapab donn detay, me i devwar Prezidan pour konvenk e reasir son pep lo en desizyon avek sitan lenportans.

Diskisyon lo pansyon i enn ki bezwen ganny fer tre vit, akoz i annan en kantite travayer deor la pe esper desizyon, pour zot kapab desid zot lavenir. I enportan ki okenn desizyon i ganny anonse boner

e travayer i ganny ase letan notis. I en desizyon ki annan konsekans lo lafanmir Seselwa.

E la Mr Speaker mon napa lentansyon ditou fer okenn politik, akoz mon rekonnet ki kantite sansib sa zafer pansyon i sansib pour bokou fanmir Seselwa.

Bokou ler nou koz lo sa bann sanzman, pa realize ki mannyer i kapab afekte servis esansyel tel konman; - *teaching, nursing* kot mon konnen bokou in deza eksprim zot dezir pou pran *early retirement*, an antisipasyon sa bann sanzman dan Lalwa Pansyon ki pou enpakte negativman lo zot lavi.

An 2022 leta lord ek lape Sesel i donn nou rezon pour annan bokou konsern. To kriminalite i kontinyen ogmante parmi popilasyon e resaman nou pe eksperyans bokou lofans relye avek agresyon, krim kont touris, bokou sityasyon kot dimoun i ganny trouve mor. Byensir drog i reste en problem.

Me mon osi anvi azout en lot problem ki souvandfwa pa ganny koz lo la ditou e sa se bann lofans lanvironmantal. E ki bann lafors lord ek lape pa vreman met ase latansyon lo la.

Nou ankor war dimoun ki pe zet salte par lafnet zot loto anmezir zot pe dray ; dan

larivyer, lo lans, annefe partou kot ou pase e menm bann *bin site* i kontinyen mal ganny servi dan bokou lenstans. Sa i realite e i leta nou pei ozordi.

Mon swete ki bann Lotorite konsernen i donn en pe plis latansyon sa bann diferan kalite lofans.

An 2022 nou ankor pe war britalite par serten eleman dan Lafors Lapolis. Lenstans kot dimoun pe abiy koman sekirite e pe aret nou sitwayen, Tim Sekirite Sekre ki napa koneksyon avek lafors lord ek lape pei pe fer loperasyon dan pei lo nou bann sitwayen.

Tou resaman sa in vin o kler apre ki en zofisyel larme ti donn levidans dan en ka Ankour e *involvement* son tim dan en loperasyon. Ankor mwan enn ki dakor ki i bezwen annan lord ek lape, e ki bann lenstitisyon sekirite i bezwen travay pour sa arive.

Me i annan tro bokou keksoz ki pe arive ki pez lo drwa imen nou pep. Nou ti ganny dir ki sa pou napa Sesel. La tou resaman nou pe konpran ki pou annan en amannman konstitusyonnal pour ki larme i kapab patrol nou bann semen. Eski ozordi an 2022 Sesel i bezwen sa kalite prezans militer lo nou bann semen?

Mon krwar nou bezwen ranforsi lord ek lape me mon pa krwar militer i solisyon.

Servis publik ek travayer Seselwa in a mon'n avi mal ganny reprezante dan diskour Prezidan. I fer letour Lerop e i fer bann rankont ek *diaspora* Seselwa ki i tre byen. Me vitman i fer konklizyon ki sa Seselwa ki Lerop, zot lipye dwat zot i lo akselerasyon lanmen lo volan e pe les dekoke.

Ou sa Kreol ki viv Viktoria, Mahe, Sesel pe eskente, ou lipye i lo fren ou lanmenm gos i lo fren amen. Enn mon zanmi ti dir mwan kote son lanmen drwat i ete Selman mon pa pe kapab repeate Mr Speaker.

Mr Speaker mon pou dir ozordi ki bokou travayer servis publik i fristre avek mank *leadership* ek direksyon. E petet i annan pa pou dakor avek mwan me sa se realite. i annan ki ganny inyore senpleman pour ki zot fristre e kite. Ankor i fe e i realite.

Mon pou osi dir ozordi ki si servis publik i ankor pe fonksyonnen, se pa akoz okenn mirak novo ladministrasyon me set akoz 2 keksoz;

Premye se striktir ki'n ganny met an plas e ki'n fonksyonnen pour plizyer lannen. E dezyenm se gras a sa

bann fonksyonner avek memwar enstitisyonnel ki pe kit *the system going.*

Mwan mon'n en travayer servis piblik pour en pe letan e ozordi mon salye zot. Malgre bokou difikilte.

Par egzanp Mr Speaker Gouvernman in koz bokou lo re devlopman lagrikiltir, me depi ler Lazans Lagrikiltir in nepli egziste legalman, travayer pa ankor konnen kote zot *stand.* E *while* ki in annan en revi saler pour bann travayer Lazans Biosekirite, bann travayer SAA zot ankor pe tourn an ron. Loportinite *training* napa pou *match* sa lelan ki Gouvernman pe dir dan sa sekter.

An mezir ki keksoz pa annord dan lenstitisyon gouvernmantal, gro fermye i profite fer vini gro *container* fri ek legim e touy bann pli pti. En lot legzanp Mr Speaker, nou annan nou en novo Lotorite ki deza pe *operate* e sa se *Seychelles Parks and Garden Authority (SPGA)* me ki son Lalwa pa ankor vin devan Lasamble. Be sey dir mwan lipye lekel ek lanmen lekel ki lo ki bout loto la?

I annan en rezon akoz o debi mon ladres mon'n refer lo labote Sesel, son laverdir, son lans, son lanmer e son biodiversite. Dan diskour Mardi

Mr Speaker in annan en novo dekouvert *mes chères amis* e koleg Onorab. E sa i se ki Prezidan in fek dekouver ki Sesel in fer e pe kontinyelman fer vreman byen dan domenn lanvironnman, losean, Lekonomi Kle e osi domenn *Petite Enfance.*

E atraver ou Mr Speaker Onorab Georges in osi fer en *statement* pou dir ki avan nou ti pe apel nou lekor Sanpyon, me la prezan lemonn i reckonnet nou konman en Sanpyon!

Onorab eski ou onnetman krwar sa ki ou'n dir? Sirtou konman en Manm *Board* enn bann NGO ki pou en kantite letan pe fer en travay formidab lo bann zil elwanye?

Sa i rezulta bokou lannen travay dir par nou bann ladministrasyon, bann diferan partner lokal e enternasyonal. E les mwan fer li byen kler ki depi lontan lemonn i reckonnet nou konman en sanpyon e en *Leader* dan domenn Lanvironnman.

Nou zis bezwen get sa *statement* ki Prezidan in fer lo *Management of water column* dan *Joint Management Area* avek Moris. Dabor sa *JMA* i en lot *first* fer par ladministrasyon oparavan ansanm avek Moris. *Statement* Prezidan i enn ki dapre mon konprenezon pa

legalman korek akoz nou selman annan drwa lo *continental shelf*. Savedir pour eksplor e eksplwat *continental shelf* selman.

Sa *water column* e sa *surface* par lao i ganny konsidere konman *high seas* e napa pei ki kapab ganny drwa eksklizif. Pran letan pour konpran avan konmans pran kredi lo travay zot prosen.

Sa i montre defayans dan preparasyon son adres e ki kontrerman ek *statement* Onorab Georges, Prezidan napa konmann tou son Minister dan son lanmen.

Annefe i pa bezwen konn tou, me sa ki enportan se ki adres lo Leta Lanasyon i ganny sa stati e lenportans ki i merite e ki pa zis fer bann *statement* siperfisyel e sansasyonnel. Sansan i vin zis en lot adres parey bann ki'n ganny fer deryer en *pick-up* dan *carpark stadium* ouswa *carpark* pirat.

I annan sitan keksoz ki demann koz lo la Mr Speaker, ki ozordi pe enpakte lo Sesel e Seselwa. E ki petet letan pa ase. Par kont mon krwar i vo lapenn fer en mansyon lo Ledikasyon parske in ganny mansyonnen e koz lo la par ser ten Manm.

Premyerman nou bezwen koz lo sa zafer *one week in e one*

week out ki ti pe kree en pake problem pour paran e ti pe kontribye pou fer lafanmir vin pli mizer. Paran ti bezwen trouv larzan ekstra pour sa bann letan ki zanfan pa pe lekol, akoz li i bezwen al travay e bezwen kit ser ten sipervizyon.

E la mon apresye ki in annan en revizyon yer par Komisyoner Lasante Piblik. Apre tou lekol prive pe fer li akoz non, pa lekol Leta?

Dezyenmman Mr Speaker mon zwenn avek lezot Onorab pour felisit bann ki'n anmenn bon rezulta malgre bann sityasyon *challenging* ki zot in bezwen etidye akoz koze par *COVID*.

Mon kontan ki zot in profit tou sa ki bon ki sistem ledikasyon in met a zot dispozisyon depi *Petite Enfance* ziska lafen zot parkour dan bann lenstitisyon possegonder.

Malgre ser ten i le fer nou krwar ki zot bann bon rezulta in arriv zis dan 16 mwan. Andizon sa Mr Speaker, mon swete ki zot ava ganny zot loportinite pour pourswiv zot letid dan bann Liniversite Sesel, e aletranze e non, pa asiz dan dout parey bokou ki'n konplet letid e ankor pe espere.

Prezidan in osi koz lo ser ten bann swadizan nouvo

proze ki pe al ganny enplimante. Mon letan dan Legzekitiv i met mwan dan en pozisyon pou konnen ki sa bann proze petet i novo pour son ladministrasyon, me pa novo an term zot konsepsyon.

Mazorite e si pa tou sa bann proze se bann proze ki ti deza lo latab. Son bann Minis pe senpleman enplimant bann proze ladministrasyon avan zot.

Lagrandisman semen, konstriksyon *multistorey car park*, devlopman *Ile Du Port*, Proze *Floating Dock* eksetera, eksetera. Mon dir sa Mr Speaker, akoz mon pa pe war gran zefor par sa ladministrasyon pour anmenn novo nide. E zot ava rapel nou ti ganny dir ki zot annan novo nide e pli bon fason fer.

Pti e mwayenn antrepriz i pa zis moter nou lekonomi, me i osi preski dir 100poursan Seselwa. I bann fanmir Seselwa ki anmezir zot ganny zot dipen, zot osi pouse pour fer sa lekonomi bouze.

Pour preski 2an zot pe fonksyonn anba bann sirkonstans vreman difisil, prensipalman koze par COVID-19. Bokou restriksyon i fer ki zot pa kapab fer biznes dan son plenn potansyel, e alors sa i annan en lenpak katastrofik lo zot reveni.

Bokou i konplent ki restriksyon lo zot i for e ki in ler pour rewwar. Mon pa en eksper lasante ,me mon krwar i annan serten merit dan sa ki zot pe dir. I annan en merit rewwar ki mannyer Lotorite i kapab soulaz zot.

La ankor in annan serten revizyon me leko ki mon pe tande se ki i *still* pa tro kler. Dimoun i kontan in large, savedir tir *curfew* me ki bann kondisyon bann *bars, night clubs* e tou i bezwen *operate* anba la, i osi bezwen pli kler.

Mr Speaker ler mon pe konklir mon anvi pran en moman pour koz lo sa sans patriyotik e lanvi fer pli byen parmi bokou nou bann sitwayen. La mon mazin en natif mon distrik Plaisance Mr Michael Thomas. Pour bokou bann ki swiv li lo medya sosyal enkli mwan osi, nou kapab temwanny son lenerzi pour adres bann size ki pertinan pour nou pei.

I koz bokou lo Tourizm ek Lanvironnman. I fer bokou propozisyon lo ki mannyer nou kapab angaz nou dan bann linisyativ pour promot nou Lendistri Touris. Ki mannyer nou bezwen fer plis pour prezerv nou lanvironnman e nou zimaz konman sa zoli pei

beni. Mon salye li e remersi li pour son kontribisyon.

Dan menm laliny i annan bokou lezot Seselwa patriyotik ki osi fer zot kontribisyon dan bann lezot sekter, me mon santi ki plis Seselwa i devret fyer nou pei e anmenn osi bann kontribisyon pour ki nou kapab fer pli byen konman en pep e en Nasyon.

Mr Speaker diskour Leta nou Nasyon an 2022 a mon'n avi e sertenman pou bokou lezot Seselwa in enn ki'n tre siperfisyel. Serten bann keksoz ki mon'n mansyonnen, mon ti ava swete ki Prezidan ti kapab tous zot pli o profon.

Sirtou bann ki vreman tous sa *core* nou sosyete. Bann keksoz ki ozordi pe vreman annan en lenpak lo lafanmir Seselwa e osi Kominote Biznes Seselwa. In annan bokou parol sansasyonnel pour tir latansyon lo sa bann vre problem.

Me Lepep Seselwa ozordi malgre ki zot pa pe koz lo la, i pe santi li. Nou lo kote sa latab, nou pou kontinyen koz lo sa bann keksoz pa akoz nou en Lopozisyon, me akoz nou krwar ki Seselwa i bezwen ganny le meyer. Nou'n toulstan travay pour le meyer pour Sesel e Seselwa e ozordi i pa sa zour ki

nou pou arete. Lalit i kontinyen. Mersi Mr Speaker.

(APPLAUSE)

MR SPEAKER

Mersi Onorab. Nou ava pran poz la e nou ava repran 11er. Mersi.

(BREAK)

MR SPEAKER

Byen nou ava kontinyen avek entervansyon Onorab Rosie Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour tou Onorab. Bonzour tou dimoun ki a lekout. E en bonzour spesyal pou tou zabitant Pointe Larue. En distrik kot mon pe reste.

Mr Speaker mon ava profit lokazyon letan mon'n ganny mikro la pou mon de pti parol avan ler mon kontinyen avek mon mesaz.

Mon pou *welcome* enn mon koleg, en fanm for ki ti dan sizyem Lasanble. E la in retournen dan sa setyenm Lasanble. *Welcome* Onorab Flory Larue. E mon konnen ki ou pou anmenn gran kontribisyon dan Lasanble.

Mon pou osi remersi en lot Manm ki ti deza Manm dan

setyenm Lasanble. Onorab Jany Letourdie, ki li osi i ti en fanm parey mwan - en fanm for. E mon konnen poudir son kontribisyon valer in ganny apresye.

E mon pou osi - koman en zabitant Point Larue Mr Speaker, mon osi anvoy en pti mesaz de gerizon pou mon koleg Onorab Conrad Gabriel. Mon pou dir li *get well soon* Onorab. Nou ava war ou byento dan Lasanble. Mersi.

Premyerman, Mr Speaker, mon pou senpatiz avek fanmir bann Zabitant Pointe Larue ki'n perdi zot pros pandan lannen 2021. Sirtou bann ki ti vin viktim *COVID*. Mon'n toultan prezan akote zot ek lapriyer sirtou a kote dan zot soufrans.

Mr Speaker, mon kontan sa refleksyon ki nou Prezidan in anmennen dan son ladres Leta Lanasyon lo Tranzisyon. Wi Ladministrasyon Gouvernman *LDS* i annan zis 16 mwan.

E apre ki in ganny elekte par lepep, in travay pour lepep san restriksyon dapre moto manifesto ti dir 'Sesel pou tou son Zanfan'.

Tranzisyon i en prosesis psikolozi e emosyonnel li menm ou en group ki re oriyant zot lekor pou zot fonksyonnman. E

war vre sinifikasyon dan sityasyon ki'n sanze.

Pandan sa peryod 16mwan, tranzisyon i pa'n fasil pou Ladministrasyon Gouvernman *LDS* pou de rezon prensipal Mr Speaker;

Premye i en peryod ki ti annan sanzman politik dan pei. Dezyenm lepidemi *COVID* ti tap Sesel pli for. E amenn bokou restriksyon Nasional e enternasyonal. Transformasyon i parey en senir ler in fer transformasyon pou vin en papiyon. Pour tranzisyon positiv arive, i bezwen annan transformasyon.

Transformasyon i en letap ki kapab pran swa en pti git letan, si serten resours ki bezwen i la. Pou fer sir ki pou annan sanzman.

Me si napa resours sirtou materyo, larzan, imen, transformasyon i pran pli lontan e menm *des années et des années*.

Sa i parey en dimoun ki'n pran en *loan* pou fer en lakaz konpare a en lot dimoun ki pa'n pran *loan*. Me in fer son lakaz dousman, dousman avek larzan ki i annan dan son pos.

Mr Speaker, dan konteks politik, Prezidan Ramkalawan in fer son deba Leta Lanasyon lo tranzisyon pandan sa 16 mwan.

Mon pou dir li wi Prezidan, malgre ladministrasyon in resevwar en kales kase, e en kof vid, avek ou direksyon koman Prezidan ou'n fer sir ki sa transformasyon in anmenn benefis pou Seselwa. E nou pei Sesel pandan sa 16 mwan.

Malgre lopozisyon ti'n anvi ki transformasyon 16 mwan i vin en transformasyon ki la valer 43an. Sa i pa pou zanmen posib.

Mr Speaker, tranzisyon pandan en lepidemi *COVID* i pa fasil. Mon frer ek ser Seselwa i konnen ki pandemic *COVID-19* in anmenn en gran defayans dan nou system ekonomik.

Sa i pa zis Sesel me dan lemonn antye. *COVID* pa ni Ladministrasyon LDS ki ti anmenn Sesel. O kontrer, sa novo ladministrasyon in vin zeritye sa lepidemi depi Oktob 2020.

Dapre rapor Labank Santral 2021 lo Developman Ekonomik Mondyal. Ki ti ganny pibliye le 11 Zanye 2022, i ti dir ki krwasans ekonomik global i pou kontinyen desann pou sa prosen 2an. Ki pou vin en vre menas.

Sa i koze par diferan varyan *COVID-19* ki pou ogmant lenfeksyon. I pou ogmant det. I pou ogmant

inegalite reveni dan tou pei an menm tan.

Krwasans ekonomik in ganny eksperyanse pli for an 2021. In desann plis par 5.5 poursan pou ariv 4.1poursan an 2022. E sa tandans pou desann par 3.1poursan an 2023.

Alor sa rapor i osi fer konnen ki wi, sa varyan *Omicron* in propaz vit pandan *COVID-19* pou kontinyen afekte aktivite lekonomi a kour term dapre *Global Economic Project Reports*.

Pou bann pti pei parey Sesel, bann pti pei *SIS*, *Small Island States* parey sesel. I pou pran en kantite letan pou li kapab remont lo son nivo.

Mr Speaker, avek sa prediksyon par bann *expert* dan lekonomi, nou tou nou konnen ki lenflasyon i anmennen. I pou met en gran defi dan Polisi Monneter.

Sirtou deviz etranzer ki ti monte lannen pase, en Dolar ki ti kout R12 a R14 ti monte pou ariv R22. Sa defi dan nou lekonomi in tap Sesel tre for, akoz nou lekonomi i depann bokou lo tourizm. E preski tou pei ti'n ferm zot laport. Sirtou zot frontyer. Sa tranzisyon dan nou lekonomi ti fer ogmante pri lavi konsiderableman. Sirtou pou nou bann ser ek fre ki

ganny en lapey pli ba. Annou mazinen ki lenflasyon i kapab fer ozordi.

Pandan letan ki Prezidan *LDS* ti pe kalkile, Met enn ek enn ansanm ki mannyer i pou kapab fer 2 bout zwenn pou recover nou pei, pou re ouver nou laport osi avek lemonn. Lopozisyon ti pe kriy "Lockdown!"

Me nou Prezidan, en zonm kouraze e beni, in fer lekontrer kot in met aksyon stratezik pou benefis Lepep Seselwa.

Mr Speaker, dapre tablo ouswa *Dashboard* rapor global pou *WHO*, pibliye Fevriye 2022, maladi *COVID* in enpakte preski tou pei ou teritwar dan lemonn enkli Sesel.

I annan 431milyon ka konfirmen par *COVID* dan lemonn. Sa i osi enkli 6 milyon lanmor. *WHO* in osi konfirmen ki e total 11 milyon dos vaksen in ganny administer globalman.

Sa in fer ki tou sistenm lasante dan lemonn in deborde par la kantite ka ki'n ganny rapporte enkli Sesel.

WHO in fer nou rapel ki menm pei ki pli ris, ou bann ki pli byen prepare, zot sistenm in vreman lite pou fer fas avek sa bann gran defi kris sanniter.

Bann pei ki pli vilnerab, de milyon e de milyon dimoun pa'n ganny akse avek swen lasante

debaz, sirtou kot i konsern latizann e menm materyo pou *PCR* ou tes reaktiv, pli grav ankor, respiratwar.

En komodite ki pa ti aksesib preski ditou dan sa bann letan sa bann pei ki pli vilnerab.

Me isi Sesel nou Prezidan in fer sir ki tou pasyan in ganny akse avek latizann e akseswar medikal baze lo zot merit endividyle.

Malgre tou, lemonn enkli Sesel in war en pti lalimyer dan sa bout tinel. Kot en kantite kalite vaksen in ganny aprouve e met an servis. *WHO* osi in dir ki 10.6milyon doz vaksen in ganny administer dan lemonn.

Malgre tou son defi, nou Prezidan in fer sir in anmenn sa tranzisyon dan lasante tre efikasman. Malgre ki tou pei in ferm zot frontyer. Malgre serten group nou popilasyon ti'n soufer, spesyalman bann ki'n perdi zot pros avek maladi *COVID*, nou pei in kapab fer sa tranzisyon avek efikasite sirtou dan sa bann domenn swivan, pou asire ki nou dimoun i ganny akse avek servis.

Enn, ti annan kreasyon fon *COVID* pou kontribisyon volonter. E depans ki'n ganny fer anba la, i ti ganny fer pou permet Minister Lasante aste lekipman, fournir medikal tel

ki respiratwar, reaktif pou tes *PCR*, ou tes rapid.

Lenz ou lekipman pou proteksyon travayer lasante ; Rekritman bann *staff* ki an deor Minister Lasante pou *contact tracing*, vaksinasyon ; serten kantite vaksen ; *fridge* pou stok vaksen.

Latant lwe ki ti gout ser ti ganny ranplase par lezot kalite atraver donasyon ou aste mwen ser par Minister lasante.

Enstalasyon en zenerater loksizenn Lopital Perseverans. Kontribisyon fasilite medikal pou pasyan ki dan sityasyon kritik. E sa ti ganny fer zis dan 17 zour. Reform dan latant medikal Perseverans.

Mr Speaker, sa rapor *WHO* lo devlopman ekonomik mondyal, bann pwen tre pertinan lo priyotiz vaksinasyon en pep.

Pou lemonn asire ki pandemi *COVID* i ganny met anba Kontrol e anmenn rekiperasyon dirab dan devlopman finansyel, pou asir krwasans ekonomik pou sa 2an ki pe vini.

Lenportans kolaborasyon miltilateral ant bann pei koman en swa ki tou Sef Deta i devret pran an konsiderasyon. Sa i ti ganny sorti dan sa rapor.

Priyorite imedya tou pei ki bezwen fer sir ki vaksen i ganny

de plwaye pli larzman, dan en fason ekitab pou control sa lepidemi.

Lot keksoz ki sa rapor in koz lo la, pei i siport lezot pei, bann ki pli vilnerab, pou asir soustenabilite dan lekonomi.

Alors Mr Speaker, vi ki Sesel e en pti Pei Souvren. Ladministrasyon *LDS* in fini prevwar dan son Manifesto, paz 10, ki son preanbil i koz '*Getting Seychelles Past COVID - 19. Safety and Economic Recovery*'.

Lopozisyon pe kestyionnen akoz Prezidan pe voyaz tro bokou? Prezidan in lir sa rapor stratezi. E in konpran byen son bann rekomandasyon ki *WHO* in pibliye.

Akoz Sesel napa ase larzan pou aste vaksen e lezot komodite neseser pou nou pei pou konbat sa lepidemi. Malgre isi Sesel nou annan bokou koko, me i napa ase pou nou fer lekonomi kot koko i anmenn reveni dan Sesel.

Alor mon bann frer ek ser, Prezidan pa'n reste anba sa bann pye koko e kriy lasasen, kan nou pei ti bezwen led. Si i ti reste anba sa bann pye koko, koko ti pou kas son latet ler i ti tonbe.

Alor Mr Speaker, Prezidan i bezwen al rod led, negosye avek bann Lazans

internasyonal pou met an mars sa Korperasyon Miltilateral. Sankwa nou ti pou fouti.

Alors Mr Speaker, sa bann vizit dan pei ki Prezidan pe ale, pandan sa tranzisyon pandan sa 16 mwan. Sesel in parmi bann premye pei Lafrik pou ganny donasyon vaksen avek diferan pei ki pli ris ki nou.

E sa in ganny sans. In ganny osi in kapab ganny aste ouswa ganny donasyon pou lekipman medikal, pou sirmont lepidemi *COVID-19*.

Sesel in osi ganny rekonnet avek diferan Manm Leta koman en Sanpyon dan sanzman klima e lezot ankor.

Ozordi mou fyer pou dir ki nou pti pei Sesel in depas en kantite pei dan lemonn dan vaksinasyon son pep. Menm si lopozisyon ti dir ki Sesel pe donn vaksen ki pa ankor aprouve par *WHO*, eski sa i pa en gran transformasyon dan nou repons sanniter *COVID*?

Me zot menm zot, zot *Leaders* in menm senm lafreyer parmi nou popilasyon, pou dir zot pa al pran vaksen, me solman zot menm zot ek zot fanmir in al pran sa vaksen anba, anba.

Sa i vedir zot osi zot in fer transformasyon dan zot *mindset*, me zot pa le pibliye.

Dapre Rapor Minister Lasante le 24 Zanvye 2022. Vaksinasyon kimilativ kot *COVID-19* in konplet depi premye doz ziska trwazyenm doz, i *comme* swivan; 85 poursan in pran premye doz vaksen. 80 dezyenm e 34 poursan in pran *booster dose*.

Mr Speaker, malgre kritik lo nou sistem lasante, mon santi ki parfwa nou bezwen donn solisyon. Pandan sa tranzisyon laplipar travayer lasante in ganny deploye otomatikman, pou donn en koudmen dan zot lekspertiz dan programm *COVID*.

Wi, nou konnen nou napa ase profesyonnel lasante. Sa i fer ki i annan serten defayans dan servis. Sa problem i pa zis Sesel, i dan tou pei lasante dan lezot pei.

E alor Minis Lasante in bezwen fer serten evalyasyon pou get problem dan fonksyonnman tou sistem pandan kris sanniter.

Boner lannen pase nou ti war en lodit entern dan laboratwar. E sa in amenn rezulta ki' n permet Minister Lasante revwar son bann Protokol ou stratezi operasyonnel.

En lot odit ti ganny fer dan *system Procurement Unit* pou tes laboratwar. Kot STC ti

ganny manda pou aste sa bann latizann, pou fer vini sa latizann ou komodite medikal. Sirtou reaktif pou tou tes laboratwar ler sa odit pe ganny fer.

Dan sa parkour STC in retir tou sa bann *middlemen* dan sa prosesis. E Gouvernman in fer en profi R1milyon. Zis avek tes reaktiv pour laboratwar.

Wi sa i donn nou lespwar ki pandan sa 16 mwan in annan transformasyon dan sa tranzisyon. E nou pe demande ki en odit i kontinyen ganny fer dan lezot Minister.

Mr Speaker, *COVID-19* in vini e mon konnen i pou ale. I annan lanmertim. In amenn soufrans. In amenn pert lanplwa, me osi in amenn serten pozitivite.

En lot transformasyon ki'n arive dan sa 16 mwan ki nou pep in bezwen adapte avek, se telekomunikasyon. Sirtou kot i konsern model kot lemonn antye osi in bezwen adapte.

Sa i vedir ki parti *LDS* i en parti ki vizyoner ki son Manifesto in ekrir ladan; 'Lekonomi servis nimerik koman frontyer pour biznes'.

Mr Speaker, sa in donn loportinite tou dimoun pou komunik ek kanmarad. Fer *meeting*, laprantisaz a zistans, san ki en dimoun i bezwen

deplase. Sa in koup depans pou fer redwir kou transportasyon par en lendividu ou lorganizasyon.

Sa sistem ouswa sa model, In osi donn loportinite pou donn plis bagaz *maximum* travayer ou *staff*. Laprantisaz a zistans in vin dan nou lofis, dan nou lorganizasyon, dan nou lekol e osi dan nou kominote.

E mon konnen ziska konmela lamazorite bann dimoun aze, bannla pe pey zot *bill online*.

Manifesto *LDS* i osi asir ledikasyon nou zanfan atraver son *motto*, 'Ledikasyon, i lakle pou ouver tou laport'. Nou bann zanfan lekol malgre zot bann, zot pa'n kapab kontak fizik avek zot bann ansenyen, Minister Ledikasyon in met an plas en sistem ledikasyon ibrid, efikas, kot nou bann zanfan in kapab fer laprantisaz enteronpe.

Son lefikasite in ganny demonstre dan rezulta legzanmen *IGCSE* Nasyonal, kot nou bann zanfan in fer byen. Sa in reelekte dan tou distrik. Sirtou dan distrik Pointe Larue. Sa distrik kot mon reste. Mon pran sa lokasyon pou felisit Ms Anorah Renaud sorti Lekol Segonder Pointe Larue. Ki'n sorti koman etidyan pli egzanpler dan rezulta

legzanmen *IGCSE* avek 7 (3As) pou Sesel pou lannen 2021. *Chapeau* pou son paran.

Mon osi pran sa lokasyon pou felisit tou ansenyan sirtou bann ansenyan Pointe Larue, pou zot devosyon pou asir laprantisaz tou nou zanfan Seselwa pandan lepidemi.

Mon konnen i pa ti fasil pou fer sa tranzisyon, pou fer bann zanfan adapte avek sa transformasyon pandan sa tranzisyon.

Mr Speaker, Prezidan in donn nou osi en kontrandi lo nou rezerv finansyel, pandan sa 16 mwan. Menm ki kof in vid, sa novo ladministrasyon in fer sir ki sa kof pou en zour pou ranpli.

Zis 16 mwan nou rezerv in monte. Sa pa'n zanmen arive oparavan. Gran mersi nou Prezidan avek son lekip pa'n ekout sa bann gogot pou *lockdown* e ferm pei a larestan lemonn.

Zis mazinen, pandan lannen pase, 4mil touris in vizit nou pei, sa i en sif pli o ki lannen 2019. Sa in anmenn en gran valer pou travayer dan domenn tourizm e osi dan lekonomi. Kot nou komans war son benefis.

O kontrer, sa Ladministrasyon *LDS* in fer son mye pou fer sir ki tou Seselwa i

ganny en lapey a lafen di mwan. E fer reform dan Lazans *ASP* pou lasistans sosyal ki pli byen organize pou bann fanmir, ki ti pe pas dan difikilte finansyel. Sirtou bann ki'n perdi zot lanplwa akoz biznes tourizm pa ti pe fonksyonnen.

Nou konnen ki pri lavi i en konsern. Me Mr Speaker, pri lavi pa fek vin ser an 2021. Nou tou konnen ki sa 40poursan lapovrete i en sif ki lopozisyon ler zot ti dan Gouvernman zot in trenn, trenn lipye lo la. E prezan ler zot in antre dan lopozisyon zot oule vin pli katolik ki Lepap. Me zot o!

Mr Speaker, ziska ozordi Lopozisyon pe kriye ki dimoun pe mor lafen. Me zot pa dir Lepep Seselwa ki mannyer zot pou kapab fer desann pri lavi.

Les mwan dir zot ki in annan transformasyon avek levidans ki pandan sa tranzisyon, mon'n fer en pti letour e mon'n get bann pri komodite.

Enn, avek lentrodiksyon *RRP*, *STC* in fer sir ki komodite de baz in reste en pri abordab. E tou laboutik dan Sesel enkli, Pointe Larue, Port Glaud, Anse Royale, Baie Ste Anne e osi La Digue. Sa bann komodite i a laporte tou zabitan.

In annan lezot komodite ki pri in osi desann avek Dolar ki'n

desann R14. Mon'n fer en pti devwar pou pas dan bann laboutik lo Mahe, e fer en analiz lo pri serten marsandiz ki annan rediksyon lo la.

Premye, *frozen chips* 2.5 kilo, la pli par bann *take away* i aste. In sorti R100 e in vin R75. Ladan in *minus* R25, en rediksyon 33poursan.

Dile *Regilait* 700 gram. Ti R198 e vin R158. E sa i en rediksyon 33 poursan ler R40 in ganny tire lo la.

Dile *Lacnor* 1 lit ti R27 e in vin R20. In ganny tir R7 lo la. I annan 35 poursan rediksyon.

Lapoud lave *ABC* 1.2 kilo. Sorti R43.55 e vin R34. In tir R9.75 lo la. En rediksyon 28 poursan.

Lapoud lave *ABC* 2.5 kilo sorti R65.75 pou vin R52. In tir 13.50 lo la. En rediksyon 26 poursan.

Lapoud lave *ABC* 5 kilo prezan, sorti R198 in vin R167. In tir R21 lo la. En rediksyon 18.5 poursan.

Savon bennyen *Palmolive*. Sirtou ki sa bann msye la i kontan. Sorti R18.50 in vin R12.50. In tir R6 lo la, i annan 48 poursan rediksyon.

Wipes pou pti baba, *Huggies*, sorti R39, in vin R26. In tir R13 lo la. En rediksyon 50 poursan.

Hollanda yeast ek lelven. La nou fek pe dir lafarin. Be la mon krwar parey mon pe dir bann boulanze. Lafarin napa lot kote in dir. Bann boulanze i kontan servi lelven pou fer monte dipen. E in ti R74.75, in vin R52. In tir R22 lo la. En rediksyon R43.75.

Mr Speaker, be sa i pa en laprev ki Ladministrasyon Gouvernman *LDS* in ekout Lepep Seselwa pou fer desann pri lavi pandan sa 16 mwan?

Sa i zis 9 komodite. I annan ankor plis lo letazer dan tou magazen. I annan ankor ki pou desann si sa lager dan *western block* i arete.

Sesel i annan en marse lib kot sak enportater komodite i fer son pri apart bann ki lo *RRP*. Pandan sa letan olye kritike, lopozisyon zot ti ava pran sa Loportinite pou donn koudmen met latet ansanm pou deside ki mannyer solisyon pou fer desann pri lavi.

I annan serten group ki ti pey R500 par dimoun pou desann kot Lorloz pou al kriye ki "zot lafen!" Menm sa lide donn *breakfast* pou tou bann zanfan lekol ti ava ede. Me, malerezman sa in mor an nesans.

Mr Speaker, dapre Minister Lasante, napa okenn Lopital ki bann dimoun ki'n

mor in ganny deklare koman levidans, ki zot in mor avek lafengal. Petet i annan en lot landrwa ki sa bann letopsi ti ganny fer, mon pa konnen. Si i annan les nou konnen, Lotorite License i ava kapab donn zot en license.

Mr Speaker, “Sesel pou tou son zanfan” i en slogan ki senp me fasil. Me i dir pou li menm. Se nou ki zanfan Sesel. Si nou tou nou zanfan Sesel, nou devret protez li. Nou devret pe *cheri* li. E nou bezwen konstrir li, promot li. Ki a lafen nou ganny sa benefis ki Sesel i ofer.

Dapre Manifesto LDS, pou Sesel kapab fleri e aport fri pou tou son zanfan, i bezwen Linite Nasyonal pou amenn larmoni, lintegrasyon parmi en Nasyon miltikolor, anmenn stabilite nasyonal.

Bon gouvernans, pou amenn bon performans avek lefikasite dan servis. Fer sir pou napa koripsyon.

Loportinite pou tou Seselwa ki *the sky* i son *limit*. Lazistis kot *nobody is above the law!*

Alor Mr Speaker, si Sesel i pou tou son zanfan, tou son zanfan i bezwen pran son responsabilite, pou fer sir ki Sesel i bouz pli devan ! Tou son zanfan i bezwen fer li zot devwar

baze lo zot leksperyans, spesyalite e konesans pou donn en servis pli efikas dan tou landrwa travay.

Prezidan in fer sorti ki en serten group dimoun dan servis piblik zot ankor pe trenn lipye. Sa manni trenn lipye i pa en keksoz nouvo. I en vis ki byen rouye, marto menm pa pou kapab ede.

Zabitan Pointe Larue in dir mwan fer sorti ki serten staff dan serten Minister, zot pa zis met lipye drwat lo fren e lanmen gos lo fren amen. Me zot osi met zot latet lo volan kot zot pa war naryen devan zot. Zot in ganny anglouti avek sa zafer “ek nou pa ek nou.”

Sanmenm sa group dimoun ki ti fer zot vir an ron dan lepase. Zot ankor la dan serten pozisyon e ankor pe fer zot vir an ron ozordi. Zot donn dimoun lapwentman apre zot al konze. Zot esper larepons pou en size pou plis ki enn e *de mwan - 2 semenn. E menm annan de fwa i arive ziska 6 mwan.

I annan parmi zot ki annan sitan lolas pou dir avek bann group dimoun, “pa ou ti tik anler e demann sanzman, al rod sa ki ou bezwen kot ou ti tik anler !”

Mr Speaker, pou annan transformasyon efikas dan

servis piblik, sa propozisyon ki *DPA* i fer sa evalyasyon performans pou tou travayer dan servis piblik. i ava ede pou tir plis sa bann ponmdeter ki ti'n pouri parmi sa bann ki ankor fre. Apre zot a dir ki zot in ganny pouse pou met nou bann dalon aktivis *LDS* dan zot plas.

Mr Speaker, pandan sa 16 mwan, nou'n war plizyer sanzman dan tou sekter, ki'n osi tous tou distrik pou benefis en kominote. Pointe Larue sa distrik kot mon reste, in osi annan serten transformasyon menm si lepidemi *COVID* in ronz sa distrik.

Pointe Larue in ganny en vilen zimaz pandan 43 an. Sa se ler lapli i tonbe i annan linondasyon. Delo dan lipye, delo dan lakaz, delo dan lekol, delo dan laboutik menm delo dan loto lo semen.

Me in annan en gran transformasyon depi 2021. Delo in nepli deborde lo semen. Zabitan in dir mersi SLTA pou konstriksyon sa pti drenaz tre senp Anse Dejeuner. Kot delo i devid dan lanmar ouswa dan lanmer ler lapli i tonbe.

Zot osi felisit *LWMA* pou travay ekselan pou debous sa bann rigol lo en plan tre regilye anba supervizyon strik nou *DA*. Ki fer sir ki sa plan i tre aktiv.

Sa i de mezir a kour term ziska ki Minister Transport i ava finaliz sa proze *third lane*, Point Larue.

Adisyonnelman anba proze *flood mitigation*, serten travay in konmanse depi lannen pase deryer lekol Pointe Larue pou elarzi lanmar. Ogmant drenaz pou pran plis kapasite delo ler tou rigol in deborde. E alors sa i kapab donn en plas ler lapli i tonbe pou li pa annan sa linondasyon.

An Zen 2021 Prezidan ti ouver *Anonymous Housing Estate*, Anse Dejeuner. Kot 24 fanmir in benefisye.

En fanmir Nageon Estate in benefisye anba redevelopman lakaz. Redvelopman lakaz.

De fanmir vulnerab in benefisye avek modifikasyon zot twalet ek lakwizin.

Lalimyer in ganny ranplas. 15 novo lalimyer in ganny mete dan tou sou distrik kot zabitan in demande.

Pti semen transpor Nageon Estate in ganny fer. Aranz semen Nageon Estate ti en priyorite.

Crash barrier ti ganny mete Matata, Anse Faure ek ex-Mellan.

Kous koltar anba tanmaren, Semen Adela, novo kous koltar kot bus stop lekol.

Bin adisyonnel dan tou sou distrik.

Travay volonteer kot lekol segonder e *Old People's Home*. Koup pye dibwa ki ti en menas pou zabitan.

Sa bann pti peron kase ki annan plis ki 50 mars in ganny repare.

Bann zabitan Pointe Larue pe esper sa devlopman dan sa proze 2022. Sirtou parey mon'n dir sa *third lane* pou redwir en pe. Elimin en pe sa sityasyon kot trafik i annan dan *peak hours*.

Avan terminen, Mr Speaker, mon ti ava kontan remersi ou menm ou Mr Speaker. Avek tou *Leaders LDS* dan Lasanble pou zot siport ek gidans. Mersi tou mon bann koleg *MNA* pou zot sipor.

Mersi staff Lasanble pou donn mwan ek mon *Clerk* en bon pe sipor moral.

Mersi tou bann Minis pou zot sipor, espesyalman ler mon'n tap zot laport pou benefis kominate Pointe Larue. Malgre i annan zot zofisyé zot latet i ankor lo volan.

En mersi spesyal pou tou bann *staff* dan servis esansyel Point Larue ki'n donn zot letan pou konbat. Espesyalman dan Minister Lasante. Sorry. Pou ki zot in kapab met sa *COVID-19*

an kontrol. Spesyalman staff lasante.

Pou bann ki'n ede menm si zot pa'n kapab pran zot konze ouswa zot in dan retret. Zot in sakrifye zot letan pou zot kapab ranforsi mendev dan sistem lasante. Mersi osi tou bann ners dan Sesel.

Mersi tou bann personnel dan *uniform* sirtou Lapolis pou fer sir ki Lalwa i ganny mentenir pou kontrol lepidemi *COVID-19*. E osi mentenir lord ek lape parmi kominate Pointe Larue.

Mersi tou bann zabitan Pointe Larue ki'n fer mwan konfyans. In fer konfyans ek mon ek mon e mon *Clerk* par ed nou dan nou parkour pandan sa 16 mwan. Mersi pou tou zot sipor. Fotespere sa travay ki nou'n fer i ava kontinyen pou sa prosen 4an si pa pli byen ki sa.

Mersi nouvo *DA* Vesna Gertrude, ek ou tim ki byen konpetan. Pou anmenn sa stabilite e enklisivite dan Biro Ladministrasyon Distrik.

Sa in fer plis zabitan frekant sa biro. "Ek nou pa ek nou" in fini dan Point Larue. Mersi pou aksepte mon kontribisyon avek lebra ouver pou promot program dan distrik Pointe Larue pou benefis kominate.

Mersi pou envite mwan ek mon *Clerk* enn fwa par an dan *meeting* konsiltativ avek Onorab Gabriel. Ansanm nou bezwen fer Pointe Larue bouze.

Mersi sa biznesmenn ki'n donn nou *sponsor* pou ravityman bann tim foutbol Segonder Point Larue tou le Vandredi.

Mersi sa biznesmenn pou siport tou nou bann zabitan ki vilnerab.

Mersi pou sa biznesmenn ki fer konstriksyon pou sa lale pou rann lavi sa zabitan otreman kapab pli confortab.

Mersi Tim Brigad pou reponn lapel tou nou bann zabitan dan moman difisil. E a lafen mon pou dir mersi Daniella Arissol, mon *clerk* pou ou sipor total. Menm si nou napa en lofis, teren pa'n zanmen fer nou per. Nou lofis i kot lakor tou dimoun dan kominate Pointe Larue.

Mr Speaker, pou terminen. Pou sa ki pa'n war.

MR SPEAKER

Onorab ou *overtime*. Terminen silvouple.

HON ROSIE BISTOQUET

One second Mr Speaker. Pou sa bann ki pa'n war okenn transformasyon pozitiv pandan sa 16 mwan, sirtou kot i

konsern transformasyon dan sa tranzisyon.

Pou tou bann kretyen ki'n swiv lanmes dan Legliz Katolik dan Sesel, Dimans le 27 Fevriye, levanzil Zezi Kri dapre Sen Lik. Sa mesaz i pou tou bann ki pa'n oule krwar ki i annan sanzman.

Sapit 6 vers 9 a 45 i lir koumsa, "akoz ou war lapay dan mon lizye mon frer, me ou pa war sa poto ki dan ou prop lisye? Ipokrit, tir sa poto dan ou lizye avan, ou a war ki mannyer ou pou kapab tir sa lapay dan mon lizye." Mersi Mr Speaker.

(APPLAUSE)

MR SPEAKER

Mersi Onorab. Nou ava pran entrevansyon Onorab Andy Labonte.

HON ANDY LABONTE

Mersi Mr Speaker. Bonzour Mr Speaker. Bonzour tou Manm koleg Onorab. E en bonzour vreman spesyal tou zabitan La Riviere Angaise.

Mr Speaker, permet mwan fer referans avek sa lekritir sorti dan en liv Sakre. Saint Paul dan son premye let pou bann *Corinthiens* sapit 12 vers 4 a 11 i koz lo bann diferan don spirityel me en sel lespri. Plizyer fason servi li, me en

menm Senyer. Plizyer sort aktivite, me en menm Bondye ki prodwi tou dan zot tou.

E dan sapit 12 vers 12 a 30 Saint Paul i koz lo en sel lekor plizyer manm. Me tou sa bann kantite manm, i form en sel lekor. Diferan fonksyon me personn pa kapab sampañs kanmarad, akoz zot tou ek zot diferan fonksyon zot bezwen enn a lot pou konplet sa lekor.

E i osi al pli lwen pou dir ki dan en legliz sakenn i annan son don, sakenn i annan son plas me tou i enportan.

Alor, ler mon ekout Prezidan Ramkalawan delivre son *speech SONA* le 22:02:2022 mon vwar ki Gouvernman *LDS* i anvi ki tou Seselwa i vwar son plas e son fonksyon dan sa nouvo Sesel.

Me wi nou tou nou Seselwa e si nou fonksyon parey en sel lekor nou pou pli konpran akoz ki pei i bezwen tou son zanfan me pa divizyon. Nou pa kapab fer ditor nou pti Sesel.

Parey Prezidan in dir sa i apel nou pei sa. Alor annou fyer pou annan en zoli pei beni, e annou ede pou re-batir li, e konstri en Nasyon ki ini.

Seselwa, Prezidan in dir sanzman in fini arive dan Sesel depi Oktob 2020. E se mazorite pep Seselwa ki ti deside, ler nou

ti donn *LDS* sa gran laviktwar e kot pou la premye fwa, en Prezidan Sesel i konmans son manda dan en fason demokratik, par bwat vote. *NON*, pa avek fizi oubyen, pas baton. E sa i listwar, nou bezwen aksepte kontan pa kontan.

Prezidan in fer kler ki la pares, koripsyon, drog, vyolans, rimer, mansonz e tou negativite, napa plas dan sa transformasyon pou nou pei, me plito bann bon valer parey travay dir, respe pou Lalwa. E respe pou drwa tou sitwayen.

Menm pour bann dimoun ki an detansyon ki bezwen *fresh air* ek soley, in konfirmen ki tre byento dan sa transformasyon e respe pou drwa imen, nou pou ganny en vre sant rimann ki pou lo standar enternasyonal. Malgre ki pandan 43an parti minoriter ki ti o pouvwar pa'n zanmen pran kont e arive konstri.

In osi koz lo lenportans ki tou le trwa lebra Gouvernman i merit travay kot-a-kot dan lentere pei. Malgre nou manda e nou fonksyon i diferan.

Prezidan in menm koz lo lenportans e rol enportan ki medya ki ganny konsidere konman sa katriyem lebra Gouvernman, i annan dan sa transformasyon kot bann

lenformasyon ki nou bann zournalist i transmet avek popilasyon i merit kredib. E sa i ava ede ki Seselwa i antas li avek laverite me pa mansonz.

Mon Prezidan, nou Prezidan e i osi zot Prezidan in dir si ou anvi al vit, al ou tousel, si ou anvi al lwen, annou al ansanm. Wi Msye Prezidan nou pou mars ansanm e nou pou al lwen bokou plis ki sa 5an. Me pa akoz sa, ki Onorab Sebastien Pillay atraver ou Mr Speaker i bezwen koz mansonz e dir ki byento manda Prezidan pou vin 7an.

Prezidan in dir ki byento pou annan en Prozedlwa ki pou met en dat *fixed* pou eleksyon. Onorab Pillay in osi dir ki zot pa ganny envite *State House* me ler i envit ou lo Komite *Platinum State House* ou refize. La lekel ki pe koz mansonz? Konm dir marmay. Serye ou epe *LOTO*!

Fodre pa ki nou oublie ki se Prezidan Ramkalawan ki'n lager, ki ozordi tou dimoun i annan laliberte lekspresyon malgre ki Onorab Vidot in dir ki i en drwa konstitisyonnel.

Alor akoz fodre kasyet deryer bann non barok ou bann non adopte lo medya sosyal? In fer nou konpran ki fodre nou mars dan lalimyer.

Prezidan in met bokou lenportans lo la spirityalite, e pa

bliye dir mersi. I ti menm dedye *weekend* ki'n pase koman en weekend Aksyon De Gras. Akoz par lagras ki nou'n ganny sove me pa akoz imen i parfe.

E zis Bondye Papa ki pou kapab ed nou e nou pei dan sa transformasyon ki nou pe pas atraver.

In osi reasir pep Seselwa ki sa Gouvernman in an kontrol e konnen ki i pe fer. Atraver ou Mr Speaker les mon dir ou Onorab Vidot ki tou sa ki nou'n promet dan nou Manifesto ki nou pe met an valer. Se nou Manifesto ki pe gid nou. Pli tar dan mon lentervansyon mon pou al en pe an detay lo la.

Onorab Vidot i osi dir ki i lo *bus stop* me bis pa pase. Mr Speaker i tou depan ki kalite bis ki Onorab Vidot pe espere! Me si Onorab Vidot pe dormi lo *bus stop* i pa pou vwar ler bis i pase!

Sa Gouvernman, i en Gouvernman ki pran bann desizyon brav byen kalkile menm ki parfwa pa popiler. Me se bann desizyon i dan lentere Lepep Seselwa. En legzanp paz 13 nou Manifesto, katriyenm paragraf i koz lo ki mannyer pou asir fitir nou transpor dan ler, e i detaye ki nou Gouvernman i angaze pou mentenir *Air Seychelles*.

I enportan pou met lo rikord ki ler lapriyer fermtir *Air*

Seychelles ti pe ganny glorifye dan konferans lapres lo televizyon Nasyonal par trwa Rwamaz, Prezidan Ramkalawan ek so lekip *State House*, ti pe desid lo mannyer pou sov nou laliny aeryen Nasyon *Air Seychelles*.

E la nou *Air Seychelles* i lo bon larout ver son restriktirasyon. Bravo tou sa ki'n enplike dan sa demars e tou bann travayer *Air Seychelles* ki pare pou form parti dan sa transformasyon nou *Air Seychelles*.

Mr Speaker tou Seselwa i annan dwa demann kestyon e merit en respons, me pa gaspiy letan lo bann keksoz pa relevans ou pa realis. Dr Gedeon in dir si ou napa nanryen pa bezwen dir naryen. Me pep Seselwa pouwwar, drwa ek responsabilite i mars kot-a-kot.

Me i enportan pou demann sa kestyon eski sa adres Prezidan in donn ou lespwar? Annou fer sa refleksyon ansanm.

Mon larepons i wi. Permet mon zistifye akoz mon pou dir Wi. Dan zis 16 mwan nou Gouvernman in kapab komans en transformasyon dan sa pei e rezulta pe koz pou li menm. Bann rezulta vreman pozitiv ki'n pran kont sa set gran, en bon

prensip ki lo paz 7 nou Manifesto.

Sa se

- Linite Nasyonal,
- promouvwar loportinite,
- delivre en servis efikas,
- responsabilite ek la transparans,
- lazistis pou tou e
- respe pou Lalwa.

En keksoz enportan se ki sa Gouvernman in fer sir ki i annan stabilite dan pei lo tou nivo. Ankor enn fwa fer referans nou Manifesto paz 11, i koz lo stabilite sosyal.

Premyerman, malgre COVID in tap nou, me komodite de baz in touzour disponib dan magazen e a en pri plito rezonnab.

Dezyenmman, in napa mankman karbiran pou elektrisite e mwayen transpor.

Trwazyenmman tou sitwayen ki ti anvi travay in kapab ganny en lanplwa ou reste dan lanplwa e ganny en saler lafen dimwan.

Katriyenmman, lasistans sosyal in kontinyen ganny donnen, malgre ki mon pou dakor ki akoz labi sa lasistans dan lepase, prezan serten inosan pe pey pou le koupab.

Senkyenmman, lord ek lape in ganny mentenir malgre

ki serten group ou endivididezespere, in eseye destabilise sa pei par degiz zot konman bann *cartoon character* kot Lorloz.

Sizyenmman, en program vaksinasyon entansif pou tou Seselwa e menm etranze ki travay Sesel. Ankor serten bann Dirizan ki kwa tou dirizan i annan menm latitud parey zot, avek zot bann latitud *reckless attitude* parey zot dir, in esey dekoraz nou Seselwa pou pa pran vaksen.

Sanmenm sa ki apel vre soungoula lake kartron. Me Bondye i pli for ki satan, alor satan in tonbe avek zot lespri Republik Bannann. Lalis i long mon kapab koz lo la en zouven antye.

Mr Speaker prezan permet mwan koz en pe lo sa transformasyon enkrwayab ki pe pran plas dan Sesel e mon anvi konfirmen ki tou in ganny byen kalkile akoz in ganny ekri dan nou Manifesto dan eleksyon Oktob 2020. Si zot bezwen en kopi Manifesto pran kontak avek mwan mon ava fer zot gannyen.

Premye ki mon pou koz lo la se dan ledikasyon. En vre transformasyon. Parey lo paz 24 nou Manifesto in ekri ki ledikasyon i lakle pou ouver tou laport Fodre nou rekonnexion ki

depi ler ki sa lotonomi lekol in vin an fors bokou nou bann zanfan, pe briye dan zot letid.

Kot lekol La Rivière Anglaise sa lannen ki'n pase bann rezulta kot bann zanfan in anmenn bon grad in ogmante lo term lakantite etidyan ki'n briye, konpare avek bann lannen avan kot zis enn ou de zanfan ki ti pe fer byen dan tou size.

E la mon anvi felisit Sir Steve Houreau, *Management Lekol La Rivière Anglaise* e tou bann zanfan lekol ki pe fer e travay vreman ekstraordiner e zefor sa lotonomi lekol, dan en fason ki'n sanz repitasyon nou lekol kot etidyan in nepli lager avek ansenyan.

Me plito parey nou logo lekol i dir avek responsabilite, perseverans nou fer sikse. *PTA* ek *School Council* pe osi fer en bon travay. Mon anvi dir zot kontinyen lo sa bon semen.

Lekol La Rivière Anglaise, malgre *COVID* i pe aktyelman operate an full kapasite e i anba kontrol. Mon pou osi felisit nou lekol La Rivière Anglaise pou sorti premye dan konpetisyon *Christmas tree Desanm* lannen pase.

Bokou nou ban paran pe pran zot responsabilite e pou sa mon pou dir zot kontinyen, me

bann ki bezwen led silvouple rod siport e nou pou siport zot.

Mr Speaker pri lavi; Prezidan in eksplike ki nou Gouvernman pe fer tou ki pri lavi i vin pli abordab. Me i annan bokou bann fakter enternasyonal ki an deor nou kontrol e ki annan en lenpak lo lekonomi mondyal.

Me par kont pri Dolar in sorti R22 an 2019 pou vin 14 roupi an 2022 menm ki nou dan sa pandemik, e sa se akoz byen zeson finans, koup gaspiyaz e reform dan lendistri tourizm, kot malgre la kantite touris in desann me touris in depans plis.

Prezidan in donn nou lespwar ki si lekonomi i kontinyen lo menm larout parey i pe ale e touris i kontinyen vini, nou kapab vwar en logmantasyon dan saler, ki a kapab soulaz nou en pe. La nou pe zis mazinen ki lenpak sa lager ki'n deklare *Ukraine* pou annan lo lekonomi mondyal e pri lavi.

Mon oule osi felisit STC pou sa bon travay pou kontinyen regarde ki mannyer pou anmenn bann komodite lo standar, me lo en pri vreman abordab.

Mon swete ki ler nou Seselwa nou al fer konmisyon marsande e rod sa bann pri *RRP*

ki STC pe promote. Sa bann komodite i partou, preski tou magazen, si pa dan tou magazen dan bann sou-distrik e dan distrik an antye.

Mr Speaker mon pou bezwen koz fran e direk i annan enta lezot faktor ki fer nou dir ki nou vilnerab, nou mizer, nou dan lapovrete, nou napa larzan.

Mr Speaker si en endivid i oule aste tou sa ki i vwar dan magazen, i oule fer *shopping* dan bann magazen kot bann komodite i pli ser e i pa oule marsande dan plas rod bann komodite abordab oubyen ki ekri *RRP* lo la.

Si li sa endivid i oule manz diri ki vann pli ser, oubyen oule bwar sa bwar ki pli ser, diverti kontan. Otomatikman ou pou napa larzan.

Ou pou fini e pou reste ou zero Roupi dan ou pos. Si tou le *weekend* ou dan restoran apre ou poste dan *WhatsApp* lo *Facebook* e dimoun i vwar. Apre ou tay kot sa labank ki apel *MNA* akoz saler *MNA* i apel *ATM* tou zabitan.

Me sa i apel toupe e ou annan lodas pou demann *MNA* me la ki mon pou fer. Sorry me comme dir enn mon dalon, ki sa lesans lodas ki sa group Seselwa i mete? Menm parey nou konnen lanmor pa averti e

i en peryod vreman difisil dan lafanmir ler i arive.

Me ler ou antre kot Padayachy, fanmir i swazir pli gro serkey apre ler pri i pet plafon ankor tay kot labank ki apel *MNA*. La mon mazin en kou Joseph Louise ek son sanson ‘Tant Emma.’ Mon krwar in plis ki ler ki serten nou Seselwa i konn nou priyorite dan sa pei.

Mr Speaker dan sa kalite latitud lolasite fodre ki i annan en transformasyon vre.

In annan en transformasyon dan Lafors Lapolis e lafason ki lager kont bann trafiker drog. In enn ki vreman remarkab kot bann larestasyon i vizib. Akoz pa nenport kouler politik ki ou ete si ou’n fer ou lofans ou bezwen fer fas avek Lalwa.

Mon pran sa lokazyon pou dir en gran mersi sa lekip ki ti mobilize Sanmdi le 5 Fevriye kot, Lafors Lapolis, *ANB*, *SSU* bann kondannen enkli lekip brigad e Lotorite Distrik La Rivière Anglaise.

Nou ti groupe e netway en gento dan distrik English River Union Vale. Me nou bezwen kominate antye pou elimin sa bebet ki apel eroin e kokain e lezot bann *hard drugs* ki pe detri nou zenn, detri lafanmir

Seselwa e detri nou pei an zeneral.

Me ou sa madanm ki pe vann sigaret oubyen paye an detay apre konplent ki sa bann droger pe *disturb* ou, se ou ki pe kontribye pou ankouraz bann gento dan kominate.

Mon mesaz pou ou sa trafiker drog, nou pe kontinyen *warning* ou silvouple donn en lape akoz ou pou mal fini ou lakours. Me ou sa viktim mon laport ek mon lebra i gran ouver pou akerir ou, e ed ou pou reabilite e revin en vre sitwayen responsab e prodiktiv.

Pran legzanp lo sa bann kondannen ki ti ede demolir zot kan drog dan distrik.

Mr Speaker i pa mon responsabilite pou ziz ou ki’n tonbe, me mon responsabilite se pou ed ou releve e montre ou vre semen lavi. Lo sa not mon ankor pe demande pou revwar Lalwa lo sa zafer itilizasyon e posesyon kanabis dan Sesel. Sa i en dyalog ki fodre reste lo latab.

Mon oule pran sa lokazyon pou felisit tou sa bann fanm ek zonm dan *uniform*, ki pe pran zot responsabilite o serye.

Mon vreman apresye ki Msye Prezidan in rekonnent ki i annan ki pe kontinyen trenn zot

lipye. Sa i pa zis dan Lafors i dan tou Sekter Gouvernman.

Mon Andy Labonte mon'n ganny elekte par Zabitan La Rivière Anglaise e mon pou kontinyen debat e persiste ki lavwa e drwa mon zabitan i ganny tande e respekte.

Mr Speaker mon espere ki nou kontinyen elimin sa bann birokiasi ki egziste. Parey kot *Customs* ek kargo. Akoz sa pe tard lekonomi letan i en keksoz ki vreman enportan pou tou dimoun.

I vre ki i annan labi dan *GOP*, me ler napa Seselwa ki enterese pou pran en pozisyon, ki sa *business* pou fer? I pou fermen e kontinyen perdi larzan.

Annou rekonnet ki se sekter prive ki moter lekonomi, nou pa kapab anmar zot lanmen. En zabitan i demann permisyon pou fer en senp biznes parey *food van* zot ganny difikilte. En zabitan i demande pou *lease* ou vann li en pti bout later pou *extend* son *business* pa gannyen menm.

Me par kont se sa bann menm *business* ki pe ede e asiste kominate dan diferan fason. Lotel en sekter ki mon konn tre byen, e nou Seselwa i ankor pe ganny gete koman enferyer.

Mr Speaker annou get lo sport. Nou bezwen rekonnet ki i bezwen annan en vre transformasyon lo sa size. NSC pa kapab komans netway kort ek laplenn apre arete.

En legzanp i anler Union Vale depi plis ki 4 mwan pa pe ganny netwaye. Mon demande ki plan NSC lo netwayaz bann fasilite sport dan distrik.

Me par kont i annan bann bon partenarya ant serten bann biznes ek spor ki pe fer ekstrememan byen. En legzanp get laplenn *Mini Stadium*. *Marine Maintenance* pe fer en travay vreman ekstraordiner. Me *still* zot ganny serten difikilte avek NSC.

Zot in menm kree en lekip *Marine Maintenance Football Youth* ki pe *recuit* bann zenn manrmay dan larezyon e ede retir zot dan bann move lenfliyans.

E pa pe demann NSC ni en sou pou *Maintain* sa laplenn ek sa lekip foutbol. Mon anvi pran sa lokazyon pou lans en lapel avek bann lezot biznes ki pe *operate* dan distrik, pran legzanp lo la e donn en koudmen ed kominate.

Mr Speaker i osi annan bokou nou bann zenn ki pe donn tou dan sport e parler zot santi zot lebra i tonbe, akoz zot

lasosyasyon pa pe performen a la oter e donn zot sipor.

La mon anvi felisit *body builder* Davis Mervin Dugasse pou anmenn en Meday Lor pou Sesel dan en konpetisyon enternasyonal. Mon pou osi felisit *English River Aston Villa* ki ti sorti premye dan konpetisyon *Football Seychelles Schools' Premier League*.

E pou sa mon pou remersi Mr Craig Francourt e *British High Commission Victoria* ki'n ankouraz tel linisyativ. Mon osi bezwen fer en mansyon lo lafyerte ki *Queen's Baton* ti anmennen dan leker mon bann zabitan La Rivière Anglaise Desanm lannen pase.

Mr Speaker i osi enportan pou note ki malgre bokou negativite me i annan bokou bann zenn dan mon distrik ki apard spor, pe fer keksoz positiv.

La mon mazin Yonny Farabeau dan sante, Daren Esther koman en stilis *designer*, Carlos Ernesta koman dan *TV advert*, Marcus Didon ki'n ouver son pti salon koup seve e pe debourye zis pou nonm enn de.

Mr Speaker i vre ki transformasyon i dan tou brans e lebra Gouvernman. Tou le bomaten ki mon antre dan

Lasanble Nasyonal ler mon get anler i ekri '*Serving a modern Democracy*' tousala i apel bann transformasyon e sa i merit ede transform sa parti *uniform* semiz rouz ek kravat nwar. Akoz Seselwa i bezwen en Lopozisyon ki pli serye, realis e responsab.

Mr Speaker ler mon antre dan *building* Ladministrasyon Distrik La Rivière Anglaise kot mon lofis i sitye mon zwaye akoz sa transformasyon kot politik nepli ganny servi pou dormi lo *file* e viktimiz nou zabitan. Me plito nou travay koman en vre fanmir e form parti sa lekor Gouvernman e ankor enn fwa sa i ganny vwar dan dernyen parti lo paz 37 nou Manifesto.

Mr Speaker avan mon terminen mon pou tous en kou mon distrik ek mon zabitan ki vreman kontan e ekstrememan enportan pour mon.

Mwan ek mon DA avek mon lekip nou travay dan lentere distrik e nou zabitan. Koman en vre fanmir tou le midi, tou bann *staff* nou asiz otour en latab pou pran en repa ansanm, nou tal kart ater e rod solisyon pou bann defi ki nou rankontre dan distrik.

Mon demande akoz ki akoz ladministrasyon avan pa ti kapab fer sa. Se pourtan vizyon

Biro ladministrasyon distrik *La Riviere Anglaise* in touzour lir koumsa “*To be an eco-friendly district where local can feel content, secure, healthy and belonging to the community.*” E se sa ki pe gid nou travay.

Les mon dir zot ki ozordi tou zabitan i santi zot *welcome* dan Ladministrasyon Distrik e sa i en vre transformasyon. Ki ou ble, rouz, ver, oranz oubyen milti-kouler ou *welcome*. In nepli en landrwa kot dimoun i vini pou vin rod en lanvlop larzan. Me tou le kontrer parfwa zabitan i zis rann nou en vizit e dir, “Mon pe zis pase pou vin gete ki mannyer zot ete, si zot tou zot byen ?” Me pa i gou Mr Speaker ?

Dan tou nou travay nou osi kit an tet misyon nou Ladministrasyon Distrik ki lir koumsa “*empower the locals to be proactive and supportive; directly involved in promoting good living values and innovative practices in the benefit of the Community.*”

Pou nou pti kominote peser ki deservi distrik, zot konnen ki diskisyon pe finaliz lo sa novo konsep pou konstriksyon nou novo bazar i lo latab. E byento nou pou rezwenn pou konfirm tou keksoz.

Avek sa Bidze ki nou ti resevwar lannen pase, distrik in kapab konplet 3 pti proze e sa lannen nou pou akonpli plis ankor.

Ou sa gran siporter US ki’n dir mon ou’n ti’n fatige soufer trankil tou sa letan e zis ganny servi, mon kontan ozordi ou lizye in ouver. E ou’n rekonnet ki se pa kouler politik ki enportan, me travay ki pe ganny fer. Akoz nou bann dirizan *LDS* nou pa bann kriminel, ni bann voler, e nou pa stok zarm.

Ou sa zabitan Quincy, Ma Joie, Greenwich, Union vale, La Rosière, La Rivière Anglaise, santral, mon reste touzour angaze pou travay dan ou lentere san preferans. Si mon pa ankor arive kot ou laport, tre byento ou pou vvar mon parey labitid, “Bonzour Mr madanm, koman ou sava?”

Mon limero telefonn i reste touzour parey. Pa ezite pou telefonn mon pou en konsey e ler ou bezwen mon lasistans. Mon lofis i sitye touzour dan batiman Ladministrasyon Distrik Rivière Anglaise me non pa kot *English River Community Centre*. Me pa trakase tre byento nou pou repran sa ki apel pou nou.

Me mon laport ek lebra i reste touzour ouver. Vini

aprose mon pou la pou akeyir ou.

Mr Speaker pou terminen mon pou demann Bondye Papa pou donn mwan, tou bann Manm sa setyenm Lasanble Nasyonal lo tou le de kote latab e Gouvernman Sesel tou son benediksyon, gidans, lagras e proteksyon en kondisyonnal. E mon demande bokou lasazes pou kapab desarz nou responsabilite dan lentere lepep.

Mr Speaker, permet mon pou sant sa melodi. "*Sesel mon Sesel mon pa les ou tonbe.*" Mersi Mr Speaker.

(APPLAUSE)

MR SPEAKER

Mersi Onorab. Prosen entrevansyon nou ava pas laparol Onorab Terence Mondon.

HON TERENCE MONDON

Mersi Mr Speaker, koleg MNAs, zabitant mon distrik Takamaka e tou dimoun ki pe ekout nou Lasanble. Ser, frer, Seselwa, mon pran sa loportinite pou dabor remersye Prezidan Larepublik pou son diskour lo Leta Lanasyon.

Son diskour in permet nou konpran pli byen kote nou

ete koman en pep e ki nou bezwen fer pou transform nou pei pou en lavenir pli prospere.

Ser, frer Seselwa, nou annan en Prezidan ki for e dinamik son karakter i ganny formen atraver en gran parkour politik kot i bezwen sirmont bokou defi. Son leksperyans i montre nou ki tou i posib dan lavi.

Prezidan in fer en lapel pou nou zwenn li dan sa latas pou batir en meyer Sesel. Nou pei i bezwen lenerzi tou son pep kot sak dimoun i fer son bout.

Prezidan i envit tou Seselwa pou rantre dan sa novo lespri, pran kontrol nou lavi e fer lavantir nou legzistans pli eksitan e pli relevan. Se sa vre lespri laliberte. Ler sakenn de nou i kontribye pou form nou prop desten.

Mr Speaker mon pa kapab ekspekte ki tou dimoun pou vin nou zanmi. Me nou tou nou zanfan Sesel e Sesel i la pour tou son zanfan. Fitir zenerasyon pou rekonnou koman sa zenerasyon ki'n vreman fer Sesel vin en pei ini dan prosperite. Mr Speaker apre selman 16mwan, nou kapab vwar progre dan plizyer sekter.

Sekter lagrikiltir in reganny en novo souf e bokou zenn pe rod loportinite pou

rantre dan sa sekter. Mon ankouraze vwar nou lazenes pare pou pran la relev dan sa sekter lekonomi in relanse avek en novo lelan. Bokou zefor pe ganny fer pou kree en meyer latmosfer pou biznes epanouir.

Me nou bezwen fer plis pou amelyor kondisyon ki Labank Komersyal i mete lo finansman biznes. Akse avek finansman i ankor ser e ozordi, Seselwa pe menm rod finansman aletranze a en pri meyer marse.

Dan sekter lapes nou bann peser pe ganny bann fasilite neseser e sa travay pe ganny valorize.

Avek en lafors determinen, nou kapab apresye nou febles dan tou lonnekte e avek bokou plis lespraw. Nou pa'n zanmen konn vre laliberte dan nou pei, nou pa'n touzour konn laverite dan sa ki'n arrive dan nou pei. Ozordi sa pe sanze. Alor annou plito sezi sa moman pou nou sirmont sa ki diviz nou e ranforsi tou sa ki ini nou ansanm.

Mr Speaker fas avek en kriz ekonomik e finansyel, nou ladministrasyon ti bezwen debout for pou adres sityasyon.

Si an zanvye 2021, Prezidan pa ti pran bann mezir desiziv pou vaksinasyon e reouver nou lekonomi, nou pei

ti pou'n kolaps. Mon rekonnnet ki nou pe travers en moman difisil avek en kou lavi ensiportab pou bokou fanmir Seselwa. Me si nou Gouvernman pa ti'n reazir vit e mentenir nou pozisyon, nou pei ti pou lo son zenou. Ozordi, travayer ti pou napa en saler.

Lavi ti pou bokou pli dir. Ozordi, avek determinasyon e travay dir nou Dirizan ek son lekip, nou lekonomi in relanse e pe fer bokou progre. Sesel i vreman dan bon lanmen.

Lemonn pe regard Sesel pli pre avek bokou lapresyasyon e lavwa Sesel pe *echo* bokou pli for dan bann foronm enternasyonal. Wi, nou Prezidan i reste angaze avek lemonn lo sa size vulnerabilite bann Pti Leta Zil. Lafason ki Prezidan diriz nou pei i inspir konfyans parmi bann Dirizan lemonn ki Sesel i lo bon semen.

Mon annan konfidans dan lavenir Sesel akoz mon konn karakter nou pep. Nou pep in aprann fer sakrifis depi lepok 'Ser Sang.' Ler Seselwa ti ganny demande pou ser sang lannen apre lannen, kote nou \$40milyon ti ete? Eski Seselwa pa ti pe soufer sa letan?

Ozordi laverite pe sorti - pa esey vin bat latet Seselwa. Seselwa in fini vwar kler e zot konnen ki Ladministrasyon US

ki'n fel zot. E zis mazinen si larzan sa pep ti'n ganny byen zere, ozordi, nou pa ti pou bezwen IMF e Seselwa ti ava pe redwir en pli o standar lavi.

Mr Speaker pou bokou lannen koripsyon ti en size tabou dan nou pei. Latransparans e rann kont i zis 2 mo ki politisyen ti kontan servi me larealite ti napa aksyon. Nou zil, nou later e lezot byen Leta ti pe ganny servi pou gen personnel en pti group dimoun. Sakenn ti kre son pti lanpir e fer sa ki zot oule avek nou resours.

Sa lensidan kot SEYPEC i donn mwan sa lenpresyon ki serten Sef Lantrepriz Piblik ti pe fer sa ki zot oule avek resours piblik. Nou pe koz lo byen pep Seselwa ki Gouvernman Egzekitiv in ganny mandate pou zere pou benefis tou dimoun.

Seselwa ti soulaze pou antann Minis Finans dir dan Konferans Lapres ki PEMC pou al fer en lodit pli aprofondir lo SEYPEC. I kler ki Minister Finans atraver PEMC, pou bezwen gard en lizye lo bann lantrepriz piblik, e fer sir sa ki'n arive dan SEYPEC e dan Air Seychelles pa ariv ankor.

Seselwa pe demande ki labi dan bann lantrepriz piblik fodre arete, e ki aksyon serye pou bezwen ganny pran kont

bann dimoun responsab. Lantrepriz piblik i annan en rol enportan dan nou lekonomi. I kree lanplwa pou plizyer milye Seselwa. Reveni ki ganny kolekte atraver zot bann aktivite, i kapab kree valer adisyonnal dan lekonomi e fer en kontribisyon dan Bidze Nasyonal atraver taks biznes ek *dividend*.

Dapre rapor PEMC pou 2019, lantrepriz piblik dan son lansanm i reprezent plis R32bilyon, 140poursan *GDP* e i fer preski 3fwa nou Bidze Nasyonal, e anploy plis ki 6000 travayer.

PEMC i fer resorti plizyer defayans ki'n eggiste dan *governance* bann lantrepriz ki osi enkli defayans dan lankadreman sa bann lakonpannyen.

Dapre sa menm rapor 2019, serten lantrepriz pa menm soumet zot rapor finansyel anyel, ki vedir ki serten zot pa pe respekte Lalwa ki an plas, parmi i *Air Seychelles* ek 2020 *Development Ile Soleil*.

Seselwa i rapel byen listwar *Air Seychelles* anba ladministrasyon US. Nou ti ganny dir ki *Air Seychelles* pe fer profit ziska ki nou lekip LDS dan sizyem Lasamble, ti fer nou pep realize ki ansyen

ladministrasyon ti pe anbet Seselwa e ki an realite *Air Seychelles* ti pe perdi an kantite larzan.

Mr Speaker an Mars 2015, Sef Misyon *IMF* pou Sesel Mr Marshall Mills ti souliny nesesite ki Gouvernman i vin transparan avek rezulta performans bann lantrepriz piblik. Sa letan *Air Seychelles* ti deklar en profi \$3.2milyon e *IMF* ti fer sorti ki sa lakonpannyen ti pe fer loss.

Sa menm lannen, *Air Seychelles* ti pe ganny sibvansyon \$5milyon pou kouver serten fre e en lot \$2milyon pou kouver fre *marketing* lo larout *Paris*.

Ozordi, ler Prezidan i anonse ki *Air Seychelles* pe sorti anba sa prose ladministrasyon e travay ki son lekip in fer, zot in arive redwir det *Air Seychelles* sorti \$150milyon pou vin Selman \$50milyon. E pli enportan ankor se ki napa okenn travayer Seselwa ki pou perdi son travay.

Mon salye sa novo ladministrasyon, an partikilye sa lekip ki'n travay dir pou retir sa fardo \$100milyon lo zepol pep Seselwa.

Leksperyans *Air Seychelles* i demonstre sa gran diferans ant *Leadership LDS* e *Leadership US*. Lafason ki nou

regard en problem e lapros ki nou pran pou rezoud en problem i konpletman differan.

Ladministrasyon *LDS* pa per pou adres problem, akoz nou krwar ki tou problem i annan en solisyon.

Mr Speaker lavant *Seychelles Pride* in fer nou kestyonn gouvernans bann lantrepriz piblik dan nou pei. *SEYPEC* i rekolte en reveni \$262milyon an 2020 atraver son bann asset, ki vo plis ki \$430milyon dapre rapor finansyel anyel sa lorganizasyon.

An 2020 sa lakonpannyen in fer profi net \$34.1milyon ki'n permet sa lakonpannyen fer en kontribisyon \$10.5milyon dan Bidze Nasyonal koman dividend.

Sa ki nou'n aprann ozordi atraver sa 2 lantrepriz, i donn nou en portre kler lo lafason ki byen pep Seselwa ti pe ganny zere anba ladministrasyon *US*. Si zot ti ankor dan Gouvernman, sa zafer ti pou pas koman *business as usual*.

Seselwa in fer en bon swa pou Sesel. Dezormen, sa bann lantrepriz piblik pou bezwen annan en bon ankadreman gouvernans e pou bezwen perform dapre lekspektasyon pep Seselwa.

Bann lantrepriz piblik pou bezwen ganny swiv tre pros afen ki lentere nou pep i ganny sovgarde. *LDS* pou kontinyen anmenn laklerte dan zeson resours piblik.

PUC i en lot lantrepriz piblik ki annan en rol primordyal dan prodiksyon litilite piblik dan pei. Nou bezwen osi regard rol *PUC* dan Programm Developman Nasyonal pei e ki fason *PUC* i pli byen kapab siport lezot sekter, dan zot programm devlopman.

Gaspiyaz dan *PUC* i en lot size ki nou bezwen met lanmen lo la. I pa akseptab pou vwar larzan piblik ganny gaspiye pou aste pyes, ki apre pa ganny servi dan zot loperasyon. I pa normal pou Seselwa kontinyen pey en pri eleve pou linefikasite serten lantrepriz piblik.

Mr Speaker nou konsyan ki bokou fanmir Seselwa pe pas atraver difikilte finansyel, sirtou avek kou lavi ki pe kontinyelman ogmante.

Tou fanmir Seselwa in ganny touse dan en fason ou en lot. Nou bezwen osi rekonnexion sityasyon difisil ki pei pe pas ladan e mon ankouraze pou aprann ki Minister Finans pe fer provizyon pou en reazisteman, saler an mezir ki nou lekonomi i stabilize.

US i oule donn lenpresyon ki ladministrasyon *LDS* ki responsab pou sityasyon ekonomik ki nou pe fer fas avek. Silvouple, aret pran Seselwa pou lenbesil. Sa letan in fini.

Tou dernyerman, koze ti lo 2020 *Development* kot ankor nou'n vwar resours nou pep ganny servi pou gen personnel serten dimoun.

Seselwa in note e zot pe esper rezulta sa ka avek pasyans. Mon konnen ki *PEMC* pe fer en travay pou ranforsi lankadreman ki gouvern bann lantrepriz piblik. Lo nou kote, nou pou osi demann Oditer Zeneral, atraver *FPAC* pou fer lodit spesyal lo tou bann lantrepriz piblik, pou ki nou pep i konnen ki pe pase dan sa bann lakonpannyen.

Mr Speaker mon apresye vwar ki novo ladministrasyon pe met bokou lanfaz lo litilizasyon teknolozi lenformasyon ek komunikasyon. Sa pou permet bann akter dan sekter piblik e prive fer en pli bon kontribisyon dan devlopman pei.

Sa transformasyon atraver teknolozi i esansyel e pou anmenn en louvertir pou devlopman biznes dan nou pei. Kreasyon novo *platform* nimerik pou fer Sesel vin sa

landrwa kot i fasil pou fer biznes.

Biro Rezistrar in deza pe enplimant nouvo platform nimerik pou fasilit tranzaksyon anrezistreman, me sa divizyon pou bezwen fer plis pour transform zot servis.

Mr Speaker nou Vis-Prezidan pe *lead* en lekip profesyonnel pou akseler sa transformasyon, pou reorganiz servis piblik e promouvwar *Ease of Doing Business* atraver tou Minister, Departman e Lazans piblik.

DICT i byen senkronize anver sa bi e pe deza enplimant plizyer linisyativ e linovasyon. Nou bezwen revolisyon lafason ki nou fer biznes dan Sesel, kot bann tranzaksyon biznes i ganny fer bokou pli vit, pli fasil e pli konvenyan.

Dan diskour Bidze lannen pase, Minis Hassan ti eksprim komitman Gouvernman pou entegre teknolozi nimerik dan servis piblik, e promot en latmosfer pli konvenyan pou fer biznes.

Nou konnen deza ki plizyer platform nimerik in ganny enplimante e plizyer i ankor dan prosesis lenplimantasyon. Nou ankouraz plis dimoun pou servi sistenm ki *online* e retir presyon lo servis transportasyon.

Ozordi, nou pe vvar en gran rediksyon dan lakantite dimoun ki al dan labank pou en servis, akoz en kliyan i kapab fer preski tou tranzaksyon avek son labank *online* e servi sa letan pou fer lezot keksoz.

Malgre i annan bokou servis ki deza *online*, mon santi ki pa tou servis ki pe ganny sa vizibilite. I pa sifi pou annan en servis *online* si manm piblik ou sa biznes pa konnen.

Bann Minister, Departman ek Lazans i bezwen kontinyen promouvwar zot servis ki zot in met *online*.

Nouvo ladministrasyon pe travay pou kree en Sesel modern e sa transformasyon teknolozi nimerik pou permet sa ladministrasyon retir birokrasi e permet nou sitwayen pou vin pli prodiktiv.

Mr Speaker, mon Distrik Takamaka Mr Speaker i en loner e privilez pou reprezent mon zoli distrik, Takamaka. Pou komanse, mon oule felisit tou bann etidyan ki'n *excel* dan zot letid lannen pase e mon salye an partikilye, Daryl Hibonne etidyan sorti STA ti resevwar lakoup Prezidan.

Ms Elsa Azemia ki ti resevwar *Minister's Award* dan son letid *Advanced Diploma* kot STA e Jessica Raoul meyer etidyan dan *Housekeeping* kot

STA. Performans sa 3 etidyan in fer lafyerte nou kominate e mon swet zot tou le meyer dan zot karyer profesyonnel.

Mr Speaker Takamaka i en distrik ki'n prodwi bokou profesyonnel dan nou pei.

An fet, lekol primer Takamaka i touzour sorti parmi le meyer lekol dan rezulta Legzanmen Nasyonal. E mon profite pou remersye tou bann ansenyan nou lekol pou zot devouman e dedikasyon.

Ler en zanfan ki'n ganny tou bagaz neseser pou reisir, vin viktim sibstans drog, lafanmir e lakominote i soufer.

I malere pou vwar nou bann zenn tonm dan sa fleo drog. Mon lans en lapel avek manm fanmir sa bann zenn pou vin devan, e nou ava met zepol ansanm pou retir nou zenn dan sa fleo. I annan dimoun ki'n pare pou travay avek sa bann zenn, me manm fanmir osi devret pe zwe en rol dan sa lalit.

Mon profite pou osi salye tou bann dimoun ki'n pran linisyativ pou komans en pti biznes, e mon ankouraz lezot ki annan sa kapasite pou fer parey. Fodre pa ezite pou eseye. Nou bezwen fer Takamaka vin pli aktiv ekonomikman.

Dan lepase, Takamaka ti sa distrik kot ou ti kapab ganny bann prodwi vakwa, banbou e

lezot lobze artizanal. Nou bann veteran in arriv lo laz e nou bezwen lazenes pou pran sa relev.

Sa bann prodwi i ankor an gran demann lo marse e zot e an plis ki sa ot annan en gran valer kiltirel pou nou kominate. I pou en plezir vwar sa bann aktivite retournen dan nou distrik, sirtou la ki zot pou ganny landrwa pou vann zot prodwi.

Dan distrik, nou pe ankouraz bann dimoun ki annan later pou osi plant vakwa, banbou ki pe vin deplizanpli rar. Annou remet an valer nou bann prodwi lokal.

Mr Speaker mon distrik Takamaka pe transformen pou vin en vilaz touristik e sa ki pli ankourazan se ler mon vwar nou Seselwa ki pe antreprann sa bann proze.

Dan sa prosen 1 a 2an, ou pou annan dan distrik 7 nouveau letablisman *self-catering* avek en nouveau restoran.

Sa pou fer en trantenn letablisman akomodasyon e 4 restoran dan nou distrik. An mezir ki nou akeyir nouveau developman dan nou distrik, nou bezwen osi mazin nouveau fason fer ki ava permet nou pran pli bon swen avek nou lanvironnman. Nou lakot i reste

landrwa pli sansib e tre vilnerab kont sanzman klima.

Mon'n apresye resers ki Ms Kelcy Gill, en etidyan *UniSey*, pe fer dan bann distrik pou vwar rol ki Lotorite Distrik i zwe dan zeson Lanvironnman.

Nou bezwen donn plis latansyon nou lanvironnman naturel e fer ki Takamaka i gard son labote naturel otan ki posib. Mon pe envit zabitan mon distrik pou komans sa konversasyon.

I osi neseser pou annan en fon dan distrik kot bann biznes i kapab kontribye pou soutenir devlopman dan kominate. Nou bezwen fer plis pou elev nou distrik e pou protez e prezerv nou zoli vwazinaz.

Lo sa size soustenabilite, nou distrik in osi siport linisyativ MCSS *Maritime Conservation Society* pou ki lans Intendance, Anse Cachee, Anse Corail, Anse Bazarka e Grand Police i vin landrwa dezinyen kot torti i ava pli byen ganny proteze.

Mon ankouraze par sa demars e mon demann tou zabitan mon distrik pou kontinyen protez sa bann lespes. E mon dir avek bann dimoun lavil ki vin pran nou torti pou silvouple arete.

Mon pa kapab koz lo mon distrik san ki mon mansyonn size lakaz. Lakaz i en problem ki pou reste la avek nou si nou pa sanz fason fer.

Resours ki disponib pou konstrir lakaz pa ase pou rezourd problem lakaz ki kontinyen akimile. Dan mon distrik, nou annan 2 proze lakaz ki'n fini ganny *design*, me nou bezwen esper finansman. Mon espere ki nouvo Polisi Later ek Lakaz pou kapab anmenn en soulazman pou bann aplikan dan mon distrik.

Lakaz i reste en bezwen de baz pou en fanmir. Nou bezwen trouv lezot mwayen e lezot fason fer pou soulaz bann fanmir ki dan bezwen.

Dan mon distrik i annan dimoun ki annan later me zot osi lo lalis lakaz senpleman akoz zot napa en semen konvenab.

Nou kapab ede rezourd problem lakaz si nou fer plis devlopman semen dan distrik. Devlopman later zeritye i en lot fason pou redwir sa presyon lakaz – lo lakaz.

Lo kote Minister Gouvernman Lokal, mon'n apresye ler mon'n vwar bann Zofisyen pli angaze avek bann proze distrik e mon annan konfyans ki sa lannen nou ava

kapab realiz tou nou proze, malgre resours limite.

Mon annan bokou lespwar ki proze semen, Alcide/Rose i avar kapab ganny realize sa lannen. Sa lot proze pou konekte semen Kalver avek semen Church-Thomas ki ti'n sezi anba ansyen administrasyon, pou byento reganny lavi. E zabitan sa rezyon kin soufer avek sa semen, sirtou apre sa gro lapli boner Zanvye, i avar ganny en soulazman.

Mon sezi sa moman pou eksprim mon lapresyasyon pou CEO SLTA ek son lekip ki'n la akote nou dan distrik dan sa moman kot nou ti pe fer fas avek bokou ka dezas. I ti vreman ankourazan pou vvar sa kantite zefor ki sa Lazans in donnen pou trouv solisyon pou nou zabitan. Mon rekonnnet ki pa tou dimoun ki lipye i lo fren.

Mr Speaker pou konklir Ladministrasyon LDS pe travay pou anmenn en transformasyon dan nou fason fer. Mon konvenki ki Sesel pou transformen pou le meyer akoz mon senpleman krwar dan kapasite Seselwa. Mon remersi ou, Mr Speaker.

MR SPEAKER

Mon remersye ou Onorab. Nou a pran poz la e nou a repran travay 2er. Mersi.

(BREAK)

MR SPEAKER

Bonn apre midi tou dimoun dan lasal e an deor. Mon pas laparol Onorab Johan Loze pou son lentervansyon.

HON JOHAN LOZE

Bonzour Mr Speaker, Mersi Mr Speaker. Bonzour tou dimoun a lekout. Mr Speaker letan pou get Prezidan Ramkalawan ler i fer son bann prezantasyon aletranze, ou kapab vvar klerman ki en dirizan ki donn son bann koleg aletranze bokou respe.

E i donn sa bann *forum* partou kot i ale, sa respe ki zot bezwen e ki zot *deserve*. Letan ki Prezidan i fer son bann prezantasyon aletranze, i al tre byen prepare avek en *prepared speech* byen reserse, ki in ganny letan pou li *practise* dan lekel i adres bann *issues* ki bezwen ganny adrese dan sa bann *forum* kot i pe prezante.

Me lo lot kote ou get sa menm Prezidan Ramkalawan kot i vin prezant diskour Leta Lanasyon Seselwa i pa'n kapab akord Nasyon Seselwa sa menm

respe, ki i sitan zenere avek aletranzé.

Mon koleg Onorab Georges in konfirmen ki Prezidan pa'n vin devan Lasanble avek en *speech* prepare. I pa'n vin prepare e son prezantasyon pa ti enn ki reserse. I pa enn kot Prezidan in kapab adres bann vre *issues* ki sa Nasyon pe fer fas avek, akoz senpleman ki pa'n prepar li pou fer sa.

Dan sa demokrasi modern ki nou pe viv ladan ozordi Sesel, nou espekte nou Prezidan pe etal sa vre levantay defi ki nou pei e nou pep pe fer fas avek.

Me non selman sa ki i vin avek bann plan konkret e propoz bann solisyon serye, pou Lanasyon kapab diskite e fer resanz ek de otour bann solisyon ki Prezidan in koze.

Prezidan in vin devan nou avek son de lanmen vid, san okenn propozisyon valab. Apre bann Manm LDS i ensiste ki nou lo sa kote latab, nou bezwen fer gro pozisyon devan bann ser koleg. Sa ki nou pe fer la se repons lo diskour Leta Lanasyon.

Diskour li menm pa'n fer okenn propozisyon valid, li ki i annan responsabilite pou zer pei. I pa'n fer okenn propozisyon. E zot le nou ki dan Lopozisyon pou fer

propozisyon pou zot. Sa kalite diskour ki Prezidan in fer sa bann kas dan latet tir la met la, e tourn an ron, i pa en keksoz ki ou vwar i pratike dan okenn demokrasi modern.

Sa stil fer diskour i stil en group dirizan ki Prezidan Ramkalawan in pas 30an son karyer pe demonize.

Sa i stil Prezidan Gaddafi, Prezidan Castro, Prezidan Hugo Chávez. I demann bokou refleksyon lo akoz lemoman ki nou Prezidan in ganny pouvwar i imedyatman adopte stil orasyon sa bann Dirizan ki in toultan demonize.

Sa ki Prezidan in fer par kont i tre enteresan. In servi sa diskour pou li vin eskiz tou son bann *failures*, e pou esey konvenk lepep Seselwa konmkwa ki lafason ki i pe diriz sa pei i enn ki parfe, e ki tou keksoz i pozitiv la ater.

Prezidan in fer en gro zefor pou esey kadre deba dan son faver, e kree distraksyon kot i kapab manipil kot i pa kapab manipil lopinyon.

Pri lavi dan 16 mwan en *complete failure*. Kot oparavan Prezidan ti pou bes pri lavi dan 100 zour. La ozordi Prezidan i dir nou ki pri lavi zanmen pou bese e ki le vre solisyon se logmantasyon saler.

Me portan par le pase in toultan koz kont logmantasyon saler, akoz in ensiste ki sa i kree lezot problemm *downstream* dan lekonomi pei.

Met larzan dan pos Seselwa. Dan 16 mwan Seselwa pa ankor vwar en fout sou antre dan son pos ziska preznan.

O kontrer sa ki Seselwa pe vwar ozordi se larzan kot pe sorti an brit dan son pos.

STC: dan lepase Vis-Prezidan Afif ti eksplik nou ki *STC* ki pe fer monte pri lavi. E ki zot, zot ti pou vin rezourd sa problemm dan 1an. I ti eksplik nou ki *STC* pe *anchor* pri e ki bann lezot marsan i vini e zot tal zis par anba sa pri ki *STC* in mete e sa i ogmant kou lavi.

Me ki zot fer e zot in met zot *RRP* bon, bon Mr Speaker. En senp komodite esansyel ki ti pe vann 22.50 depi 2009 sepa 2010, zot in mont lo televizyon avek en konpanny pou *brainwash* Seselwa avek ponm R25 ki lo *RRP!*

Si ou pou pran zis sa legzanp ponm e swiv largiman Vis-Prezidan Ahmed Afif, konmkwa ki se *STC* ki pe *anchor* sa pri lavi o, si ponm in monte, disel, dile *toilet paper* e lezot in monte an swivan largiman Vis-Prezidan Afif, lekel ki pe fer monte pri lavi? Lekel

ki pe *anchor* sa pri lavi o? Eski se marsan dezonne? Eski se sa enn de Seselwa ki *travel* pou aste de pti keksoz lepep Seselwa i bezwen zize pou li menm.

Bes pri lavi zot in *fail*! Met larzan dan pos Seselwa *fail*! Servi *STC* bez pri lavi *fail*! O lo 100 !

Rezon *speech* Leta Lanasyon en *failure* konplet e total. In napa en *speech* lo Leta Lanasyon ki'n ganny fer sa lannen. Enn bann problemm Prezidan avek son Gouvernman, se ki ozordi zot pe soufer avek en kriz idantite. Prezidan ozordi pe siport aplodir tou kalite keksoz ki ti kont dan lepase.

En lot size ki mon oule tous lo la, i enn ki bokou siporter *SNP* i santi zot tre konsernen avek. Bokou zot, zot in santi ki zot in ganny anbete. Pandan 30an zot in anmenn en lalit kont *IDC* e kont Mr Glenny Savy personnelman.

Zot in ganny dir ki *IDC* i en *playground* pou bann elit; ki zis bann privileye ki annan akse avek bann zil *IDC*; ki ti annan labi lo nou bann zil. Taler nou'n tann ankor sa menm parol, ki bann resours *IDC* ki sa avyon ou bato, ti pe ganny itilize zis ou plezir serten. Me ki *SNP* ozordi *LDS* ti pe vin met en lafen avek tousala. Zot ti pe vin met lord

dan keksoz ti pe vin retourne
nou bann zil avek nou.

Me sa ki zot in rekolte set
en gro desespyon. Ozordi sa Mr
Savy ki zot in pas en trantenn
lannen pe lager kont, ki'n zot
bête noire pandan tou sa lannen
i posed plis akse e lenfliyans
avek zot Prezidan, ki okenn zot
bann aktivis SNP!

Ozordi IDC in vin
playground eksklisiv bann
nouvo elit avek zot fanmir, zis
parey yer ti *playground* bann
ansyen elit. La preznan zot ava
konmans konpran, akoz ki sa
sanzman in sanze pou vin
transformasyon.

Akoz ki Prezidan avek son
lantouraz i per sa mo
'sanzman.' E ki zot bezwen al
fouye pou ganny en lot mo, akoz
zot pa'n 'sanze' me zot in plito
'ranplase.'

Sanzman in *fail* e siporter
lizye pe konmans ouver e pe
realize ki sanzman in *fail!*
Aprezan zot per pou asosye zot
avek sa mo 'sanzman' alors
sanzman in sanze, pou vin
'transmandirin', se pa
transformasyon.

Ozordi i pe dir nou ki
Lapolis e krim e i pe dir nou ki
nou sa konmsi i en gran
lakonplisman pou li.

Mon pou dir felisitasyon
Lapolis. Bravo pou zot bon
travay. Me Sesel i annan en

gran logmantasyon dan krim e
se sa e sa se pa Lapolis ki lakoz
e i pa ni Lapolis ki pou akord
solisyon. To kriminalite pou
Zanvye e 2022 in plis ki double
sa ki ti pou Zanvye 2021.

E sityasyon pe vin pli pir.
Prezidan pa'n koz ditou lo sa
size in zis pase e in dir nou ki
Lapolis pe detekte krim e ki tou
keksoz i pozitiv dan pei. Ki
mannyer eski tou keksoz i
kapab pozitiv, letan nou annan
en leksplozyon kriminalite dan
pei ?

Issues pertinan i ti
bezwen ganny adrese par
Prezidan, pri lavi, larzan dan
pos Seselwa e sa leksplozyon
dan kriminalite. Sa i bann size
enportan ki ti'n devret ganny
adrese par Prezidan.

Kot i ti'n devret vin ental
en bon plan pou lefitir e fer
bann propozisyon konkret.
Dan mon lopinyon i fer de
lannen konsekutiv, kot in napa
en diskour lo vre Leta nou
Nasyon. Sa zafer debout la
devan tir la met la kas dan latet,
e tourn an ron i pa en bon
formil. Me plito en mank respe
e en lensilt pour sa pep. *Do
better Mr President !*

Sa ki nou pe vwar ozordi
dan nou pei, se ki i annan en
kantite keksoz ki'n kase. E nou
Prezidan i per pou li abord sa
bann size. Olye avanse

konmans sa zomz brav i pe fer nou krwar i été, in prefere pou zis tourn an ron e pa prezant en vizyon kler lo lavenir nou pei. Les mwan donn zot en pti apersi sa ki mon pe sey dir.

Larme;

Ozordi dan militer bann zofisyen i dan en leta lensertitud. Komite disiplinen *SDF* pa kapab aplik disiplin lo solda, akoz i annan lenterferans politik dan travay militer.

Ozordi solda i antre sorti avek sivilyen lo kan. Disiplin dan militer pe konmans kase akoz lenterferans politik. Lapolis;

Ozordi Komite Komisyoner Lapolis i parey en drayver lo en sit deryer e Lapolis pe ganny kontrole parey enn sa bann *drones* ki zot in ganny kado avek Angle.

Lord ki Komisyoner pa konnen i desann sorti anler. E la ozordi zot oule pran laglwar serten zofisyen ganny disiplinen. Me bann zofisyen byen konekte ki pe met fizi dan latet sivilyen, pe ganny kasyet e proteze.

Koerans komann dan Lafors Lapolis pe kase akoz lenterferans politisyen.

MR SPEAKER

Onorab esper mwan en pti kou. Mon remarke ou pe fer en

kantite alegasyon. I annan en Clause.

HON SEBASTIEN PILLAY

(Off-Mic)

MR SPEAKER

Onorab Pillay ou ava les mon koze silvouple. Ou ava les mon koze Onorab Pillay? E mon pe demann ou en pe respe. Nou pe respe ou.

HON SEBASTIEN PILLAY

(Off-Mic)

MR SPEAKER

Arete, arete sansan mon pou demann ou pou sorti. Onorab Loze mon pe remarke ou pe fer en kantite alegasyon ki napa sibstans. Mon konpran politik. E in annan politik, me selman dan la seri alegasyon ki ou'n fer kont bann lafors, i annan lenplikasyon ki mon pe demann ou pou vey byen.

Alor zis fer sir kwa ki tou nou bann limite lafors lotorite san ki i annan en fonnman ki ou kapab met devan. Mersi. Ou ava kontinyen.

HON JOHAN LOZE

Mersi Mr Speaker. E mersi pou ou gidans. Zidisyer li menm li politisyen i dir avek dimoun

"Mon'n call Ronny."

"Mon'n dir Ronny."

"Mon fek diskit avek Ronny." Selman li i le nou krwar ki Zidisyer i endepandan. Kan saler parol pe sap li san ki li menm i realize. Konfyans dan Zidisyer pe konmans kase, gras a lenterferans politisyen.

Ozordi nou annan en group mersener Angle dan nou pei ki pe aplik zot lekor pou *blackmail* bann Avoka Sesselwa. Eski nou pa en pei souveren e nou? Eski nou kolonizater in retournen e nou, nou bezwen bese, pwenti e postern nou devan nou Met Kolonyal e personn napa drwa dir nanryen.

La mon'n dir la! Mwan Loze ki'n koze! Larg zot bann Angle lo mwan aprezan.

Lasante pe fer fas avek en ta defi zis parey Ledikasyon. E garson nou Dirizan li i al menas *nurse* Lopital. E zis akoz ners pe aplik Polisi Lasante Piblik pou pa les tou le de paran antre lo *ward* an menm tan. Leta nou Nasyon i osi ki moral pe konmans kase dan Lasante.

Fanmir Rwayal i oule fer ton anmenn dan bwat sardin. Dokter Gedeon, fodre ki ou get ladan.

La sezi par ACCS i ganny fer an fanmir konmela. Se CEO STC ek son msye ki al fer lasezi diven dan lakaz Mr Mukesh.

Mon pa konnen si nou fer *tourism* lasezi konmela. Letan 800 kes diven sezi i desann set msye CEO ki dray *pickup* STC avek diven sezi ladan.

Eski CEO STC in vin lantrepriz prive serten fanmir? Eski zot in lev STC pe fer kado avek zot aktivis e pou sa ki zot pe triyang antre fanmir?

MR SPEAKER

Onorab Loze. Re kontinyen fer alegasyon serye kont bann antite piblik san fonnman, mon pe dir ou tou sa bann alegasyon i serye. Mon pa anvi aret ou koze.

Me selman ou bezwen veye ki ou pa fer sa bann alegasyon san fonnman. Kontinyen *please*. Sey revize.

HON JOHAN LOZE

Mersi Mr Speaker pou ou gidans. Pros pou mon fini lo sa sesyon.

ASP:

Sa fame meyer *ASP* ki napa larzan pou asiste dimoun ki dan bezwen. Sa fame meyer *ASP* ki nepli donn pwason, me ki ti sipoze donn lanmson. Me ki ni pwason, ni lanmson pa donne.

ASP i depans plis ki R80,000 pou sanz logo ek *stickers* dan biro. Zot in depanse pou penn dan zot

batiman byen zoli, zis akoz ki zot sipoze pe resevwar en vizit Prezidansyel ozordi. Depans larzan dan frivolute, me selman zot napa pou asiste sa pep dezespere. Tou sa e plizyer ankor ki mon kapab site, konman bann sir ki keksoz pe konmans kase dan nou soyete.

Sesel ozordi i annan en gro malez ki'n apoz lo nou pei e pe trangle nou pep! Prezidan pe koz nyaz nwandr labous plen, kan sa ler ki prezan ki nyaz nwandr pe antre ek nou e pe trangle nou.

I paret mwan ki Prezidan pa pe trouve kote ki problem i ete. Ouswa si i trouve i kanmi akoz i konnen ki li avek son Gouvernman, zot konpletman en..ka..pab pou aport okenn solisyon.

Travayer servis piblik in *top* dan sa deba. Sa in konmans depi avek Prezidan Ramkalawan ki'n bezwen zistikasyon, pou eksplik viktimizasyon siporter US pe soufer dan servis piblik.

Kot siporter US pe ganny pouse san okenn rezon valab. Alors zot in evant en zistwar lanmen ek lipye lo fren. Lamazorite siporter US ozordi i per ki zot ava ganny viktimize e perdi zot bouse manze avek sa Gouvernman "ek nou pa ek nou." Sa bann dimoun pa ni pe

menm reve pou al fer okenn sabotaz dan Gouvernman akoz zot per.

Sa i zis en lot mansonz parey sa zistwar met pwazon dan dite Prezidan, en lofans sitan grav ki pa'n zanmen ganny raporte avek Lapolis.

E la mon oule ki bann travayer dan servis piblik i port en pe latansyon. Ozordi in annan dimoun ki'n travay zot lavi antye dan servis piblik. Ki'n aret travay depi an Novanme still pa ankor ganny peye zot bann benefis.

I annan travayer ki'n ganny 20an servis mwan Desanm ki ankor pe esper zot peyman gratwite ziska ozordi. Nou isi anndan nou'n fini ganny tou sa ki pou nou.

Travayer servis piblik normalman pa *mind* esper en pe. Apre tou zot en bann dimoun tre rezonnab. Me apre ki ou'n aras zot trezyenm mwan saler, ou'n koup zot *long service allowance* e *performance allowance* in senpleman evapore dan divan, la zot pe konmans perdi pasyans.

Nou isi anndan ki byennere pe asize e koz fristrasyon labous plan. Kan nou bann frer avek Seselwa ki travay servis piblik, pe sibir fristrasyon toulezour depi ki sa Gouvernman enkapab in pran

labar. E nou annan kouraz pou apel zot, bann saboter.

Travayer servis piblik pe ganny akize maltrete e menase par en group dimoun ki pli eze dan lasosyete. Depi son Prezidan, Minis, MNA nou tou nou byennere konpare avek nou bann frer ek ser Seselwa ki toulezour pe eskente.

Nou isi anndan nou pa kalifye pou maltret personn. Nou pa kalifye pou nou antre ledwa lo personn. Si nou pa kapab met zot soulye pou 5 minit, e posed en pe konpasyon pou zot sor, mye vo ki nou ferm nou labous e reste nou byen trankil dan plas vin sant bann kantik lipokrizi!

E koman size servis piblik permet mon pou dir de parol lo sa lapel pou linite. Ler zot pe viktimize pouz nou bann siporter ki travay dan servis piblik anba fo preteks fren, sa pa pou zanmen kree en bon latmosfer pou anmenn linite dan pei.

Me selman mwan mon pou inifye avek zot dan sa lapel ki zot pe fer krwar ki zot pe fer, ki zot pe fer krwar ki zot pe lanse pou ogmant lapey bann travayer ki pli ba.

Akoz sa ti nou largiman primer dan deba Bidze. E si zot ti vreman senser avek linite, zot in devret inifye avek nou lapel

depi dan deba Bidze. Letan ki nou ti pe diskite larzan. Dan plas gaspiy letan Onorab William, pou aprezan vin demann ogmantasyon saler dan labsans Minis Finans.

En lot keksoz ki mon anvi diskite se zot *penchant* pou prokrastinasyon e gaspiyaz letan. Zot sipoze annan zot en Prezidan ki for e ki kapab fer desizyon. Me solman tou pti keksoz anba soley bezwen diskite, konsilte e gaspiy letan.

Zouzou adilt bezwen diskite pe fer *survey*, be annou bouze. Akfer ki nou pe kole lo sa bann size? La yer nou'n ganny dir fodre fer deba lo *gay marriage*, avek dekrimilizasyon kanabis. Nou en *Legislative body* nou. Zis anvoy Lezislasyon enn fwa fini. Si i pase i pase, si i pa pase i pa pase, akfer ki nou bezwen diskite e fer deba dan labsans e morso Lezislasyon. Serye devan nou!

Zis anvoy Prozedlwa e nou ava fer en bon deba edike e enformen ki ava elev nivo nou tou. Mon pa konnen akoz ki nou pe pran plezir pou trennen lo sa bann size. Petet zot pa enportan pou mwan avek ou, me i annan dimoun ki vreman santi zot afekte dan sa pei.

Nou pa kapab pe eternelman tourn an ron lo size

ki afekte direkteman lavi bann frer ek ser Seselwa. Annou pran nou en desizyon, e *move on* silvouple.

Mr Speaker si i annan en keksoz ki mon krwar ki nou devret koz lo la, diskite e sey aport *awareness* koman en Nasyon, sa se sa to eleve dan swisid dan nou pei.

E la osi zis parey lo kriminalite, mon santi ki Prezidan petet in mank en bon loportinite pou adres sa size.

Premye fwa ki mwan personnelman mon ti lev sa size anndan sete an Mars 2021, kot mon ti poz *PS* Lasante Dokter Valentin en kestyion lo sa size swisid.

Nou pei i bezwen mont en konpanny *awareness* ase agresiv dan en zefor pou sey rezerv sa lavi nou pep ki sitan presye. Nou *urgently* bezwen en bon *community response plan*, pou esey adres sa size e pou permet ki dimoun ki bezwen ava ganny sa lasistans ki zot bezwen.

Mon lot pwen i konsern bann regilasyon Lasante Piblik. I byen bann regilasyon in ganny an leve. Mon krwar ki sa pep in ganny en bon moman respirasyon, kot nou ava kapab santi nou en pe pli lib. Menm si zis pou 5 minit.

Mon swete ki nou servi li byen dan en fason responsab pou nou protez nou prop lasante, sa ki pou nou fanmir e nou vwazen osi. Me sa ki rann anbete, se ki ler tou restriksyon in ganny anleve, sa enn ki gouvern rasanbleman piblik ki ava kapab permet sa pep desann, pou eksprim son fristrasyon piblikman, li i ankor an fors.

Ennler ou a krwar ki zot pa le ki sa pep i kapab zet son fristrasyon dan en fason trankil e dan lape. Kot i ava kapab manifeste e eksprim son douler soufrans e mekontantman avek lafason ki keksoz pe ale.

Zot oule kontinyen manipile pou ki sa pep fristre e anmer *as long* ki zot, zot kapab kontinyen donn bal dan *first class Emirates* e dan lotel 5 zetwal. Sa i *ok* pou zot.

Mon pa konnen ki sa lafreyer ki zot annan, ki zot toultan pe bezwen esey manipil zot oponan politik dan en zefor pou sey defavoriz li. Kwa ki zot pe per? Les laliberte renye dan sa pei.

Zot pa kapab dir avek sa pep konmkwa ki i lib, me selman zot pe servi regilasyon lasante piblik pou *curtail* son drwa lekspresyon atraver manifestasyon. I mal sa Mr Speaker !

Mon lot pwen i konsern sa zafer lanmes *State House*. Le 24 Oktob 2020 Seselwa ti sipoze elekte li en Dirizan; en Sef Gouvernman, en Sef Deta. Se sa ki ti ganny determinen par rezulta Eleksyon.

Napa personn ki ti al dan bwat vote pou elekte en Pret. E mon plis ki sir ki si tou keksoz ti pe mars byen, nou pa ti pou vvar prezans larelizyon kot pe ganny servi dan lenstitisyon Leta.

Mon en dimoun ki pa'n zanmen kapab kasyet ki mon en non-krwayan, me Konstitisyon Sesel i egalman fer kler ki Sesel i en pei sirkiler ki posed en separasyon antre kler ant legliz avek Leta.

Si Prezidan pe *fail* konman en Dirizan konman en Sef Deta e en Sef Gouvernman, i pa kapab servi larelizyon pou esey anbet dimoun e kree distraksyon. Prezidan i lib pou li antre dan son legliz, a nenport ki moman pou li al fer son lanmes.

Me i devret aret abiz lenstitisyon Leta ki a son dispozisyon, pou deservi son fonksyon konman Sef Deta, e non pa konman en Prêt ! Atraver listwar larelizyon, in toultan ganny itilize pou manipil sa ki pli feb pou gard zot dan lapovrete.

Mon vreman per ki se sa ki nou pe konmans arive Sesel ozordi. Prezidan i bezwen pran li en desizyon si i pe *fail* konman en Dirizan dres son bord e aranz son performans. Napa sa zafer servi larelizyon konman en *shortcut* pou anbet dimoun.

La ki nou pe arriv a lafen, i annan de pti obzervasyon ki mon oule fer lo sa ki'n deroule isi anndan. Letan nou asiz isi anndan ou tann bokou keksoz. Ki annan de fwa tant pou annou vreman ebete.

Yer in annan en Onorab ki'n dir ki *STC* in fer profi avek *RRP*. Apre tou sa lager ki zot pe sey lager pou fer Seselwa krwar lizour pou aswar avek sa zistwar *RRP*, li in vini byen varyan e in les kabri sape e taye.

Laverite in sap li konmkwa ki *STC* pe fer profi avek *RRP*, be ki kalite galimatya sa? Kwa ki zot pe sey fer? Seselwa port byen latansyon. *RRP* pa en zouti pou ou profi konsonmater. I pa en zouti pou benefisyé ou. *MNA* isi dan Lasanble Nasional *MNA LDS* yer in les nou konpran ki *STC* pe fer profi avek *RRP*. La i la laverite.

Vandredi in annan en lot ki'n dir nou ki sa bann bayer defon tel ki *IMF*, zot pret ou larzan avek bokou, bokou

kondisyon. Depi ler ki zot Gouvernman in al kot *IMF* napa personn ki'n kapab vin devan pou devwal konteni sa programm reform avek *IMF*.

MR SPEAKER

Ou'n ganny 30 minit Onorab.

HON JOHAN LOZE

Sa zafer i en sekre Deta ki Seselwa napa okenn akse avek. La aprezan zot vin dir nou ki in vin avek bokou kondisyon. Be pa i touy ou sa?

Zot in al fer bokou kondisyon sekre par deryer ledo sa pep alors. Bravo *then*, bonn sans. Pros pou mon terminen Mr Speaker. Zis sa de pti bout enteripsyon ki mon pe kouver. Mersi.

Mon pwen final se sa size laenn ek vanzans dan nou pei. Ozordi *SNP/LDS* pe anploy tou zot resours pou esey konvenki sa pep, ki napa okenn laenn avek vanzans ki pe ganny pratike dan nou pei.

Me si vreman sa i leka Msye Prezidan mon oule ki ou eksplik mon laverite lo kwa ki'n arive avek mon zanmi Veronique Adeline ki ziska ozordi napa okenn sarz lo li. Akoz fransman mon revize krwar ki Veronique in ganny akoz en *post* lo *Facebook*.

Sa ti senpleman en legzersis dan laraz ek laenn. Mon ava met ou dan ou plas enn fwa pou tou. Konman mon lo sa size *Facebook* mon pou kit zot avek en dernyen pwen sa i mon dernyen pwen Mr Speaker.

Prezidan John Charles Wavel Ramkalawan i le sel dimoun dan sa pei ki mwan mon konnen ki'n deza admet devan Lakour ki i al lo *Facebook* an servan en fo non.

Prezidan Ramkalawan in le sel Seselwa ki mon konnen ki'n deza admet devan Lakour ki i al lo *Facebook* an servan en fo non. Mersi Mr Speaker.

(APPLAUSE)

MR SPEAKER

Sa dernyen komanter osi Onorab Loze fotespere i annan fonnman. Ou pe koz dan leksperyans personnel la en.

HON JOHAN LOZE

Mr Speaker i *available* lo rikord Lakour lo en *cross examination* Onorab Basil Hoareau.

MR SPEAKER

Ale mon aksepte ou lasirans. Mersi. Bon nou ava kontinyen e prosen entervenan Onorab Philip Monthy.

HON PHILIP MONTHY

Mersi Mr Speaker. Bonn apre midi tou dimoun a lekout. Bonn apre midi tou dimoun Cascade e mon ti ava kontan dir tou pep Seselwa zot kapab remet zot radyo zot televizyon *on prezan*.

(APPLAUSE)

HON PHILIP MONTHY

Mr Speaker pou annan sa loportinite pou kapab reponn diskour Prezidan lo Leta nou Nasyo, i en privilez ki mon bann zabitan in donn mwan. E konman en Manm Lasanble responsab e serye, mon pou fer sir ki mon fer zistis sa 1300 ekek voter ki ti met zot konfyans dan mwan le 24 Oktob 2020.

Ler mon'n ekout mon bann koleg lo lot kote latab koze, i fer mwan demann mon lekor si zot vreman pe pran sa privilez ki nou konman Manm Lasanble nou annan, o serye.

Pou adres Leta nou Nasyon, i loportinite pou nou vin fran avek nou lekor e avek nou bann elektora, letan nou pe adres bann progre ki pei in fer pandan sa dernyen lannen,

E pou osi, e sa i tre enportan Mr Speaker, pou osi fer sorti bann defi ek defayans ki ankor egziste, e propoz

solisyon ki nou personnelman santi a kapab ede rann lavi sa bann ki'n met zot konfyans dan nou, e nou pep an zeneral en pe pli meyer.

Sa legzersis i enn ki serye e mon ti ava swete ki omwen pou enn fwa, Lopozisyon ti ava pran legzanp lo *LDS* ler nou ti lo zot kote latab, e azir konman sa vre Lopozisyon ki zot detrwa siporter ki reste zot, i ti a ekspekte de zot.

Me malerezman se pa sa ki zot in swazir pou fer, apard Onorab Gill, ki mon santi in annan sa grander lespri pou li pa al ganny antrennen dan sa bann retorik banal, ki lezot son bann koleg in al ladan.

Mon'n plito tann zis en bann largiman ki napa okenn sans, pou sey fer Seselwa krwar ki napa nanryen ki pe arive ki bon.

Zot in sey met tou zot kapasite e konpetans dan sa domenn ki nou apel politik popilis, zis pou esey fer Seselwa krwar ki pei i pli dan mal ki ler zot, zot ti pe diriz sa pei lo en baz *trial and error*.

Ler mon'n ekout zot Mr Speaker, zot in esey fer sa pep krwar ki pou premye fwa dan nou listwar, Seselwa pe ganny viktimize akoz zot lopinyon politik.

Dapre zot, vanzans pe ranplas rekonsilyasyon, e kot dapre zot, Sesel napa laliberte lekspresyon, ki enn nou bann drwa Konstitisyonnell, e kot dapre zot, nou pep pe viv dan lafreyer.

Mr Speaker, mon dakor nou en bann politisyen, me selman, menm politik ler ou pe fer, ou bezwen annan serten sans responsabilite e fer li dan en fason ki prop e laverite.

Ozordi, Onorab Audrey Vidot, i oule vin donn nou lesion lo laliberte lekspresyon e lo nou drwa konstitisyonnell.

Kan pandan tou sa lannen ki zot parti in egziste, zot in pas zot letan pil lo nou bann drwa konstitisyonnell, e esey tou fason, menm disparisyon nou bann frer, zis akoz zot ti pe dir non a en sistem ki ti pe opres sa laliberte lekspresyon.

Sa laliberte lekspresyon ki sa Per ki pe asize anler *State House* ti ganny imilye, e kas latet, pou ki sa pep ozordi i kapab kritike ler zot anvi kritike, e dir non ler zot anvi dir non, san okenn entimidasyon e lafreyer.

E Mr Speaker, mazorite sa pep la deor i enn ki'n vin matir politikman e ki konn tre byen lekel ki ti responsab pou senm lafreyer dan sa pei. Lekel ki ti

responsab pou retir zot laliberte lekspresyon.

E la ki se dan *LDS* ki sa pep avek son gran sazes in met son konfyans ladan, e se en konfyans ki sa ansyen Gouvernman in pran *for granted* pandan tou sa lannen, nou, nou pa pe vin fer parey. Menm si zot pe sey lager lebra kase pou sey anbet Seselwa ankor.

Ler ou'n tro pas ou letan abiz pouvwar e fer soufer sa ki pa ti partaz menm lopinyon avek ou, prezan ou konmans vwar nanm.

Ou konmans vwar keksoz ki pa egziste e akiz sa zonm ki'n dedye trwa kar son lavi, pou lager kont tout sort adversite e menm labi fizik pou kapab ouver lizye sa pep e donn li sa dinyite konman en pep Kreol fyier e lib ki i merite, zot oule prezan asosye li avek zot bann pratik degoutan ki ti karakteriz zot fason dirize ler zot ti lo pouvwar.

Mr Speaker, mon pou repet en parol ki Prezidan ti dir, akoz mon santi ki i enportan pou tou Seselwa reflesir fortman lo la, an mezir ki nou avans devan konman en Nasyon.

E sa se i fasil pou bliye. Mon pou 100poursan dakor avek Prezidan akoz wi, mon'n

remarke ki i vre, nou en pep ki souvan nou annan tandans pou nou blyi ase vitman.

Mon souvan poz mon lekor sa kestyon, eski nou ti anvi en sanzman pou ki nou pei i pran en novo direksyon, kot latransparans, la liberte lekspresyon, progre ekonomik i rennyen, e kot valorizasyon nou pep i baze lo zot valer konman en imen, me non pa lo zot valer lo valer zot vot zour eleksyon?

Oubyen, nou ti anvi en sanzman akoz nou ti pe anvi bann faver personnel e kot tel parey sa ki ti la avan ti fer, nou osi nou ti pe rod sanzman pou nou byen pase parey.

Mon pou admet ki wi, i annan en pti group ki swadizan nou bann siporter, ki malerezman pe les sa bann *spin doctor* zwe avek zot lentelizans. Annou serye nou.

Comme dir Minis Ferrari, fer atansyon sa bann sanson lasirenn, akoz zis en landrwa ki zot pou anmenn ou, e sa se dan kannal.

Mr Speaker, kritik i normal, e mon napa okenn problem ek sa mwan. Me ler ou pe kritike, fer sir ki ou osi pe propoz solisyon.

Zot pe dir ki pri lavi i ankor o, e pe kontinyen ogmante. Si zot ti vreman annan byennet sa pep a ker e

zot 25mil siporter si i ankor reste zot 25mil menm, dir nou ki mannyer zot, zot ti pou fer desann pri lavi la a sa moman ki nou ladan?

Kot Gouverner Labank Santral ki enn bann madanm profesyonnel pli byen respekte lo nivo *L'Afrique* dan domenn finansyel, in predir ki pri lavi pou kontinyelman monte, akoz bann fakter ekstern ki nou napa okenn kontrol lo la. Zot zot oule fer nou krwar ki si zot ki ti lo pouvwar la, zot ti pou fer desann pri lavi. Dir nou ki mannyer zot ti pou fer sa?

Selman ler zot ki ti pe dirize, e dan bann kondisyon bokou pli favorab, ki la nou pe retrouv nou ladan zanmen zot in kapab arive fer desann pri lavi.

Mr Speaker, diskour Prezidan in ganny dekrir konman enn ki ranpli ek lipokrizi ek bat latet.

Eski \$100 milyon rediksyon lo det *Air Seychelles* i en bat latet sa? Mwan mon vvar li tou le kontrer. Se zot bann entrevansyon ki ranpli avek bat latet e lipokrizi. E Seselwa i vvar zot dan kler.

Mon asire ki si Prezidan ti'n vin fer bann lanons ki zot pe dir i ti'n devret vin fer pou donn lespwar Seselwa, deswit ou ti pou pe tann zot pe dir ki sa pa

pou posib e ki i pe zis anbet Seselwa. Sanmenm ki santer Ricky Ras i appell politrik sa.

Mr Speaker, mon kontan pou tande ki finalman, apre plizyer promes par plizyer zot bann Minis e Prezidan pandan en leternite, ki finalman bann Digwa pe al ganny zot lopital. Be sa pa ozordi yer sa?

Be olye apresye, mon bon zanmi Onorab Uranie, in deside pou pas en bann remark sarkastik.

Atraver ou Mr Speaker, mon oule dir Onorab Uranie ki mon fyer pou li.

Pandan ki tou son bann predesesser in *fail* avan li, li i pou sa enn ki listwar pou dir ki sa Lopital ti ganny konstrir pandan son manda.

Alors silvouple annan kouraz alors pou remersye sa Prezidan omwen.

Mr Speaker, Leta nou Nasyon parey ki Prezidan in koz lo la, i enn ki donn bokou lespwar pou lavenir. I enn ki montre nou ki bann desizyon difisil e brav ki'n ganny pran, ti bann ki'n byen ganny kalkile e sa pe permet retir Sesel anba sa trou san fon kot i ti ete, e remet li lo semen progre.

Eski nou'n fini reisir? Larepons i non. Me bann sir progre i la pou nou tou vvar, e Bondye pitye avek bann ka

COVID ki'n konsiderableman desann, e bann restriksyon ki'n ganny retire, sa i ava ede donn plis loksizenn nou lekonomi, menm si nou konn tre byen ki sa sityasyon Ikrenn i enn ki pou osi poz serten defi pou nou lekonomi.

Me i annan en keksoz ki tou Seselwa in bezwen remarke depi ki sa Gouvernman *LDS* in mont *State House*.

E Sa se ki deplizanpli nou pei pe ganny asiste par plizyer pei e lorganizasyon internasyonal, akoz konfyans dan sa Gouvernman i tre o, e sa pan zis arriv par laverti,

Me par konfyans ki kominate internasyonal i annan dan *leadership* aktyel sa pei, me ki pa ti forseman le ka avek sa ladministrasyon presedan.

Mr Speaker, kantmenm nou'n ganny akize konman bann *yes men*, nou tou nou konnen lekel ki bann vre *yes men* dan sa Lasanble.

Akoz mwan, tou dimoun i konnen ki si mon santi en keksoz pa pe mars byen mon pou dir. E wi, i annan bokou pou nou amelyore ankor, menm si nou'n fer bokou pandan sa 15 mwan ki nou'n lo pouvwar.

Servis publik i reste enn bann pli gran defi, e sours fristrasyon prensipal nou pep.

Me avek novo lapwentman e reform ki pou ganny anonse byento, mon espere ki nou pep ki parfwa pe malisyezman ganny fer tourn an ron par serten pyon politik dan bann biro ek Minister, a vwar sa sanzman e zot difikilte ava ganny soulaze.

Zefor ki pe ganny mete pou ki birokiasi i ganny eliminé e kot nou pe bouz dan en sistem *e-government*, pou ede retir plizyer prosesis initil ki souvandfwa i sours fristrasyon nou pep.

Progre i osi remarkab dan nou lafors Lapolis. Krim pe ganny detekte bokou pli vit e pli gran poursantaz bann kriminel pe ganny prosekte.

Me Mr Speaker, i kantmenm en sours fristrasyon parmi nou pep, ler ou vwar en endividé ki annan en lalis bann sarz kas lakaz e vole kont li, me ki pas devan Mazistra e ganny large.

Osito ki zot ariv deor, zot kontinyen avek zot bann aksyon kriminel kot nou bann frer ek ser ki'n travay dir, i kontinyelman ganny vole zot bann posesyon, par sa bann endividé ki ti sipoze deryer en baro, me non pa an liberte, pou kontinyen teoriz nou bann zabitan.

Mon'n fek personnelman temwanny en ka kot mon pe reste, kot sa zofisyè Lapolis ki ti vin lo *scene* ti vreman montre son fristrasyon avek en tel sityasyon. Keksoz pou bezwen sanze akoz nou pa pou kapab kontinyen koumsa.

Avek konstriksyon sa novo sant rimann, mon zis espere ki sa a ede retir sa bann malfeter dan nou kominate.

Mr Speaker, mon pa tro konnen ki legzanmen oubyen prosesis ki nou Lafors Lapolis i servi pou promot son bann zofisyè, me sa ki mon ti a kontan dir se annou fer sir ki sa bann metod i efektif, e pran kont abilite tou sa bann zofisyè.

Si annan nesesite pou fer reform, silvouple annou fer li. Akoz i pa normal pou vwar en zenn zofisyè avek 10an servis, ganny kit ater a sak fwa ki annan promosyon.

Rekonesans zefor sa bann zofisyè ki pe travay dir i enportan pou kit zot moral o, e en lankourazman pou zot kontinyen donn le meyer de zot menm.

Mr Speaker, amelyorasyon dan rezulta IGCSE, i donn nou lespwar ki nou sistem ledikasyon pe pti a pti fer progre. E konman en edikater par profesyon, sa i

donn mwan lespwar ki nou lo bon semen.

Me pli gran defi se ki mannyer pou atir plis nou bann zenn, ki annan en nivo akademik eleve dan sa profesyon, e sirtou nou bann garson pou ki i annan en *gender balance* dan sa profesyon nob.

An fezan sa, nou ava pe asir relev e fer ki nou a pti a pti kapab ranplas bann etranze dan sa profesyon.

Mr Speaker, letan ki mon pe donn repons lo Leta nou Nasyon, i osi enportan ki mon sezi sa loportinite pou adres mon bann zabitan lo leta nou distrik.

Mon'n erit en distrik ki parey mon'n deza dir oparavan, mon pou bezwen admet ki i annan en kantite keksoz ki'n ganny akonpli par mon predeseser.

Me, i annan bokou osi ki mon santi ti'n kapab ganny fer, pandan ki pei ti pe perform byen ekonomikman, me ki malerezman pa'n ganny fer.

Nou sant sosyal ki pou plis ki 6an depi ki in brile, ti'n devret fini ganny konstrir. Sa bann proze semen dan plizyer nou bann sou-distrik ki nou bann zabitan tin ganny promet pandan plizyer lannen pou

soulaz zot bann difikilte, ti'n merit fini ganny fer.

Sa i fer ki avek sa sanzman *leadership* ki'n arive, mon konpran tre byen lekspektasyon mon bann zabitan.

E mon konpran ler annan zot ki *call* mwan e pe demann mwan kan zot pou ganny zot semen, akoz mon konnen zot in fatige espere.

Mon oule asir mon bann zabitan, ki otan ki finansman i la, bann proze semen dan distrik pou ganny fer. E sa san prenon kont ki afilyasyon politik sa bann zabitan ki pou benefisy'e avek i annan, oubyen si annan potansyel pou ki serten endivid'i i benefisy'e personnelman avek bann morso later dan sa landrwa.

Mr Speaker, i enportan pou mwan a sa moman adres sa sityasyon kontra netwayaz dan distrik. Si ou'n ganny sa responsabilite e ou pe ganny peye avek larzan *tax* sa pep, fer sir ki ou delivre, e respekte bann term e kondisyon ou Kontra.

I annan ki pe fer zot travay byen, me par kont, mon pe touzour vwar bann menm endivid'i ki Lotorite konsernen i bezwen touzour deryer zot.

Minis Joubert ti enform nou ki dezormen, se Lotorite

Distrik ki pou deside si peyman pou ganny fer, e dan bann lenstans kot nou pa satisfe avek performans serten sa bann kontrakter, nou pou annan drwa pou retenir zot peyman. Be Mr Speaker, mon pa ankor vwar sa pe arive mwan.

Mon pou alors lans en lapel avek Lotorite konsernen, ki responsab pou atribisyon sa bann kontra, ler sa prosesis pe ganny fer, annou fer sir ki napa okenn politik e faver ki antre dan sa prosesis e ki sa i ganny fer dan latransparans.

Annou fer sir ki napa okenn *MNA* ki annan lentere dan okenn lakonpannyen netwayaz e ki pe servi zot pozisyon pou fer zot bann dalon ganny kontra.

Alors si sete koumsa ki keksoz ti deroule oparavan, anba sa Gouvernman *LDS* sa bann tel pratik fodre pa egziste.

Si kriter i presize ki bann kontrakter *class 1* pa devret pe partisip dan *tender* pou sa bann Kontra netwayaz, annou fer sir ki sa i ganny respekte.

E okenn endividé ki annan laprev ki sa bann pratik koronpi pe deroule, vin devan avek laprev, olye zis kasyet deryer bann pos lo *WhatsApp*.

Mr Speaker, apre 15 mwan dan sa pos, mon'n remarke ki annan serten

endividé in vot pou sanzman, pou zot bann benefis personnel.

E ler zot vwar sa pa pe arive, zot konmans montre zot fristrasyon. Annan ki'n benefisyé anba sa ansyen sistèm, e ki ler zot vwar sa bann priviléz pe konmans sap zot, zot konmans kriy viktimizasyon.

Mon oule asir tou zabitant Cascade ki mon pou kontinyen delivre dan meyer fason ki mon kapab pou mon distrik. Mon en vre Cascadien ki annan zentere mon distrik a ker e non pa mon zentere personnel.

Mr Speaker plizyé zabitant in apros mwan e in eksprim zot lapresyasyon lo lafason ki distrik pe bouze.

Cascade in en distrik kot son Biro Ladministrasyon ou a krwar ti apartenir pou zis serten endividé, e sa ti fer ki plizyé nou bann zabitant pa ti santi zot konfortab pou vizit sa landrwa.

Ler nou pe koz lo Leta nou Nasyon, mon fyer pou dir ki sa in nepli le ka dan mon distrik Cascade.

Mr Speaker, byento Komité Alokasyon pou konmans zwenn pou nou diskrit lo alokasyon bann *unit* lakaz kot sa proze 24/24 kot *PSSW*. Mon konnen ki plizyé zot, zot

in lo lalis pandan plizyer lannen.

Sa ki mwan mon kapab asir zot se ki sa legzersis pou ganny fer dan la transparans, e sa ki son ka i pli merite i a gannyen. Pou napa ni politik, ni fanmir, ni zanmi, ni galan ki pou ganny lakaz. Me tou sa ki pou gannyen i pou baze lo merit.

Pou sa bann ki pa pou ganny en *unit*, mon pou zis dir zot pa dezespere.

Kontinyen pey zot *Home Saving Scheme*, akoz annan ankor proze lakaz dan distrik ki pe ganny planifye.

Proze nouveau bazar Cascade in bouz avek en lavites enkrwayab gras a Minis Ferrari ek son lekip, e tre byento nou bann peser a kapab benefisyé avek sa facilite.

Demars pou lans nou Lasosyasyon Peser in ariv dan en staz final, e mon pou profite pou remersye tou sa ki'n enplike ziska prezan e pou osi remersye tou peser ki'n montre lentere e ki ti reponn nou lapel pou elekte nou Komite Egzekitif.

Avek sa nouveau facilite a nou dispozisyon, nou Lasosyasyon Peser ava ede asire ki sa facilite i ganny servi dan meyer fason posib.

Nou en distrik peser, e anba regar patron nou distrik St Andre ki ti en peser Cascade pou kontinyen vin sa referans kot zabitan dan tou kwen Mahe, i vin rann lapel pou aste zot pwason.

Sport dan nou distrik i demann en novo souf, e se sa ki ansanm avek plizyer endividé ki'n apres mwan nou pe konmans travay pou fer.

Nou tim *volleyball* madanm ki'n en referans dan Sesel e Losean Endyen pe pti a pti retrouv son lidantite.

Mon pou lans en lapel pou okenn endividé e *sponsor* ki anvi vin donn en koudmen pou ede remet nou tim lo sa oter ki i ti été pou vin devan.

Diskisyon pou relans foutbol dan nou distrik in deza konmanse. Mon pou profite pou remersye Mr Toulon ek son lekip ki'n apres mwan personnelman e montre lentere pou remet sa laplenn anler Anse Dejeuner dan en leta ki a konvenab pou nou bann zenn kapab pratik zot sport prefere lo la.

Sa msye in montre lentere osi pou nou anmas sa kantite talan ki annan dan Cascade e fer ki parey Baie Lazare in fer, Cascade osi pou byento annan son lekip foutbol ankor.

E mon pou remersye li ankor pou sa donasyon boul foutbol ki in personnelman fer avek mwan e ki pou byento ganny distribye avek nou bann zenn dan distrik.

Mr Speaker, dimoun sorti dan plizy whole kwen Mahe ti vin vizit nou distrik pandan letan nwel, pou vin admir dekorasyon ki nou ti reisir met an plas.

Zanmen nou distrik in deza briye koumsa e sa lanbyans ki ti annan ti enkrwayab.

I enportan alors ki mon pran detrwa segonn pou remersye tou bann ki'n donn zot letan e lenerzi pou kapab fer sa arive.

E la mon salye zefor Ton Zan nou elektrisyen, Achille Hoareau avek son tim, Andrew Scholastic, mon bann aktivis fidel ki'n la a kote mwan, e tou lezot dimoun ki ti rann lapel pou kapab fer Cascade vin en referans pandan sa letan festivite.

Remersiman osi pou tou bann biznesmenn ki'n reponn nou lapel pou aport zot soutyen, pou ki nou bann zanfan e dimoun aze dan distrik in kapab ganny en pti kado pou nwel.

Mon vreman apresye zot kontribisyon e mon pou profite pou lans lapel pou lezot vin ede

donn en koudmen pou devlop nou distrik byeneme.

Benn Palourd ki ti'n disparet in rekonomans krake e avek bann restriksyon ki'n ganny retire, nou pou fer sir ki lanbyans i retournen dan distrik. Mon oule osi alors remersye Koukou avek son lekip.

Mr Speaker, mon pa pou fer zistis si mon pa adres en remersiman spesyal pou sa lekip ki pe travay kot Ladministrasyon Distrik, sirtou mon DA, manmzel Beguita Melanie.

Nou'n etablir en relasyon travay ki fantastik kot byennet nou distrik ek nou zabitan i pas avan tou.

Sa kantite defi ki annan dan distrik pe ganny adrese enn par enn. E avek retour mon *clerk* ki ti lo konze pandan plizy whole mwan, nou pe form en lekip solid.

Avek plis larzan ki'n ganny met a nou dispozisyon pou bann pti proze distrik, nou pou asire ki sak sou ki ganny depanse, i ganny fer avek bi amelyor lavi nou bann zabitan.

E la mon ava profite pou asir mon bann zabitan anler Anse Dejeuner ki pe pas martir avek sa sityasyon semen kase, ki sa *case* mon'n personnelman met a latansyon Minis

konsernen, e mon espere ki byento SLTA a kapab ganny permisyon pou repar sa semen.

Mr Speaker, travay i en kantite, me lavalonte osi i la. Mon pou lans en lapel avek tou nou zabitant pou nou ini, e met byennet distrik avan byennet personnel.

Nou distrik pe pti a pti ganny transformen. I reste ankor 4an, e pandan sa 4 lannen ki pe vini, plizyer proze pou ganny antreprann ankor. Mon annan en vizyon kler pou nou distrik. Akoz mon en dimoun ki par mon natir, mon pa zanmen les tonbe. Mersi.

(APPLAUSE)

MR SPEAKER

Mersi Onorab. Swivan mon ava apel Onorab Wavel Woodcock.

HON WAVEL WOODCOCK

Mersi Mr Speaker, Mr Speaker permet mon lo la par zabitant Grand Anse Praslin pou prezant nou senser kondoleans avek nou frer Michael Jean-Louis, DA Grand Anse Praslin ki'n perdi son manman, manman Nita yer. Mon anvi dir li ki zabitant Grand Anse Praslin i senpatiz avek li. E ki nou la dan son kote pou donn li siper dan sa moman difisil.

Mon osi anvi profit sa lokazyon pou mon senpatiz avek tou bann fanmir lo Praslin ki'n perdi en pros avek COVID.

Mr Speaker nou Gouvernman anba direksyon Prezidan Ramkalawan pe met bokou lanfaz lo Praslin avek La Digue. Menm si nou pei i ankor lo semen *recovery*, bokou proze in ganny antreprann lo Zil Pros. Mon pou konmans par koz lo devlopman ki mon Gouvernman in anmennen dan mon distrik Grand Anse Praslin.

Premyerman Mr Speaker, mon bezwen felisit Minis Dezinyen ki responsab pour Lapes avek SFA pour tou sa bann proze lapes ki zot in fer pandan sa dernyen 16 mwan. Mon pou osi profit sa lokazyon pou remersye zot pou sa siper ki zot pe donn lakominote peser lo Praslin.

Pou plis ki 12an peser pe demann bann lenfrastriktir ek fasilité, pour devlop lapes artizanal lo Praslin. Mon'n perdi kont lakantite fwa ki mon'n demann Gouvernman US en *ice plant* dan Lasanble e dan plizyer meeting.

Pandan 6enm Lasanble Minis responsab pour Lapes sa letan, ti etabli en komite pour lapes Praslin, ki mon avek Onorab Churchill Gill ti lo la,

nou ti pouse pou plizyer proze lapes ansanm avek lasosyasyon peser ek *PBA* sa letan me nanryen pa ti ganny fer. Sa Minis ti pli tar ganny ranplase avek en lot Minis, ki ti tap kalot dan tou sa ki nou ti'n propoze pou Grand Anse Praslin.

Apre sanzman Gouvernman, novo Minis responsab pour Lapes, Minis Ferrari ansanm avek novo *CEO SFA*, Lasosyasyon Peser e Lotorite distrik, *DA*, *MNA*, *liaison officer* e mwan menm nou ti met nou lanmen ansanm pou fer sir ki bann proze neseser parey *ice plant*, *gear store*, *cold store*, bazar, lasose e lezot proze lapes i konmanse.

Mon fyer pou anonse ki apre plis ki en deseni nou'n finalman ganny nou *ice plant* Grand Anse Praslin. Proze *gear store* ek lofis pe al konmanse byento ki osi enkli renovasyon lo lasose e *desilting* sa *channel*.

Renovasyon in ganny fer lo bazar Grand Anse Mahe, e nou'n fini pran kontrol e netway later otour bazar kot nou pe al konmans travay lo en lot sirpriz pou lakominote peser e zabitan Grand Anse Praslin.

Mr Speaker i mon rev e rev zabitan Grand Anse Praslin pour annan en proze touristik e artisanal vizavi *Airport Amitie*; en proze ki mon'n koz lo la

sances dan sizyem Lasanble e osi dan setyenm Lasanble. Menm si Gouvernman lepase pa'n pran mon e zabitan Grand Anse Praslin serye novo Gouvernman in ekout nou nide e aksyon lo la.

Apre vizit Prezidan lo sa site kot vye *warehouse* STC ti ete ansanm avek Minis Devika Vidot ki responsab pour Lendistri e Lantreprenarya, en konsep in fini ganny drafte ki pou byento ganny prezante avek *Cabinet*.

Sa proze pou benefisyen bann artisan e sirtou bann pti en mwayen antrepriz. Deza travay in konplete pou demoli sa vye *warehouse*.

Mr Speaker en keksoz enportan ki mon'n retire dan ladres Leta nou Nasyon par Prezidan Larepublik, se ki sanzman in arive dan nou pei e ki nou pei pe ganny transformen pou le meyer.

Nou pei Mr Speaker Sesel in pas dan enn bann pli gro defi dan nou listwar. I malere ki apre ki tou sa ki sa Gouvernman in fer pou retir nou pei dan en kriz lasante e en kriz ekonomik, *United Seychelles* olye donn en koudmen, zot in plito fer en bann politik bon marse pou sey bat latet lepep Seselwa

Zot pa'n fer en sou kontribisyon tanzib, ni propoz okenn solisyon. Parey labitud zot in zwe zot sitar 2 lakord e dans zot menm.

Mr Speaker si nou ti'n ekout *United Seychelles* nou ti pou ankor dan en kriz ekonomik sever e 80poursan nou pep pa ti pou'n ganny vaksinen.

Fodore pa zanmen blyie ki *United Seychelles* ti kont reouver nou pei le 25 Mars 2021. Zot ti *boycott* programm vaksinasyon e zot ti anvi gard nou bann zenn lo programm *URS* olye ki zot vin pli prodiktiv dan en lanplwa kot zot ganny en pli bon saler.

Si pa ti bon desizyon Gouvernman, nou rezerv ti pou'n fini, akoz Gouvernman *US* ti pou'n kontinyen *bail out* bann biznes atraver *FA4JR* olye reouver nou lafrontyer pou relans nou lekonomi.

Mr Speaker mon rapel tre byen kriz ekonomik ki nou pei ti fer fas avek, apre ki nou ti ganny tape avek *COVID*. Praslin avek La Digue ti ganny tape pli for akoz nou preski antyerman depan lo Sekter *Tourism*.

Apre ki *Airport* ti'n fermen, e plizyer pei tin ferm zot lafrontyer avek nou, nou ti ater net, ti annan bokou

redundancies. Lo Praslin bokou ti perdi zot louvraz.

Me ozordi Mr Speaker dan zis 16 mwan louvraz i annan an labondans. Louvraz i annan an abondans Sesel pou tou Seselwa. Tou le semenn nou ganny lalis travay dan plizyer sekter avek Minister Lanplwa.

Mr Speaker Praslin menm i annan *GM* ki *call* mwan personnelman e anvoy mon lalis travay dan zot lotel pou ed zot ganny dimoun pou travay. E mwan personnelman mon'n ed plizyer dimoun ganny louvraz.

Yer Onorab Ernesta dan son entrevansyon i ti dir ki napa louvraz Sesel. Mr Speaker i kler ki i pa konekte avek larealite Sesel ozordi. Olye zis konplent *point* sa zenn dan en bon direksyon, *point* sa zenn dan en bon direksyon *point* sa zenn dan en direksyon dir li kot i pou ale pou li ganny asiste kot i merit ale pou li kapab ganny en louvraz.

Mr Speaker dan 16 mwan nou Gouvernman in akonpli bokou. Zis fer en konparezon kot nou ti été, ler *LDS* ti antre dan Gouvernman e kot nou ete ozordi.

Dolar ti R22 me ozordi i mwens ki R15. Nou nepli pe viv lo lavans Labank Santral. Larzan pe antre dan Kof Leta

olye kit kof pou antre dan pos serten endividé.

Saler tou Seselwa i garanti ozordi akoz bon zeson larzan Leta e bann desizyon stratezik nou Gouvernman pou asire ki reveni i antre dan nou pei.

Nou Gouvernman in propoz plizyé Prozedlwa ki'n ganny laprouvasyon Lasanble Nasyonal, pou ranforsi plizyé lenstitisyon Gouvernmantal.

Bann Lalwa ki ranforsi nou lalit kont koripsyon e vol. Nou'n ranforsi Komisyón Anti-Koripsyon e ozordi nou pe vwar rezulta. Nou'n ranforsi Lalwa *POCA*, pou dil avek bann larzan ek lezot *asset* malaki. Lalwa kont blansisaz larzan osi in ganny ranforsi.

Nou Gouvernman in ferm plizyé *Board* ek lazans ki swa ti en *duplication*, swa ti pe mal zer larzan, ouswa senpleman pou koup gaspiyaz kot i pa neseser.

Ti annan plis ki en santenn *Board* e nou Gouvernman in reviz tou sa bann *Board* e gard selman bann ki neseser. Fodre note ki plizyé milyon ti pe ganny peye pou bann manm *Board*, menm si i annan *Board* ki pa ti pe zwenn preski ditou.

Mr Speaker sak lakour i bezwen met en pti larzan akote pou letan dir. I paret ki Lopozisyon pa tro konpran sa,

zot le nou donn bal dan larzan rezerv parey zot ti pe fer san pran kont ki pei i bezwen annan en *safeguard* pou letan dir. Pou fer sir ki i annan larzan pou aste komodite de baz, manze, karbiran e latizann an ka *emergency*.

Lemonn i ankor pe lite kont *COVID-19*. Menm si i paret ki nou pe ariv a lafen sa pandemik i toultan enportan ki nou annan en rezerv. Deza avek lager *La Russie/Ukraine* in fer ki pri karbiran in mont ankor e byento Sesel pou perdi en marse touristik enportan.

Avek bann mezir ki Linyon Eropeen in pran kont bann labank *La Russie* kot i konsern *SWIFT*, nou pou perdi bann kliyan *La Russie* e osi bann kliyan *Ukrainian*.

I kler Mr Speaker ki nou lendistri *tourism* in refer pandan sa dernyen 1an. Dan dernyen 3 mwan 2021 *arrival* ti retourn lo nivo 2019, e menm plis.

Nou lapriyer Mr Speaker se en lafen avek sa lager *La Russie* kont Ukraine, ki *L'Europe* i kapab retourn normal, nou lapriyer i avek lepep *Ukrainian*.

Mr Speaker i annan bann bon Diplomat dan nou Gouvernman. Prezidan ek son lekip, Minis ki responsab pour

Zafer Etranzer e lezot manm *Cabinet* atraver bann vizit bilateral e miltilateral ki zot in fer aletranze, Sesel in benefisyé avek plizyer don ek kado bann pei zanmi.

Nou'n ganny plizyer donasyon vaksen san ki nou bezwen pey en sou. Nou'n ganny donasyon lopital, latant, *ventilators* ki kout vreman ser.

IMF in annan konfyans dan nou Gouvernman pou donn nou en *loan* \$105 milyon, e *IMF* i satisfe ki Sesel in redwir son *Budget deficit*, e nou'n menm ganny en sirplis bidzeter e asir soustenabilite nou bann det.

Annou pa blyi sa lagreman 'kabri dan sak' ki Gouvernman avan ti sinyen avek *Etihad Airways* ki'n kit nou *Airline Air Seychelles* avek en det enorm avek bann *bondholders* ek sa *airline*. Gras a bon desizyon nou Gouvernman, ozordi *Air Seychelles* in kapab redwir son det par \$100 milyon, en det ki ti \$150milyon, ki 3 fwa plis ki sa \$50milyon disparet dan kont *SMB*.

Mon *welcome* deklarasyon *Platinum Committee* pou reviz bann restriksyon e retir lamazorite mezir lasante piblik pou fer ki lepep Seselwa i kapab respire.

Sa *curfew* 11er ti annan lenpak negativ lo bann biznes ki ti bezwen ferm zot laport pli boner. Avek desizyon pou tir sa *curfew* bann biznes i ava kolekte plis reveni, e Gouvernman i ava anmas plis larzan *tax*, sirtou atraver bann biznes lwazir.

Mr Speaker en keksoz i kler, apre 43an ki *US* in manz zot rezim bannann, ozordi zot pe sey anvoy zot ta lapo lo nou.

Zot pe sey fer krwar ki tou zot bann move pratik ki zot in fer dan le pase ozordi nou ki pe fer.

Mr Speaker ekout telefonn, viktimiz dimoun, napa drwa lekspresyon, napa drwa lapres, koripsyon, gaspiyaz larzan, koripsyon, e tou sa bann lezot keksoz ki'n vin sinonim avek *United Seychelles* ozordi zot oule anvoy lo nou. Ozordi zot annan lolasite pou sey anvoy sa bann keksoz lo nou.

Mr Speaker anvoy sa ki zot oule lo nou, Seselwa i vwar zot, tou sa ki zot anvoye pou pas parey delo lo fey sonz. I annan en vers dan Labib ki dir avan ki ou tir lapousyer dan lizye ou kanmarad tir sa poto dan ou prop lizye.

Mr Speaker Seselwa in fini debiste zot. Ozordi lo plizyer Lendeks enternasyonal Sesel in

amelyor son pozisyon. Lo lendeks laliberte lapres, laliberte lekspresyon, lendeks koripsyon e lezot ankor in fer en gran progre e bann lorganizasyon enternasyonal pe felisit Sesel.

Menm sa let ki *Leader United Seychelles* in anvoy *UN* lo swadizan labi drwa imen, ziska ozordi nou ankor pe esper larepons.

Silvouple Lepep Seselwa ti ava kontan vwar sa larepons. Ozordi nou Gouvernman i bezwen koriz tou sa fot ki Gouvernman *SPUP/SPPF/Parti Lepep e US* in fer e i bokou Mr Speaker. Pandan sizeny Lasanble antye zanmen mon'n tann en *Leader ouswa* en Manm *US* koz lo leta kaso, landrwa rimann, me le moman ki enn de zot bann zwer i ganny atrape e sarze, kaso pa bon, napa matla, napa *aircon*, napa *flat screen*, napa soley eksetera,

Kot zot ti ete tou sa letan ler nou bann frer ti pe ganny met dan kaso ouswa rimann? Sa bann kalite ipokrizi fodre arete Mr Speaker.

Mr Speaker bann Manm *US* i konpran tre byen kwa ki pe arive Sesel e aletranze. Me zot pe fer zot politik, ki normal, menm si i pa en politik ki ankouraz responsabilite, me i plito en politik ki ankouraz

depandans e depans larzan san pran kont demen.

Mr Speaker mwan avek Onorab Gill, en Manm lo lot kote latab ki mon annan bokou respe pour li, ki nou'n travay ansanm e met nou lavwa ansanm pour pouse pou plizyer proze enportan lo Praslin, resaman nou ti al en *workshop Ghana* kot nou ti diskrit lenpak *COVID* lo *trade* ek sekirite dan bann pei *Commonwealth L'Afrique*, 13 pei an total.

Ti kler ki lekonomi tou bann pei *L'Afrique* in ganny bokou afekte avek *COVID*.

Nou ti ganny sans vizit plizyer bann *sole traders*, pti e mwayen biznes *Accra, Ghana*, bann *market* ki vann pwason, lavyann e bann *crafts*, lobze artisanal ek lezot ankor. Ti kler ki zot biznes ti'n tonm net, reveni ti'n desann, kou pou ganny materyo ti'n monte, pri bann komodite, bann diferan prodwir ti'n monte. Sa i larealite *L'Afrique* ek lemonn antye.

E parey sa bann pei pe fer fas avek logmantasyon dan kou karbiran, *freight*, kargo, *container* ki'n preski double ki fer ki lamazorite bann komodite enporte in monte, Sesel osi malerezman pe fer fas avek sa.

Lenflasyon i partou, e *purchasing power* dimoun in

desann akoz lenflasyon, e Gouvernman i konpran sa tre byen. Anmezir ki nou lekonomi i refer e pei i anmas plis larzan, i lentansyon Gouvernman pou aziste saler Seselwa pou ed zot kapab *cope* avek sa lenflasyon.

Mr Speaker bann Manm *US* zot konnen sa, me selman zot pa pou dir akoz sa i zot *style*. Zot kritike, kraze, tir lipou me pa zanmen sizer nanryen sibstansyel.

Sel keksoz sibstansyel ki *United Seychelles* in fer pandan sa 16 mwan, se donn en pe goute manrmay ki zot ti arete apre en mwan akoz zot napa transport.

En lot legzant sa zafer lopital La Digue. Olye dir mersi nou konplent menm, swa nou fer petisyon swa nou kraz sa lanmen ki anvi fer nou dibyen. Mr Speaker okenn proze ki sa distrik pa oule anvoy lo nou Grand Anse Praslin.

Praslin nou'n sanse pou ganny plizyer proze, proze semen La Pleine Hollandaise/Pasquiere ki mon ti demande dan sizyem Lasanble pe kontinyen sa lannen. Proze lenfrastriktir Ile Eve ki pe byen ale, byento *IEA* i ava kapab konmans distribye en pe dan sa plis ki 40 morso later.

Lord in ganny mete dan bann later endistriyel, ki ozordi *IEA* pe kolekte plis ki R20 milyon reveni. Lord pe ganny mete dan sa bann zafer aste later endistriyel revann.

Mr Speaker ozordi mon pe get devan, lo fitir e lavenir nou distrik, e mon annan en vizyon pou distrik Grand Anse Praslin. Mon annan en laspirasyon ki mon konnen i laspirasyon zabitan Grand Anse Praslin.

Grand Anse Praslin nou anvi vvar devlopman dan Sekter Lagrikiltir, Lapes, dan *Tourism* ek Spor, *Sports Tourism* e vvar osi bann proze ki pou anmenn lepwizman pour nou bann artizan, artis e *craftsmen* Pralinwa.

Deza nou annan en proze vizavi *Airport Amitie* pou sa sant touristik e komersyal, me i annan en lot landrwa ki nou kapab ankouraz lenvestisman e menm antre dan *public private partnership*, sa se *sports tourism*.

Mon'n kontan tann Minis Devika koz lo potansyel *Sports Tourism* resaman. Praslin i annan potansyel pou devlop sa sekter. Deza nou annan plizyer atlet bann spor lo delo parey *windsurfing*, *kite surfing* ek *wakefoil*. Pandan lazournen nou *watersport centre* i kapab ofer *training* pou en *fee e rent*

lekipman avek bann touris, nou kapab organiz bann konpetisyon enternasyonal parey *sailing, windsurfing* ek lezot *watersports* ki pou atrakte plis touris Sesel.

Zisteman 2 semenn pase nou fek koz avek en envestiser enternasyonal ki pe montre lentere pou envestir dan sa domenn Praslin.

Mr Speaker fodre nou konmans mazin *outside the box*, pran legzanp avek bann lezot pti pei leta zil parey *Saint Barts, Saint Martin e Aruba*, kot zot in entrodwir bann *floating platform*, bann *sunset beach bar*, bann *sunset platform* parey *Key West sunset platform* kot bann touris i kapab servi bann *canoe* pou ganny akse avek bann *sunset bar* ouswa bann *sunset lounge* flotan dan labe ouswa anndan resif lo Praslin.

En lot landrwa ki kapab anmenn plis reveni pou Praslin e Sesel an zeneral se nou bann *nature trail*, ki nou merit fer sir i ganny *Maintain* e ganny demarke byen.

En lot keksoz ki nou merit konsidere ki deza pe ganny fer se annan bann *designated area* kot dimoun, lokal ouswa etranze i kapab kanpe, me fodre zot pey en *fee* pou kanp dan sa bann landrwa, i en fason pour anmas reveni. Selman pou

defann met dife, konmela i annan bann zenerater portab, ki kapab ganny servi kot sa bann *camping site*.

Nou pe koz lo *eco-tourism* la en lot keksoz ki nou kapab konsidere.

Mr Speaker resaman Gouvernman ti fer arete en proze obor Stad Amitie Praslin kot en *prime* kare later ki ti'n ganny *earmark* pou lagrandisman stad foutbol, ek bann lezot lenfrastriktir sportif ki'n ganny vann avek en biznesmenn lokal anba *watch* ansyen Gouvernman.

Lenvestigasyon in konmanse lo sa size. Nou bezwen plis lenfrastriktir pou bann *sportmen* ek atlet Praslin e Gouvernman i bezwen konsider fer renovasyon lo plizyer lenfrastriktir sportif NSC kot laplenn Grand Anse Praslin sirtou lo sa laplenn foutbol e osi kot nou bann zenn i fer laboks avek *Judo*.

Mr Speaker fodre note ki nou Gouvernman pe fer son Mr pou ankouraz bann biznes lokal, sirtou atraver bann *loans* ek *Grant* ki *available* ozordi atraver *Blue Bond, SeyCCAT*, e *loan Scheme* plis ki R150 milyon atraver Labank *DBS* pou ankouraz bann zenn antreprenier.

Onorab Gill in koz lo logmantasyon *berthing fees*, Mr Speaker mon osi mon santi ki sa logmantasyon *berthing fees* ki'n ganny anonse par Lotorite Por i tro o, bann propriyeter bato kargo fek pas dan en move karder avek pandemik *COVID-19* kot zot in fer fas avek bokou defi finansyel.

Zot ti pe fer mwens voyaz e zot biznes tin ganny afekte bokou. La ki zot pe sey *recover*, e relans zot biznes mon santi ki sa novo *berthing mooring fee* i tro for pou zot.

An plis ki sa logmantasyon *berthing fees* pou fer ki kou marsandiz pou monte, ki nou tou nou konnen pou ganny pase lo konsonmater.

E i enportan ki i annan konsiltasyon avek sa bann propriete bato avan ki bann tel desizyon i ganny pran e menm ler Lotorite Por pe desid lo bann devlopman e proze lo lasose.

Mr Speaker Mon menm ek DA Grand Anse Praslin Mr Michael Jean-Louis nou'n fer en pe resers pou idantifye de trwa arpan later dan Distrik Grand Anse Praslin, kot nou santi Gouvernman i kapab fer proze lakaz e proze *condominium*. Mon'n deza anvoy detay sa bann later kot PS pou lenfrastriktir, PS Morgan.

Mr Speaker i annan en Manm lot kote latab ki'n koz lo mank *scholarship* e finansman pou anvoy nou zenn al etidye aletranze. Mr Speaker mon fek anmenn en kestyion lo sa size tar lannen pase, kot nou ti aprann ki Gouvernman presedan in gaspiy plis ki 80 *scholarship* akoz zot pa'n angaz sa bann pei ki'n donn nou sa bann labours.

E fodre note ki i annan en alokasyon dan Bidze pou *scholarship*. In fact i bokou plis sa lannen ki lannen presedan.

Mr Speaker kot i konsern bann zenn ki sorti lo Zil Pros pou vin etidye dan bann lekol post segonder Mahe, Onorab Porice in koz lo la, plizyer paran pe demann Gouvernman pou reviz *allowance* ki sa bann zenn pe gannyen.

Kou lavi in ogmante avek lenflasyon, e nou bezwen osi aziste *allowance* sa bann zenn.

Dan sizyem Lasanble mon ti ganny plizyer konplent bann paran Zil Pros kot i konsern leta *Youth Hostel*. Mon demann nou Gouvernman pou konsider fer en renovasyon konpreansiv lo sa *hostel* Anse Royale.

Mon rapel ki tou le de Onorab Gill ek mwan menm nou ti adres sa size a plizyer repriz dan sizyem Lasanble.

Mr Speaker *Leader Lopozisyon* dan son lantervansyon yer ler i ti pe koz lo STC, i ti fer mansyon lo *RRP e middlemen*. I ti oze demande si i ankor annan *middlemen* STC. I blye ki pli gro *middlemen* kot STC ti zot menm. Son Parti *United Seychelles* ki ti pe lwe STC en propriete Gouvernman pou R800mil par mwan apre zot ti vann sa menm propriete avek STC pour R17milyon.

Mr Speaker i annan en Manm lo lot kote latab ki'n dekrir nou Gouvernman konman kabri ki pe manz salad. Ankor nou, nou pe manz salad, zot zot ti manz *prawns* ek *caviar* apre bwar diven ki sorti dan *wine cellar* Sans Souci.

RRP i marse Mr Speaker, akoz *RRP* nou kapab ganny enn de komodite esansyel, a en pri pli abordab parey delwil, dile avek diri. Annefe Mr Speaker Onorab Porice in fer en bon propozisyon pou entrodwir en *Hyper Market Praslin*, *why not* kot STC *Warehouse Ile Eve* kot dimoun Praslin i kapab al fer zot *shopping* parey Mahe ki pa kout nou larzan *rent*.

Onorab Pillay in osi mansyonn mankman serten komodite. Annefe de komodite ki ti manke pou en rezon valab, lafarin avek ponmdeter. Me i

blye ki a plizyer repriz dan le pase anba zot Gouvernman in annan mankman plizyer komodite dan lepase. Mon rapel mankman dantifris, *toilet paper*, zonnyon, fromaz, zenzanm, lafarin, dile pti baba, bwat bef e lezot ankor kot dimoun ti bezwen met laliny pou ganny sa bann komodite.

E sa letan nou lekonomi pa ti pe pas dan en kriz parey nou pe fer fas avek ozordi.

In osi koz lo Fon *COVID*. I senp, si i pa satisfie avek zeson Fon *COVID* be pa li ki *Chairman FPAC*, apel Minis Finans. Selman pa blye pou depouy rapor Oditer Zeneral lo sa ta later ki *United Seychelles* in akimile.

En lot mansonz ki Ricky Blaster in fer mete lo *Facebook* se ki *Leader Lopozisyon* Onorab Pillay in mansyonnen dan Lasanble, se ki nou Prezidan i oule amann nou Konstitisyon pou fer ki term Prezidan i vin 7an.

Mr Speaker sa zis bann Prezidan parey Albert Rene ki fer, e li in o pouvwar pou 27an.

Prezidan Wavel John Charles Ramkalawan pa en diktater. Pa nou parti ki met niform Mao Zedong pou vin dan Lasanble Nasional.

Ozordi *United Seychelles* pe kraz bann envestiser

internasyonal, zot pa le tann ditou koz lo *foreign direct investment*, zot pe menm dir ki nou le donn nou *Airport* etranze zis akoz nou pe rod finansman pou devlop nou *Airport*.

Si Gouvernman pa ti'n sanze, nou ti pou'n fini perdi nou *Airport* ek nou *ground handling* e nou det *Air Seychelles* ti pou'n fini pet plafon,

(APPALUSE)

HON WAVEL WOODCOCK

Nou *airline* ti pou'n fini ganny *liquidated* akoz sa trou ki zot ti'n met *Air Seychelles* ladan zanmen nou ti pou'n sorti.

Dir mersi Gouvernman *LDS* ki ozordi ede tir *Air Seychelles* dan sa trou ki zot *United Seychelles* ki'n met sa enn ladan.

Zanmen *LDS* in anvi vann souvrennte nou pei, se zot Gouvernman ki ti anvi vann Assumption avek *L'Inde*, e se *LDS* ki ti zet sa dil dan bannann !

Mon kontan tann lot kote latab koz lo lafason ki zot parti pe koste avek lepep Seselwa, fodre koste, viv konman frer. Selman se zot menm ki ti oule fer enn zot prop Manm pas par lafnet. E ozordi sa menm

Manm in pas dan laport e i pe asiz dan *Caucus LDS*.

(APPALUSE)

HON WAVEL WOODCOCK

E zot, zot in pas par lafnet e tonm dan Lopozisyen. Napa ki zot pa pe sey fer nou krwar, lo sa size *carer*. Lo sa size *carer* Mr Speaker in toultan baze lo *means testing*, in toultan Polisi menm anba zot Gouvernman, lasistans *carer* i baze lo *combined income* sa *household*. Fodre arete avek sa bann politik bon marse.

Mr Speaker ozordi nou Gouvernman pe koriz tou sa fot ki Gouvernman *US* in fer. I pa pou pran lan, me pti pa pti pa nou pou redrese sa pei. Mon reste konvenki ki nou Gouvernman anba direksyon Prezidan Wavel Ramkalawan pour anmenn sa bato ki apel nou pei Sesel lo sa por ki nou anvi arive. Avek sa de mo mon dir ou Mersi Mr Speaker

MR SPEAKER

Mersi Onorab. Nou ava pran en poz la nou ava repran travay 4er.

(BREAK)

MR SPEAKER

Mon ava donn laparol
Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi tou Mr Speaker. Bonn apre midi tou koleg Onorab. Tou bann dimoun a lekout spesyalman bann dimoun Baie Lazare ki pe ekout nou ozordi.

Mr Speaker san parol Bondye dan nou lavi nou lekor i parey zis en kadav ki pou pouri dousman, dousman.

Diskour Leta Lanasyon in enn ki a la oter e in enn ki Parti *SPPF* in vwar zot pri pou reponn akoz sa diskour i enn ki'n telman kler, direk lo pwen, avek bokou lespwar pou lavenir. En diskour ki'n baze lo fe, ki fran e laverite.

Ki mannyer ou kapab anbet dimoun ler laverite e aksyon i direkteman devan zot prop lizye? Diskour ki baze lo met en fondasyon solid. Konmsi koze *a Job well started is half the job.*

Mon oule dabor remersye gran met pou son proteksyon e benediksyon pour nou pei.

Remersiman spesyal pou Prezidan, Vis-Prezidan, *Cabinet* Minis e zot bann konseyer pou sa bann desizyon brav, menm si i pa popiler me ki vreman anmenn benefis pou nou pei.

Ozordi i en nouveau zour kot Seselwa pe rekolte bann fri sakrifis ki zot in fer pandan sa long pandemik.

Lamazorite Seselwa in ekoute. Nou'n swiv gidans Departman Lasante menm si i annan ki pa krwar dan vaksen me le gran laliny nou'n kapab arrive fer li e nou rekompans i vo lapenn.

Mersi spesyal pour tou *staff* Minister Lasante anba gidans Mr Gedeon ek son lekip, ki pa'n les lebra tonbe.

Nou drwa zot en gran remersiman. Mon senser remersiman i al pou tou zabitan Baie Lazare espesyalman bann ki pan zanmen les nou distrik tonbe tou sa letan. Nou dwa zot en gran remersiman.

Prezidan atraver son adres in senpleman montre en vizyon kler pou nou pei. Nou pe ganny demande pou abras sa sanzman e ede dan transformasyon nou zoli pei.

Par egzanp Mr Speaker tou dernyerman pou Nwel tou distrik Sesel ti ganny dekore. E sa se vreman en transformasyon formidab. Nou pe ganny demande pou senm mesaz lespwar, lanmour dan nou Kominote distrik pei an zeneral.

Nou bezwen montre sa lespri kanmaradri promot

pozitivite pou donn legzanp nou lazenes e zanfan ki pou demen pran la relev.

Zanfan pou pran legzanp lo nou e si nou donn zot move legzanp byensir sa pour konfiz zot. E petet zot a kapab deroute dan lavenir.

Ler mon lo sa topik, mon pa pou mank sa loportinite demaske sa bann fo profet, ki pe seye menm pour destabilize nou zenn e nou pei.

Zot zis senm mesaz laenn, vanzans, menm fer bokou kalonmni zis pou anbet Seselwa.

Zot sel slogan se desann lo semen. Mr Speaker zot pa anvi konsilte pou vwar solisyon, me zot anvi dezord e revolt dan sa pei; ki sa pour sirman anmenn bokou progre me deteryorasyon dan lavi sitwayen an zeneral dan Sesel.

Mon santi mwan vreman sagrinen pour vwar en Lasanble politisyen *SPPF / US* ki ankor pri dan en lespri manipilativ e destriktif,

En sityasyon kot ava krwar ler zot antre dan Lasanble Nasional, ou ava krwar zot in bwar en posyon demonik ki deranz zot moral retir zot dan vre realite lavi.

Mannyer sa transformasyon i otomatik e evidan, parfwa mon demann

mon lekor, lekel Sen ki nou kapab priye pour geri zot ?

Mr Speaker i fer lapenn pour vwar mon bann koleg lo lot kote latab, ganny posede dan sa tel fason.

Ozordi parey labitud mon get zot drwat dan zot lizye, apre ki monn ekout zot koze mon anvi dir zot aret ipokrit.

Partisipasyon dan sa transformasyon ki ava ede geri zot leker, geri zot larm e sorti anba sa dominasyon dyabolik.

Liber sa pti group dimoun ki zot ankor pe andoktrinen avek zot bann mannev sal. Donn sans nou popilasyon ki pe dousman, dousman geri apre ki zot in sibir bokou dimal, lenzistis, ki zot menm zot in kree.

Mon pa kapab krwar ki zot ankor anvi viv dan en monn mansonz, ler zot menm zot annan zanfan pe grandir. Ki legzanp zot pe donn zot zanfan ler zot pe koz lalang avek sa pep me larealite i diferan??

Ki mannyer zot pa kapab denons sa bann move mannigans ki swadizan zot bann *Leader* oparavan in komet avek sa pep?

Ki mannyer zot pa kapab dir Mr Herminie pou azir pli responsab, akoz se zot ki bezwen sibir lanbarasman devan zot prop piblik? Zot ki pe

ganny gro latet devan Lepep Seselwa.

Eski zot ankor per e zot napa kouraz pour admet ki vreman zot in ganny mal edike politikman? Eski pa i kler ki zot in ganny andoye, andoktrinen e modife pou vin bann masin ki napa santiman. E ki zis koz zis mansonz, menm si senserman zot analize apre ki zot in sorti anba sou sermon dyabolik, ki keksoz i vreman otreman - savedir pozitiv?

Mr Speaker i kas leker pou dir sa lo mon bann koleg lot kote latab. Mon onte parfwa ler mon vvar zot pe defann bann keksoz ki pa vre. Eskize pou dir sa koumsa mon bezwen dir keksoz parey i ete.

Mon pa pou'n akonplir mon misyon ki mon'n ganny avoye pou fer e sa se rod le meyer pou tou Seselwa menm pour zot osi. Mon konvenki ki Sesel i bezwen ganny en vre Lopozisyon dan sa pei o pli vit posib.

En Lopozisyon ki ava vreman konnen e konpran ki zot rol dan en pei parey Sesel. Ler mon koz avek detrwa mon bann zanmi menm detrwa ki pa siport LDS, mon kapab konpran akoz zot pa kapab siport sa groupman nanryen fer, ki pare pou pey dimoun pou fer krwar zot lafen. Menm si fizikman ou

trouve ki sa bann dimoun zot masiv e petet manz an ekse.

Mon anvi dir avek mon detrwa zanmi pour profite, la i le moman pou ed zot pei koman en vre Lopozisyon serye, ki anvi menm en diferans dan lafason pei pe ganny dirize. Mon konnen ki zot kontribisyon i kapab enn ki ava byen ganny apresye par lepep antye.

Ozordi i kler ki *Parti US* pe ganny bonbarde par bokou laverite ki zot pa tin espekte.

Legzanp i bokou me mon ava donn de legzanp. Sa ki sorti da sid les Mahe ki kapab vvar ki kantite avyon ki pe vin Sesel kontrerman avek zot *Leader* lalang ti dir oparavan.

Bann peser en pe partou atraver pei, pe temwannyaz bokou bann devlopman striktirel ki pe al ganny met a zot laporte pou amelyor zot lavi.

Eski sa pa vedir ki i annan en transformasyon dan Sesel, ki la aprezan nou pe vvar plis pozitivite ki avan?

Kot i mal i normal pour dir me kot i annan transformasyon zot bezwen fer fas avek realite. Menm si i pa dan zot lavantaz pou aplodir zot napa en lot swa koz lalang maler, zwe pa trouve osi maler menm.

Seselwa i travay dir pou pey nou sirtou zot lo lot kote latab pou vey depans

Gouvernman met latransparans, laverite e rann kont lo ki pe pase avek larzan Leta.

Napa personn ki devret pe ganny peye pour koz lalang e napa personn ki devret ganny finanse par larzan *tax payers* pour ensit okenn aktivite teroris.

Mr speaker parey bann kretyen, Zezi in mor pou sov limanite dan pese. Zot osi mon bann frer lo lot kote latab laverite i devan zot.

Albert in mor pou permet zot sorti dan sa serk visye e pa kontinyen viv dan lepese e lanbarasman ki parti *SPPF*, Lepep e *US* in anpay zot konsyans. Sa lalit ki zot ti pe anmennen in fini mor.

Mr Michel in ale, mon kontan pou li a sa laz i pe bezwen lape lespri. Mr Faure in plito al fer son prop Fondasyon. I paret mwan ki sa dezyenm divors avek US i enn ki serye.

Eski zot pa trouv sa bann siny ki tou dimoun pe repantir ? Ansyen Vis-Prezidan Mr Meriton in maron. *Nowhere to be found. Acting Vis-Prezidan i dan problem akoz li osi in vwar li pri dan sa revolisyon, ki an se moman pe revolte avek li. Menm bann Diplomat lasyans politik ki ti vreman konpran sa*

lalit, zot in sove zis demann zot lekor, oli zot konmela?

Legzanp tro bokou e si mon kontinyen i riske ariv ziska demen bomaten.

Eski sa i pa laprev ki an se moman zot ti pe sivre i zisteman en move baryer? Profite mon bann frer, repantir, liber zot liber zot fanmir, liber zot zanmi, liber zot kominate e sa i a ede liber nou pei e anmenn en transformasyon ki Prezidan Ramkalawan pe demann nou pou fer.

Premye transformasyon ki ti evidan dan Lasanble Nasyonal zour Leta Lanasyon ki ti atir mon lobzervasyon, sete tou Minis ti lo menm frekans kot sa zes patriyotik ti aparan. Kot zot ti san eksepsyon zot lanmen ti lo zot leker ler Lim Nasyonal ti pe zwe.

Mr Speaker sa ti en zes senp, me sa mesaz ki zot in anvoy deor avek sossyete i enn masiv.

Sa pa vedir ki tou Minis i *LDS*, me piblikman tou Minis in vreman montre sa lespri limite e patriyotizm.

Mersi Prezidan ek ou bann Minis pou sa sans direksyon ki nou bann zenn ava konsidere adopte ler zot pe sant nou Lim Nasyonal partou kot zot ava ete. Prezidan Ramkalawan, mersi pou fer nou vwar sa

transformasyon dan ou *Cabinet Minis.*

Sa Lim Nasyonal i enn ki vreman patriyotik e lanmen lo leker i en zes formidab pour nou montre ki vreman nou krwar dan lanmour, en siny inifikasyon en santiman profon.

Lo sa size resanz Mr Speaker, mon pa pou fer gran komanter akoz i kler ki parti minoriter pa ankor kapab konpran e aksepte ki savedir sanzman.

Zot prefere imilye zot lekor, menm si zanmen zot in kapab konpran sa vre realite akoz ki zot *Leader* ti asosye li avek kouler rouz e avek disan. Bann zenn adilt byen malen ki'n ganny andoktrinen par bann malfeter.

Mr Speaker vwala leta nou Lopozisyon dan Lasanble Nasyonal. Fer lapenn me en realite.

Wi onorab Ernesta, zabitant Takamaka in byen sakouy brans, rezulta ozordi i drwat dan ou figir. Ou nepli MNA Takamaka bannla in byen tik anler e ou'n ganny zet anba.

Mon konnen ou ankor ankoler e fristre, me i paret ou pa ankor aprann ou lesion.

Si ou anvi debout Anse Boileau parey ou'n dir sanz sa mantalite. Vin lo sa kote latab, sorti dan sa tim katar, e aret vir

sa bann kart lapay ki ou fek vin avek.

Mr Speaker, mon'n sey rode mon'n sey demande e mon redemann ankor, ki Prezidan Ramkalawan in pran ? Swa in manze pour zot, ki napa en zour ki zot pa le tir en bout lo li?

Akoz sitan sa laenn menm si i pe seye pou fer tou byen in menm esper bokou letan pou realiz son rev. Ziska ler gran met in dir li. La preznan ou trou in arive?

Esperons ki tre byento mon ava kapab ganny sa larepons. Me pour le moman Prezidan Ramkalawan pou reste la, sa ki ofanse e pa kontan, fer li senp, avyon i pase bato i pase, gete zot menm.

Sesel i lo en bon semen e toulezour nou trouv diferan transformasyon ki pe arive dan nou pei.

Bann transformasyon pozitiv ki pe sirman anmenn prosperite pour nou Nasyon.

Ozordi bokou Seselwa pe travay dir pour byennet zot fanmir e pei sa i en bon siny.

Kontrerman avek sa ki parti oparavan ti zis anvi en pep depandan ki bezwen zis depan lo *welfare*.

Nou bezwen kontinyen ankouraz sa pep pou reste prodkтив e an bonn sante.

Sa ki pa dakor ki en Seselwa ki kapab travay i bezwen travay me non pa lo *welfare*, nou byen eskize. Nou pa pou kapab tonm dakor. Si ou pa kontan parey mon'n dir bato i pas, avyon i pase gete zot menm.

Si zot pa kontan ler Gouvernman pe travay pou konbat krim dan pei, *deal* avek bann eskobar zot pe rod tou fason pou deray sa konba, *sorry* nou pa kapab toler sa kalite pratik. Si ou ankor krwar ki Seselwa pour bezwen sibir sa bann kalite tretman nou byen eskize. Napa plas pour sa kalite mannev.

Sanzman Sesel ti inevitabe sa in arive avek bokou lapriyer. Sa ki pa kontan avek sa bann transformasyon ki pe arive dan Sesel, zot napa bokou swa, zot pou bezwen adapte e viv avek akoz i reste ankor 3an 8 mwan.

Annan pasyans, byento avek sa lamannman Konstitisyon, zot ava komans lager lekel ki zot pou met konman kandida parti.

Esperons ki US pa kas ankor kot nou ava war zis U i ava en kote e S i ava lot kote. Antretan espere, sa ki napa pasyans ankor enn fwa. Avyon i pase, bato i pase, gete zot menm.

Bann komanter ki pe sorti lo lot kote latab se LDS i dekonekte ek son pep. Nou'n fek taler vwar lipokrizi Onorab Cosgrow ler i ti pe koz lo zafer pansyon. Onorab i konn tre byen ki dan en diskour Leta Lanasyon ou pa kapab abord tou size.

Ler mon get lo diferan platform lenformatik, mon trouve ki i annan bokou ki pe ganny fer, pour promouvwar devlopman dan Sesel.

Bokou bann akter sakenn dan son fason pe ede pour anmenn sa transformasyon ki nou'n tandé dan Leta Lanasyon.

Menm nou bann Seselwa ki aletranze pe eksprim dezir pou kontribye dan devlopman nou pei.

Nou'n aprann ki i annan en novo dinamiz dan sekter prive e sa i byen.

Eski sa se pa bann bon siny lankourazman ki devret ganny aplodir? Sel group dimoun ki ankor dekonekte avek zot sitwayen se zot lo lot kote latab.

Zis en senp legzanp, ou ki konn ou MNA dan ou distrik...gete akoz ki bann MNA Parti US i bezwen mars dan zot loto personnel avek en vit nwar antye lo la?

Seselwa zis fer sa lobzervasyon apre ou ava dir mwan si mon pe koz manti. Ki zot pe kasyet si pa zot kominote?

Ki privilez ki zot annan konpare avek bann lezot sitwayen? Eski zot tou zot annan maladi lapo ouswa bann lezot problem lasante?

Eski zot annan leksepsyon ki Gouvernman i bezwen donn zot sa privilez?? Mon pa pe konpran ki mannyer sa bann permisyon in ganny donnen, e mon pe demann en lesplikasyon avek Komisyoner Lapolis pou ede met lekleraz lo sa topik.

I bezwen annan trik dan zwe, la osi i bezwen annan en transformasyon pou permet zabitan vwar zot *MNA* e *MNA* pa devret pe kasyet zot zabitan.

Ler mon lo sa size Lapolis, mon pa oule mank sa loportinite pou zwenn avek mon bann lezot koleg, pour osi remersye Komisyoner Barbe pou sa bann transformasyon ki i pe fer dan Departman Lapolis.

Mon konnen ki ou'n ganny responsabilite sa lafors dan en leta difisil, me nou promet ou tou nou sipor pour byennet ou bann staffe ou lenstitisyon. (Pa ankoler bann Onorab mon tire.)

Sepandan mon osi anvi met en mo kosyon sirtou avek bann komandan rezyonal.

Mon pe observe ki pe annan bann mantalite lesefer, kot bann desizyon e aksyon pa pe ganny fer an konformite avek Lalwa. Mon'n ganny en pe konplent sirtou dan rezyon sid was. Mon'n evalye, mon'n analize e mon'n fer mon konklizyon.

Koman sa reprezantan ki'n ganny sa manda pou defann mon bann zabitan, reste trankil i pa en opsyon, enterfer osi i pa en opsyon.

Mon pe demann Komisyoner Lapolis atraver *ASP Jean*, pour ed mwan dan sa demars pour lasistans e lazistis ver en Baie Lazare progresiv. Mon 3enm demann pou Komisyoner Barbe pou sa lannen se mazin Baie lazare dan son Bidze en stasyon Lapolis modern pou Baie Lazare i en priyorite.

Mon asire ki nou distrik in enn ki'n annan bokou pasyans, me la in ler pour nou ganny en pe keksoz nef.

Nou en distrik ki pe vitman devlope, e nou pou bezwen plis *community policing*, pou ki lape e sekirite i renye dan nou distrik. Pou asiste Lapolis dan bann demars pou en Baie Lazare an sekirite, mon

dan demars pou inisyé en programm kot bann kamera sirveyans ava kapab ganny mete dan bann landrwa Gouvernman, e osi bann landrwa byen frekante ;- ki a kapab prodwir bann zimaz levidans.

Ki a ganny enstale dan Kordgard pour ler i annan bann aktivite ilegal e sa ava ede pour dekouraz sa bann tel aktivite.

Mon konnen ki sa i en proze ambisye, me napa naryen ki enposib ler ou annan en dezir pour protez ou lanvironnman e distrik.

Mon pe kont lo bann endividé, biznes e Gouvernman pour mazin nou Baie Lazare, dan tou zot bann negosyasyon. Zot bonn volonté pou vreman ganny apresye.

Leta Baie Lazare i enn ki tre an bonn sante e i pa en sekre ki Baie Lazare i kapab distrik ki pli ris dan Sesel.

Savedir Baie Lazare pa devret mank okenn loportinite, pour li eksplwat tou mwayen pour devlopman nou kominate.

Baie lazare i annan bokou endividé avek bann bon bagaz akademik, e nide lo ki mannyer nou distrik i devret devlope.

Koman MNA, mon'n deza komans en dyalog avek detrwa zot e eksplik zot mon lentansyon pou form en komite

pour konsider tou lapse pour devlopman nou distrik.

La ozordi, mon lans en lapel avek tou sitwayen Baie Lazare, ki santi li annan sa kapabilite pour kontribye dan planifikasyon e devlopman distrik, pou imedyatman fer nou konn zot lentansyon.

Mr Speaker malgre tou sa bann transformasyon ki pe arrive dan mon distrik, mon pledwari i reste parey. Nouvo sant lasante pour Baie Lazare i reste en priyorite.

Avan mon fini mon manda, mon pa pou fer zistis mon kominate si mon pa kapab realiz sa proze pou zot.

Dan Bidze in annan en alokasyon, menm ki i en pe feb me nou kapab komans avek. Mon pe demann avek Minis Lasante Minis Vidot avek son lekip pour fer posib pou asiste nou dan sa demars pou realiz sa tel proze.

Mr Speaker ler mon lo sa size Lasante mon'n tann bann Manm lo lot kote latab dir ki Gouvernman dizour, pe anmenn dan nou sosyete en dekadans sosyal lo en size ki Egzekitiv i met avek lepep pou zot donn zot pwennvi lo la.

Monn osi observe ki napa en madanm dan sa Lasanble ki'n pran sa koman en size

sansib, akoz mon panse zot azour avek larealite la deor.

Nou'n menm tann en zournalist madam dan konferans depres *challenge* Prezidan lo la.

Mon dire ki si Prezidan ti'n fer en fot dan son larepons konferans depres ti'n kapab fermen.

Mr Speaker, mon pe demann Lasanble Nasyonal pou pa pran mwan an mal, me mon bezwen servi sa loportinite pour eksplike.

Dan Lasanble Nasyonal nou annan en Komite ki *deal* avek Lasante Reprodkтив e Drwa Seksyal ki Parti Lepèp i annan Manm lo sa Komite.

Sa size i souvandfwa i monte akoz i kler ki okenn groupman menm Lazans ki devret abord sa size, me zot pa pe fer zot devwar.

E sa pe fer ki lasante seksyal i kontinyelman reste en topik tabou dan lasoyete, menm si sa i en size enportan.

Ankor enn fwa bann Onorab Lopozisyon in pran sa topik koman en seval batay pou sey rod konpasyon, e dir ki Legzekitiv pa konnen ki pe pase.

Les mwan dir sa bann Onorab ki Legzekitiv ki konnen ki pe pase. Legzekitiv i konn son Nasyon. Legzekitiv pa per pou

pran zot responsabilite e adres sa topik dan en fason konvenab. Sel dimoun ki pa azour lo sa size se zot menm.

Mon ti ava kontan si zot al aprofondir zot konesans lo sa size par fer en *check* dan larmwar se zot. I posib ki zouzou dekadans sosyal in kapab fini ariv se zot. Sa se pa en lakizasyon me senpleman en mo kosyon. Byen koze i fer byen konpran, mal koze i fer diskisyon.

I annan plizyer topik ki merit ouver pou ganny lopinyon piblik, me enn ki Gouvernman pa devret tarde pour adrese se sa size kanabis.

Tro bokou letan sosyete in ganny bonbarde avek bokou fo lenformasyon lo sa plant, ki pa ni mwan, ni ou, ni personn me Gran Met ki'n permit li pouse. Savedir i annan son lenportans dan legzistans ekosistem.

Ou sa zabitant ki ti debout dan gro ker soley e espere pou donn mwan en vot pou vin en lavwa dan Lasanble Nasyonal, ozordi, menm si Parti US i konsider ou koman enn ki pe promot dekadans sosyal, zis akoz ou an faver kanabis, mwan mon pou azir brav e debout dan ou kote pou fer ou lavwa tande.

Ou sa manman ki'n dekouver sa verti medisinal

avek rasin kanabis, kot asma ou zanfan in nepli en fardo, mon debout dan ou kote, menm ki mon pou ganny denigre zis parey ler zot ti al vot pou mwan, zot ti denigre ou. Nou pran sa boul ansanm.

Pou sa trwazyenm-az ki'n koz avek mwan e demann mwan pou ed ganny lafresisan, mon pare pour debout dan ou kote.

Ki mannyer demen mon pou kapab get ou dan ou lizye e fer krwar ki mon'n blyie kan mon konnen ki sa in abitye en souples dan ou kondisyon lasante?

Tou keksoz ki ganny abize i kapab vin en danze, me bon lenformasyon bon konesans ek en sans responsabilite serye, i sirman met tou keksoz dan son vre konteks

I nepli letan pou azir dan en fason dominer e opresiv. Si i annan laprev konkret lo bann verti medisinal ki sa plant i posede, i enportan pou ekoute temwannyaz sa bann *expert* ki vreman eksplor sa resours, ki ava kapab anmenn reveni pou nou pei.

Nou napa petrol, nou napa min lor, nou annan en later fertile loportinite i la.

Tro bokou lipokrizi lo sa topik e mwan mon pa pare pou kontinyen azir koman en kozpa

kan bokou dimoun pe enplor mwan pou ekout zot, e anmenn zot mesaz ziska lofis pli o dan Sesel. Mr Speaker mon poz sa la i pou en topik pou nou koz lo la.

Mr Speaker, Baie Lazare nou'n fatige avek sa bann kondisyon semen. Mon panse ki nou annan ase pasyans ankor, pou esper sa semen pou ganny fer pou benefis nou drayver.

Lavi bann drayver i en kosmar. Dan lespri transformasyon nou oule vvar en meyer kondisyon semen. Ler mon lo size semen, mon pa oule oubliy tou dimoun ki pe servi sa semen sid les Mahe.

Mon konpran ki i annan proze ki pe vini. Me dan limedya mon ti ava voudre ki Gouvernman i get bann keksoz ki zot kapab fer pou benefisy sa bann dimoun.

Par egzanp met Lapolis bomaten avek apre midi lo sa semen sorti Anse Aux Pins ziska Pointe Larue. Kordinen sa pasaz pyeton kot *Airport*, pou ki i sa larout piblik.

Tou dernyerman mon'n angaz mwan en pe avek bann drayver *taxis* dan sid Mahe, pou konpran en pe zot konsern. Mon byen kontan pou vvar ki sa transformasyon ki pe arive, kot Minis pour Tourizm e

Transport pe vreman get sa size transportasyon avek tou lede kote lizye.

Tou dimoun ki dan sa biznes i bezwen dakor ki personn pa ansarz sa biznes, me zot tou zot bezwen benefisyé me non pa kapab kit lespas pou labi.

Mon oule donn mon komikman avek mon bann zabitan ki dan sa biznes transportasyon, ki mon pour kontinyen swiv sa size dapre avek gran lentere.

Dan sa bann semen ki pe vini, mon pour kontinyen al kot bann letablisman touristik avek zot *Chairman Mr Quilindo*, pou al anmenn zot lanvi e konsern kot bann *General Manager*.

Zisteman Sanmdi pase nou ti al vvar *GM Kempinski*, kot nou'n kapab retir bokou dout, e les mon dir ki nou'n byen apresye sa antretyen avek *GM Kempinski*.

Mon konsey pou zot bann drayver *taxis* dan sid was Mahe, se kontinyen elev standar. Lospitalite i lakle, e mwan mon ankouraz zot pou zwenn sa Lasosyasyon *Taxi*, akoz i annan bokou benefis ki zot kapab gannyen.

Lagrikiltir i en size ki ankor lo mon azanda travay. Groupman *LDS* dan Lasanble Nasyonal in pran sa linisyativ

pou tre prosennman konstitye en Komite Lasanble Nasyonal, pou get dan bann sekter gouvernmantal, parastatal pou fer sir ki tou sipor finansyel, materyel e mendev, i ganny aksede pour aksyonman bann proze ki a ede direkteman dan transformasyon nou pei.

Mosyon pe vini pa trakase.

An terminan mon pa oule mank sa loportinite pou renouvele langazman nou bann Manm *LDS*, ki malgre tou sa bann tirbilans, nou kontinyen onor nou langazman, pour reste bann lenstriman lape zis parey *Saint Francois D'Assise* in enstri nou pou fer.

Kot i annan laenn, nou pou met lanmour. Kot i annan dout, nou pou met lafwa. Kot i annan dezespwar, nou pou met lespwar. Kot i annan fernwar, nou ava met laklerte. Kot i annan latristes byensir, nou ava met lazwa. Kot i annan mansonz nou pou met laverite.

Nou pou bezwen fer sa transformasyon pou en meyer Sesel. Kont lo nou lo sa kote latab pour travay dir pour benefis nou pei.

Mr Speaker parey nou tou nou dir *LDS* i sel parti ki pou diriz Sesel ver lavenir e prosperite pou sa pei pou kontinyen reste. Parey nou moto i dir "LDS Sesel nou pa les

tonbe. Nou pa pou zanmen les tonbe!"

Mersi Mr Speaker.

(APPLAUSE)

MR SPEAKER

Mersi Onorab mon ava aprezan pas laparol avek Onorab Sandy Arissol.

HON SANDY ARISSOL

Mersi Mr Speaker. Bonswar Mr Speaker. Bonswar le de *Leaders* dan Lasanble Nasyonal. Tou bann Manm Lasanble Nasyonal, tou manm Sekretarya, zabitan distrik Bel Ombre, lepep Seselwa pou ki, isi pou ki de aryer bonswar.

Mr Speaker i annan plezir pou mon pran laparol an repons lo diskour fer par mon Prezidan. Ou Prezidan, nou Prezidan. E mon bezwen dir boner yer kontan pa kontan, sote pile Onorab Loze se li Prezidan Sesel!

Se li ki lemonn i rekonnert envit li pou partisip dan bann *forum* enternasyonal. E mon *resign* zot ankor pou dir li i en Prezidan Elekte, pa enn ki pe mars ek en bout baton !

E sak fwa i retournen sorti bann misyon aletranze, i fer kominke lapres, eksplike kwa ki'n al fer, kote i sorti e kwa ki pei ek lepep Seselwa i benefisyen.

E Leader Lopozisyon dan Lasanble Nasyonal Onorab Sebastien Pillay i ganny sans anmenn PNQ pou ganny plis lenformasyon. Sa i en vre leader.

Me bann ki ale pa konnen kot zot ale. Si zot al *Slovakia*, si zot al *Cuba* kan zot tournen, ki zot anmennen ki zot rol personn pa konnen. Me zot apel zot bann leader.

Mon tre fyer pou en Seselwa, e travay li nou Prezidan in fer pandan sa 16 mwan, e sa ki pe kontinyen fer ek tou lezot keksoz ki anvizaze fer pou nou zoli pti pei Sesel. Enkli pou bann US napa lopinyon, me *still* zot ganny sans koze.

Mersi Mr Prezidan. E mon anvi fer en mansyon spesyal pou Madanm Linda Ramkalawan pou premye *Dame* pou sipor kontinyel ki i donn son msye Prezidan Larepublik, e son sans e son prezans dan bann moman for obor son mari. E sa i en reprezentasyon plizyer manman ek zanfan dan sa sanzman ki pei i gannyen. Sa se pozitivite.

(APPLAUSE)

HON SANDY ARISSOL

Se premye fwa dan listwar Sesel dan listwar Seselwa en

Pret i vin Prezidan. Eski i pa pozitivite sa? Premye fwa en lanmes Aksyon De Gras i ganny fer *State House*, pou remersye nou Bondye. Pa pozitivite sa bann US - ki napa lopinyon - selman zot kontinyen koze menm?

Mon fyer mon bann Minis en group kalib profesyonnel ki pe ed nou Prezidan dan sa latas nob. Lontan fodre ou ti dan milisya pou ganny en tyak Minis. Al *shoot trans koko* e kriy "soumaren !" la ou plas ti garanti. Zis Onorab Cosgrow ki pa'n pas atraver sa stratezi.

E wi si nou kontan nou lafors da Sessel Mr Speaker. Parey pou ou vin *DA* fodre ou ti konn dans taba ki dan bonnen kare ki donn maloker wey; sega tranble parey Onorab Audrey i konnen. Pou ou ganny lakaz fodre ou en Sekreter Sekter. Savedir vey zakson ou vwazen ki i frekante, ki son kouler politik, tousala anba Gouvernman US. Ozordi zot ki pe don nou lesson. *Too little too late* bann US!

Sanzman in arive e mon fyer. Mon form par sa sanzman e mon'n ede pou anmenn sa sanzman. E tou lezot mon frer ser ki'n kontribye pou sa sanzman. E pou sa Mr Speaker, mon oule dir zot en

gran mersi pou zot sipor kontinyel.

Lo menm not ki nou Prezidan in fer se prezant en mo konfor ek tou nou Seselwa ki'n perdi en manm son fanmir dan en moman difisil sirtou ek *COVID*, kouraz e ki lapriyer i soulaz zot dan sa moman dey ek soufrans.

Me ler i sonnen pou nou transform sa pei e mon pou donn sipor mon Prezidan.

Mon oule profite pou felisit Minister Lasante ek tou son *staff*, pou sipor gidans ek tolerans pandan sa peryod pandemik. Mersi pou zot mank sonmey. Mersi pou zot pa pran konze. Avek sa pti saler zot in travay sanses pou asire ki sityasyon i ganny met an plas anba kontrol.

Annou donn zot en gro lanmen mon bann frer ek ser.

(APPLAUSE)

HON SANDY ARISSOL

E mon anvi dir zot ankor enn fwa mersi bokou. E mersi pou tou Seselwa ki'n ede dan sa lalit ki'n pran zot responsabilite, pou asire ki *COVID* i redwir e stab dan nou pei. Mersi mon bann frer ek ser. Ek bann mezir ki'n ganny revize sa i montre ki pei in fer tre byen.

Eski i pa pozitivite sa? Letan nou lo revizyon mon ti a kontan ki Gouvernman i revwar osi *Travizory* avek sa €5 ki nou bann Seselwa bezwen peye pou li rantre dan son pei ki ti la depi anba vye ladministrasyon.

Me letan nou pe fer sa bann refleksyon serye i enportan pou lepep Seselwa ekout byen bann kalite deliberasyon fer par bann swadizan Lopozisyon.

Zot ronfle parey en avyon ki pe sey ganny difikilte pou *take off* zot in vir, vire, zet en pe *fuel*, zet bagaz *still* avyon pa leve menm.

Finalman zot in realize ki kaptenn ki tro gro pou sa novo *airline*. Alor prezan zot blanm tou dimoun parey labitud.

Letan *LDS* ti dan Lopozisyon nou ti en Lopozisyon serye. Fer bann propozisyon serye. E nou ti an konsiltasyon Gouvernman, pou asir ki pei i reste stab.

LDS i dan Gouvernman ki nou vwar, en Lopozisyon *US*. Ki zot pa kalife zot menm. Pares zot menm, napa okenn kontribisyon zot menm, napa abilite pou partisipe en Lopozisyon ki fay. Zot taye lo tou *forum* kot zot kapab kontribye e partisipe. Me apre zot vini pran zot gro lapel zis zot

plennyen e donn nou lord. *Too little too late* bann *US*!

Letan mon ekout bann *US* zot mesaz se rankin, konfizyon ek desann lo semen. Me letan zot pe demann *Tinky Winky* pou desann, zot, zot kasyet e zot get lo *Facebook*. An Kreol nou apel sa 'kapon!'

Prezidan in donn en langazman kler ek *Facebook* annou bouz devan e transform sa kalite latitud rankin ek fo lenformasyon lo *Facebook*. Annou aret maltret, montre ledwa. Me annou bouz devan mon bann frer ek ser.

Letan zot vini e koz lo viktimizasyon e lapwentman bann aktivis dan bann pozisyon, me kestyon ki mon anvi demann zot konbyen bann aktivis ki ankor dan lanplwa?

Konbyen zot bann aktivis ki ankor pe ganny en saler? Kantite ki'n ganny apwente dan bann pozisyon kle dan Gouvernman? Konbyen ki zot kontra lakaz ek Gouvernman i ankor valid, menm zot pa kontan sa Gouvernman.

Letan zot vini koz lo Seselwa i malere Onorab Ernesta, me zot pa vin avek bann levidans kler pou dir nou konbyen Seselwa ki malere dan sa pei? Konbyen Seselwa ki malere dan sa pei? Konbyen Seselwa ki pe mor lafen Onorab

Wallace? Konbyen Seselwa ki pe rod en lanplwa Onorab Audrey? Konbyen Seselwa ki'n rod *welfare* pa'n gannyen akoz i ti merite? Zot ti vin ek lasos zonnyon, dipen 50sou, goute zanfan Onorab Loze la Seselwa i malere. Zot pa serye bann US!

Letan Onorab Aglae i dir Seselwa pe mandyan partou kote fodre nou fer atansyon.

Annou pa blanm tou Seselwa konman mandyan Mr Speaker. Mwan mon ofanse sa. Parske bann zabitan Bel Ombre ek lepep Seselwa ki leve travay la deor.

I annan manrmay tousel ki pe asire son zanfan i al lekol i pey son det, balans son larzan e pa fer ekstravagans lo son depans. Me i servi sa ki i annan. Avyon ki mont plen ek Seselwa. Plizyer Seselwa i annan biznes la deor. Plizyer Seselwa pe fer donasyon dan distrik. Plizyer Seselwa pe lwe en pti bout zot lakour pou zot ganny en lot reveni.

STC mon pa vwar Seselwa pe mandyan mwan Mr Speaker. be mon bwar zot pe pran zot *trolley* pey zot konmisyon e zot pa pe mandyan. Me zot in kalkil byen zot Bidze e konn zot priyorite e se sa ki fer zot bann Seselwa serye. Me pou nou koz lo STC fodre nou frekant STC Onorab Lemiel.

Konsey ki mon ti ava kontan donne pou STC. Letan zot vwar en bwat bef i tonbe lo letazer, zis anmas li remet li lo letazer. Swa zot ava met en RRP lo li, oubyen zot ava aste li parey i ti ete.

Dan bazar napa personn pe mandyan, me i fer son swa si i anvi peye i pran, si i pa oule fer en lot swa. Sa i bann Seselwa serye. Seselwa ki anvi travay pe travay.

Si Port Glaud i reste ankor detrwa ki krwar zot pou leve e lezot dimoun ki pou donn li tou, sa letan in fini Mr Speaker.

Napa personn ki soutir personn pa travay e zis mandyan, parey Onorab Aglae in dir nou. Travay i en drwa e mandyan i en swa. Pa blanm personn si ou anvi reste deryer i pa bouz devan. Pa blanm personn si ou pa anvi travay. Me pa blanm personn si ou pe esper lamann sorti dan lesyel parey dan letan Moiz e tonm ater, e pa vin ditou.

Ou pou bezwen leve sekwe ou. Al debourye ou pou bezwen ed ou lekor epi lesyel *t'aidera*.

Pa zistifye mandyan Onorab Aglae parey ou ti zistifye koudeta pou sa menm Lasamble.

Me par kont kot i annan plizyer zenn ki anvi travay me akoz in deza fer en lofans e in

deza kondannen, e i ganny difikilte pou ed son fanmir. Alor tou bann Lazans annou zwenn ansanm ed sa bann zenn e gid zot dan sa demars pou zot avans devan, pou zot siport zot lekor e ed zot fanmir.

Me par kont bann fanmir ki dan lanplwa, e i santi ki i bezwen gidans lo led ki i bezwen pou kek rezon, sa i la Mr Speaker. Sa larzan nou'n vote dan Bidze pou asire ki sa ki vilnerab e sa ki dan bezwen, i ganny asiste.

Pa donn lenpresyon personn pa pe ganny asiste dan sa pei. Fo lenformasyon Mr Speaker. Fodre pa oubliye i sa larzan i kontribisyon i *tax payers money* e larzan lepep Seselwa e nou bezwen zer li byen.

Sa pa en larzan pou konpanny eleksyon oubyen zis akoz nou ti en aktivis, alor ou ganny rekonpanse avek larzan piblik akoz nou ti byen partaz papye e vey zakson vwazen. Sa letan in fini mon bann frer ek ser.

Parey Onorab Lemiel pe rode oli promes Ramkalawan, me i en Gouvernman, i annan 5an pou li delivre Onorab Lemiel.

I pa bezwen fer tou dan 16 mwan. Me zot lo kote US zot refize aksepte e rekonnnet zefor

ek travay ki Prezidan ek Gouvernman in fer.

Me zot zwe zis sa zwe larzan pou zwe lo lemosyon manm piblik. Eski apre ki nou'n pran pei avek zot, apre ki lemonn enkli Sesel in pas atraver en kriz ekonomik, zis nou vini diverti kontan ek larzan, pou nou fouy en trou, pou nou fouy en lot trou pou ranpli en trou ki zot in kite plis ki 43an pase. Eski i responsab sa? E de plis zot ki pe donn nou lord?

Prezidan in donn en komitman ki pou annan en revizyon an relasyon avek saler. Nou tou nou'n tande. Alor nou dan LDS nou annan konfyans e nou anvi sa i ganny fer byen. Prenon kont tou laspe ki otour sa size eski sa i fer Seselwa vin en mandyan oubyen en malere Onorab Aglae?

Si Onorab Ernesta i annan statistik pou sa *Bartel Index* ki'n koz lo la, dir nou Onorab Ernesta. Pa kasyet deryer distrik Anse Boileau e fer meakoulpa e deklar ou en zabitan, apre ou defet Takamaka! Me vin fran. Tousala se bann mansonz fabrike par US.

Me par kont kestyion ki mon anvi demande, lekel Gouvernman ki ti annan en kanpanny "leve debourye?"

Konpoz en sanson zis pou sa konpanny. Akoz? Seselwa pa ti oule travay?

Alor si ozordi Prezidan Ramkalawan i dir fodre nou leve al debourye pou sonny nou lekor e siport nou fanmir, sa i vedir i pe maltret Seselwa e i pe glorifye Seselwa ki vin aletranze?

Letan Prezidan i vini i dir aret trenn lipye, e debourye dan ou travay olye zwe soliter zis asiz lo *skype* e koz ek ou fanmir *L'Australie*. Fer *shopping* dan letan Gouvernman e pa delivre, sa i vedir Prezidan pe maltret travayer? Non! Senpleman in fra e onnet ek tou Seselwa travayer.

Se sa ki apel pozitivite. Letan mon tann bann Manm US koz lo etranze pe pran tou plas travay. Pa pou arive ek sa novo Gouvernman. Selman nou bezwen fran e onnet.

Fodre nou zenn i konsyan poudir sa pei i pou nou. Fodre pa nou kontinyen in annan en pei kot mazorite nou lafors travayer i dan prizon.

Etranze pe met laliny pou anvoy larzan dan son pei, me nou, nou zenn pe met laliny pou pran *methadone*. Sa diferans ki i annan dan nou pei. E sak fwa ou vizit en dimoun premye keksoz ki i demann ou kan pou arete sa *methadone* e anvoy

bann zenn travay. Sa i ava bann transformasyon ki lepep Seselwa i ava fer ek sipor an konsiltasyon avek Gouvernman.

Letan zot kontinyen obsede e zot telefonn pe ganny ekoute, zot devret vin ek laprev. Aret zis vin dir napa. Zot per zot lonbraz mon bann frer ek ser US.

Pa zot telefonn ki pe ganny ekoute, antre zot, zot zalou kanmarad alor zot rikord kanmarad, apre zot lenz sal i ganny lave lo peron *Maison du Peuple* paret ti arive dernyen fwa.

(APPLAUSE)

HON SANDY ARISSOL

Letan zot koz lo lafreyer dimoun i per, selman zot pa per pou zot koze zot bann ki la?

Ler *Tinky Winky* pa i desann anvil li ek son bord latet anba, byen sou. Me i ti devret ganny anmase dan son *full uniform* li. Me akoz pa anmas li, li? Apre nou vwar li pe bwar son *Jameson* lo bor semen ek en bwat manze i pe rod en pasaz pou li monte.

La mon aprann poudir *Hermit the frog* pou desann li menm. E i pou ganny akonpannyen par *Big Bird*. Parey pa zot tou ki kontan,

Premye *Leader* ek Dezyenm *Leader* Lopozisyon sa osi i en konfizyon parmi zot.

E plizyer zot, zot per pou koz lo la. Konbyen zot ki reste trankil akoz zot per zot *Leader*. Zis akoz in ganny elekte *digitally?* Prezan i annan en konfizyon lekel vre *Leader*, sa enn anndan swa sa enn *digitally?* Mon poz sa la.

Me sa ki zot pa dir Seselwa se ki zot manm i anvi en elekson pou re-swazir zot *Leader*. Akoz sa enn pa'n ganny elekte. E i annan lakoler parmi zot.

E pa blye i drwa bann zanfan goute, ki zot ti ganny promet e koz lo la. Zot ti deklar tou zanfan lafen, napa goute Onorab Loze. Selman zot promet zanfan goute apre zot kit tou zanfan lafen parey zot in dir.

Kestyon ki nou demande, be eski zot pou ankor valab dan 5an zot bann *US?* Mon pa vwar zot.

Me kantmenm sa i annan pozitivite dan nou pei. E plizyer legzanp in ganny donne par nou bann Manm zis pandan sa dernyen 16 mwan. Vre sa gro nyaz nwanr in ale.

Mon anvi dir mersi pou sa nouvo Lopital latant ki'n ganny konstri dan en peryod letan tre kourt. Sa i ava tir presyon lo

nou Lopital Sesel swa lezot Sant Lasante dan distrik, si zanmen evantyalite i frap nou ankor Mr Speaker.

Me sa i ava fer ki nou annan en lopital ekipe pou nou rann sa servis efikas kontinyel. Nou ava kapab revizit nou malad asiste zot e akonpanny zot dan zot bann demars.

Me avan zis Lopital Sesel sa ti ganny restrikté. Letan mon lo topik Lopital, i malere letan ou tann reprezantan La Digue tret tou son zabitan konman malad parey li menm.

Letan i demann Gouvernman pou konstri en lopital tre gran ki i kapab pran zot tou an menm tan, sa i malere. I pa responsab. Sa i devret en petisyon ki Digwa i devret mazin lo seryezman. Retir li dan son pozisyon.

Me sa ki i ti devret pe dir ek zabitan Digwa sa plan Lopital in la pou plis ki 20an. Son Gouvernman. Teren ti'n fini ganny swazir, me parey nou tou nou konnen sa ti zis en promes konpanny elekson kot Digwa ti ganny anbete zis pou *US* reste o pouvwar.

Me mazorite servis zot ti bezwen sot kannal e al Praslin. Ozordi zot reprezantan i vini e deklar tou zabitan malad. Mank respe ek volonte lo bann non Digwa. Pa akseptab! I

bezwen *retract* sa *statement* e demann zot en *apology*.

Ankor enn fwa lo sa Gouvernman si Gouvernman *LDS* Mr Speaker ki pou konstri sa Lopital pou Digwa pa sanzman sa? Dekonekte sa Onorab Ernesta? Oubyen konnekte avek nou pep?

Pozitivite se letan koripsyon ti zis en persepsyon. Ozordi i annan aksyon par bann Lazans konsernen.

Letan zot ti koz lalit kont drog me nanryen pa ti ganny fer. Me eskobar ki ti *supply* lapomad ek *hair band*.

Ozordi en nouveau masin i ganny mete lo *Airport*. Plis bato i ganny entersepte e bann ki'n al konman garanti, zot ganny retournen. Pa pozitivite sa? Ek sanzman ki Onorab Vidot ti pe rode anba nou Gouvernman.

E la byento Gouvernman *LDS* pe al fer en nouveau *remand centre* pou bann ki *remand* pa dir zot pa ganny soley, zot bezwen raze bomaten akoz aswar ek plennlin zot vin *werewolf*; pe bwar dile dan lanmen akoz zot pa ganny en tas.

Letan ou lib annan rapor ki'n sorti pou demann ou lekor, eski bann kasou se Gouvernman *LDS* ki'n konstri? Oubyen tousala nou'n erite, ek sa menm Parti *US* lot kote latab Mr

Speaker ki pe kriy partou ozordi, pe dir bann kasou pa lo standar. Zot pa responsab!

Me kestyion ki mon demande an relasyon avek sa bann rapor ki'n ganny sorti *Human Rights* se Mr Renaud ki lo sa Komisyon pa i ti en Ziz en letan li? Mr Robert pa i ti en Mazistra. Ti napa labi sa letan?

Letan zot ti *remand* plizyer Seselwa, eski pa ti al dan sa bann menm kasou ki dan sa rapor ozordi? Alor eski zot osi zot ti pe donn lanmen pa respekte drwa sa bann Seselwa sa letan?

E la mon mazin Mr Dingwall in ganny 1an depi ki in kit nou, eski kasou ti ganny vizite sa letan, oubyen zot ti zis pas zot zizman ek santans lo nou bann frer ek ser Seselwa dan sa menm kasou ki nou pe koz lo la ozordi?

Ban Avoka ki pran nou larzan eski zot ti gete kote zot kliyan ti *remand* swa kondannen? Oubyen zis ozordi ki tousala bann size kasou in ganny dekouver, akoz *LDS* ki'n anmennen ler in vin o pouwarr?

Prezidan in koz lo pozitivite transformasyon e gou pou viv. Bel Ombre nou annan tou le trwa. Parey zot konnen parmi bann zoli dimoun i gou viv. Transformasyon ki Bel Ombre in gannyen se Onorab

ek DA i nouveau tou le de. Zot deza pe travay pou zabitan Bel Ombre.

Mon dir mersi Mrs Tahiri Laurencine avek son *office assistant* Gadielle Hariba ek Liza Nicette konman mon clerk. Ek tou lezot *staff* ki pe fer en travay ekselan.

Mon anvi dir zot mersi bokou. En latmosfer pozitivite kot Ladministrasyon Distrik. Transformasyon se *MNA* pa donn okenn apwentman, me i vin kot ou lakour. Letan ou *call* li nou koze nou de nou diskite e nou tonn dakor ki zour e keler ki apropriye, e mon rann ou sa vizit parey mon'n fer depi sa dernyen 16 mwan dan lofis.

Pozitivite e gou pou viv, bann dimoun olye zot ki vin kot biro. Transformasyon nouveau laponp *fuel*, byento en lot pou gro bato. Plis lespas pou nou bann peser artizanal nou pe demande. En langar pou kliyan bato lwazir esper en bato dan lonbraz e en labri pou lapli. Fini fer Mr Speaker.

En facilite twalet pou kliyan servi olye al deryer pye koko dan rigol swa deryer transpor, parey ti ete dan vye administrasyon - tousala nou'n fini fer Bel Ombre.

Nou swete ki byento Beau Vallon ava ganny facilite pou zot bann bato lwazir e bato

lapes, pou ki nou ava ganny ase lespas pou nou bann zabitan met zot bato, sirtou bann zenn ki'n debourye lo nivo lapes parey Stana e lezot zenn dan distrik Bel Ombre.

Transformasyon? Letan Anse Major enn nou lans prefere i ganny en koup i ganny en koup sorti Bel Ombre en msye ek en madanm pou *manage* sa landrwa pou ganny en manze so delo fre. Fasilite kabinen prop e lapropte lo sa bout lans. Pozitivite sa Mr Speaker. Transformasyon e gou pou viv dan distrik Bel Ombre.

Re-sirfas bann semen lalimyer kot i neseser *cross barriers*, *bin site*, sa ki enteresan ozordi se zabitan ki'n fer propozisyon. E nou Lotorite Distrik nou vizite e nou aprouve.

Ek resours limite lannen pase sa letan nou pe sey nou mye pou fini bann demann. Letan Mrs Patricia i ava ganny son *cross barriers* apre ki in finans son semen li menm, pozitivite sa.

Letan Mrs Gonthier i ava ganny en bout semen pou fasilit son transportasyon dan transpor, pou son bann apwentman avek son dezabilite ki i annan, pozitivite sa.

Letan Serzan Belle pou ganny asiste ek en fasilite semen apre 45an ki'n sot kap pou ariv kot li, pozitivite sa Mr Speaker.

Lalis i long. Nou'n demann en *indoor gym* pou nou bann zenn ek NSC. Lalimyer re demarkasyon nou kort ek laplenn ki nou'n demande, se ranforsi bann pon dan distrik. Netwayaz isi kot i neseser avek lasistans nou novo Brigad. Travay i la mon bann frer ek ser. Lalis i long pozitivite, transformasyon e gou pou viv, avek *LDS* sa !

Kantite i annan pou fer. En proze lo tel kot ansyen *Auberge* pou donn lanplwa nou bann zenn e re-figir sa zil.

En lot proze drwat ek bazar lot kote semen, proze lakaz ki pre pou demare pou nou bann zabitan kapab gannyen.

Alor Mr Speaker rekomandasyon. Mon lans en lapel avek tou zabitan Bel Ombre pou aprose, parske ozordi Biro Brans in vin Ladministrasyon Distrik. I nepli en landrwa pou detrwa nanryen fer, veyer zaksyon. Me in vin nou lakaz. Vin gete kote ou kapab ede e bouz nou distrik pli devan. Vin gete kote ou kapab ede. Vin gete ki ou kapab fer pou ou menm ou

distrik e ou pei. Pozitivite sa Mr Speaker, gou pou viv. Nou pou bezwen fer li ansanm.

Letan mon pe konklir, pli gran transformasyon ki reste nou pou fer ansanm konman en distrik, e konman en pei se ferm sa parti ki apel *US*. En parti ki Seselwa i nepli krwar ladan e ki pa pe aport okenn sipor swa okenn nide pozitiv pou pei. Parey manrmay i dir zete dan bannann *comme* dir zot menm !

Mr Speaker ansanm nou kapab fer li e ansanm nou pou fer li parey nou vye moto ti dir. *Comme* dir mon frer ki ti dan Lasanble "Together nou ava fer li !"

Mon ti ava kontan dir mersi mon lekip dan Lasanble Nasyonal pou siport travay dir kontinyel, bon kontinyasyon pou sa lannen. Mersi sekretarya enkli tou lezot lazans Minister ki nou travay ansanm.

Mersi tou zabitan Bel Ombre ek Lepep Seselwa, enkli Seselwa ki pe viv aletranze e ki toultan anvoy nou en mo sipor e konfor dan letan difisil.

Ankor enn fwa mon ti ava kontan dir zot tou mersi e mersi pou zot lekout Mr Speaker.

(APPLAUSE)

MR SPEAKER

Mersi Onorab. E mersi tou lezot Onorab pou zot repons ek zot partisipasyon dan deba lo mesaz lo Leta Lanasyon. Avek sa nou'n termin nou premye gro *item* lo nou travay pou kommansman sa lannen.

Nou ti annan en *Order Paper* pou demen ki ti annan de size lo la. Enn ti pwen deklarasyon lo Fon Pansyon avek partisipasyon Minis Finans e zofisyen Fon Pansyon, e byensir posibilite pou Manm ekliersi sa sityasyon avek zot kestyion.

Ti osi annan en *item* dan *communication from the Chair* ki ou ti'n mete pou mwan fer en adres lo travay Lasanble dan lannen ki'n pase e pou regard sa lannen.

Minis Finans in enform mwan ki akoz bann diskisyon irzan ki zot pe fer lo latak lager dan *Ukraine* lo nou lekonomi, ki i ti anvi met parey in dir met *on-hold* okenn deklarasyon lo Fon Pansyon pou lemoman. Alor nou bezwen retir sa lo nou *Order Paper* pou demen e akoz i reste zis en lot *item* ase kourt.

Nou'n deside an konsiltasyon avek Madanm Clerk pou pa fer okenn sesyon demen okenn *Sitting* plito demen. E nou ava anvoy tou travay pou Mardi prosen le 8 Mars 9er bomaten.

Onorab Pillay wi ou annan en kestyion?

HON SEBASTIEN PILLAY

Wi Mr Speaker bonn apre midi. Bonswar annefe tou dimoun. Mersi pou ou bann lenformasyon ki ou'n fek donn nou.

Eski dan bann komunikasyon ki Minis Finans in fer avek ou, prenon kont ki sa size pansyon, i en size ki tre enportan pou bokou Seselwa i annan bokou koze lo la.

Eski Minis Finans in donn nou en ledikasyon, kan ki i pou pare pou li vin devan Lasanble pou li vin devan Lasanble pou li vin aport swa lenformasyon, ki nou kapab abord sa diskisyon lo sa size?

MR SPEAKER

In dir mon *put on-hold* alor mon espekte poudir sa i kapab vini, de ki in nobou ekliersi pozisyon lo serten size ekonomi an relasyon avek lager dan *Ukraine*. Alor nou atann sa lanons. Mersi bokou

Mon remersi tou bann Manm e mon swet zot bonn kontinyasyon pou sa semenn. Parey mon'n dir nou a zwenn Mardi prosen le 8 Mars 9er bomaten. Nou a *adjourn*.

(ADJOURNMENT)

